

**NATIONAL ASSEMBLY OF
SEYCHELLES**

Tuesday 27th May 2025

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou zofisye Lasanble. Bonzour nou bann viziter dan Galeri ki en group etidyan e ansenyan sorti Cascade. Bonzour nou piblik ki pe swiv nou dan landrwa kot zot été, dan lakour, lo semen. Mersi pour zot fidelite.

Pou komanse, Onorab Monthy in demann mwan laparol pou dir en mo byenveni pour son group ki in envite. Mon a donn li laparol.

HON PHILIP MONTHY

Mersi Mr Speaker. Bonzour Mr Speaker. Bonzour tou dimoun a lekout e en bonzour spesyal bann etidyan P6(2) ki dan Galeri ozordi ki sorti lekol Cascade. Akonpannyen par Mis Veronique ek Mis Doreen.

En pe letan zot in anvi vin vizit Lasanble. Ozordi nou annan en premye group, demen nou annan dezyenm group pou fer sir ki tou etidyan

dan sa laklas i ganny sa sans. Mon swet zot labyenveni e mon espere ki zot pas en bon moman e en bon leksperyans parmi nou ozordi dan Lasanble Nasyonal. Mersi Mr Speaker.

MR SPEAKER

Mersi Onorab. Bon, pou komanse avan nou al lo lot biznes lo nou *Order Paper*, mon bezwen fer en deklarasyon lo size *PNQ*.

Parey zot konnen, premye mon bezwen afimen ki mon pa'n aksepte *PNQ* ki'n ganny soumet par *Leader* Lopoziyon pour sa semenn.

Mon oule eksplike aköz mon'n fer sa desizyon. E an trwazyenm, mon oule donn en *ruling* lo ki mannyer nou pou tret bann size tel ki Komisyon Elektoral a lavenir.

Kestyon soumet par *Leader* Lopoziyon ti lir koumsa; “Eski Komisyon Elektoral i kapab dir nou Lasanble konbyen *first time voters* ki'n anrezistre pou vote depi 2020 ziskan la?”

Premyerman, mon ti fer fas avek sa problem dan sa kestyon aköz i ganny adrese lo Komisyon Elektoral. *Standing Orders Order 31* i dir; “*Questions may be put to a Minister relating to any subject, Ministry or department for which the Minister is responsible.*”

Donk, en kestyon normalman i bezwen ganny adrese lo Minis. Annefe, mon ti met sa pwen premye devan *Leader* Lopozisyon ler i ti apel mwan pou diskrit son PNQ. E i ti aksepte ki nou ti kapab adrese sa kestyon pou Minis.

Alor, ti annan posibilite ki sa kestyon ti kapab lir koumsa; “Eski Minis i kapab dir sa Lasanble – ensidswit.”

Me, e dan sa ka, sete Vis-Prezidan ki ti kapab vin devan Lasanble akonpanyen par zofisye Komisyon Elektoral pou reponn, parey dan ka ki Onorab Churchill Gill ti demann en kestyon 3 semenn pase.

Me ler mon'n konsider sa posibilite, mon'n fer fas avek en pwen fondamantal pli enportan ki mon ti santi mon bezwen adrese. E kestyon se; “Eski i korek pour Vis-Prezidan oubyen en lot Minis vin dan Lasanble pou reponn en kestyon lo travay Komisyon Elektoral?”

Mon met a zot latansyon Lartik 115, paragraf 2 dan Konstitisyon ki dir; “*The Electoral Commission shall not, in the performance of its functions, be subject to the direction or control of any person or authority.*”

Lefe ki nou demann Vis-Prezidan oubyen en lot Minis vin reponn en kestyon lo travay Komisyon Elektoral, i

endike e i donn lenpresyon, parey *Standing Orders* i definir li, ki Komisyon Elektoral i tonm anba responsabilite en Minis.

Mon krwar konman Lasanble nou pa kapab donn sa lenpresyon, aköz nou pe sizere ki Komisyon Elektoral i raport avek Prezidan. Donk, an konfli avek Lartik 115 Konstitisyon ki mon'n site ki; “*The Commission shall not be subject to the direction or control of any person or authority.*”

Alor ki mon le dir dan sa sans se, nou kapab menm demande si Vis-Prezidan i devret demann *Electoral Commission* pou vin devan Lasanble avek li, pou reponn en kestyon. Mon krwar apre refleksyon, mon krwar ki non, i pa apropiye.

La mon rekonnet ki in arive dan lefase. E sa parey mon'n site, pa pli lwen ki 3 semenn pase dan sa kestyon Onorab Gill. Me mon le dir klerman la ki apre refleksyon, mon krwar poudir sa prosedir pa apropiye.

Mon'n osi konsider le pwen ki se VP ki vin devan Lasanble pou prezant Prozedlwa ki konsern Komisyon Eleksyon. E sa osi i en pwen ki *Leader* Lopozisyon in met devan mwan. Me i annan en diferans.

Prezant en Prozedlwa se pa *performance of its functions*. Prozedlwa se donn *Electoral Commission* son bann fonksyon e etabli son louvraz. I pa en kestyon lo *the performance of its functions* parey Konstitisyon i prevwar.

Alor, lefe ki dan lespas 3 semenn nou'n ganny en dezyenm kestyon konsernan Komisyon Elektoral, in montre mwan kote danze i ete. Nou annan en eleksyon ki pe vini e Komisyon Elektoral pou bezwen fer plizyer desizyon enportan.

I pa pou byen pou enplik Vis-Prezidan oubyen en Minis dan eksplik oubyen reponn kestyon lo sa bann desizyon. Donk, se an prevwayan sa ki mon'n deside ki sirkonstans i demande ki nou ekart Komisyon Elektoral ek Lotorite Politik. E nou permet li e ed li afirm son lendepondans e son persepsyon lendepondans.

La mon le fer remarke osi ki lenformasyon ki *LOTO* ti pe demande dan son *PNQ* i disponib e fasil pour li gannnen. Komisyon Elektoral i pibliy lalis voter revize tou le lannen ki i donn tou parti politik. E an plis ki sa, i pibliy tanzantan bann adisyon lo lalis voter.

I vre ki sa bann dokiman pa ganny piblye piblikman. Me preski. Donk, mon krwar sa pwen i enportan aköz i

montre poudir sa bann lenformasyon i disponib e i kapab gannnen. Donk, i pa en sekre.

Me selman mon krwar – mon pa pe servi sa pwen pour mwan pa aksepté *PNQ* dan sa sans. Pour 2 rezon. Enn ki i annan presedans dan Lasanble kot nou'n pran kestyon lo Komisyon Elektoral.

E 2, i sa i en kestyon si - ki kapab ganny debat si sa lenformasyon i ganny piblye piblikman oubyen non. Mon pa oule al ladan. Me selman mon krwar i en pwen enportan pou fer remarke ki i pa en kestyon kasyet sa lenformasyon aköz i kapab ganny *available*.

Ok. Bon. Alor, mon mazin en ki i devret annan en lot fason pour Lasanble ganny lenformasyon avek en antite kot son lendepondans i ganny garanti dan Konstitisyon.

Sa ki mon pe propoze se ki Komisyon Elektoral reprezante par son *Chief Electoral Commission Officer* e lezot zofisye, i vin dan Lasanble devan Komite Lasanble pou fer en *statement* lo lanrezistremman voter e pou reponn okenn kestyon lo sa bann size. Enkli nonm *first time voters* ki'n anrezistre.

Mon pou pas sa propozisyon avek *Assembly Business Committee* pour

mwan regarde si zot annan okenn pozisyon lo la. E pou sizere ki nou kapab pran *Electoral Commission* pour en *statement* dan Lasanble parey nou'n fer avek lezot antite, tel ki *Seychelles Pension Fund*.

Mon krwar sa prosedir i a permet Lasanble ganny tou lenformasyon ki nesese, san ki okenn Minis i bezwen vin devan Lasanble. E savedir san konpromiz lendepondans *Electoral Commission*.

Mon le met lo rikord en *ruling* spesifik la. Lasanble pa devret adres okenn kestyon ki konsern fonksyonman Komisyon Eleksyon. Oubyen okenn lot antite ki annan lendepondans dan son fonksyonman dan Konstitisyon.

E bann tel antite, i devret vin devan Lasanble lo zot menm si Manm i eksprim en nesese rezonnab pou ganny lenformasyon lo zot fonksyonman. La i *ruling* lo sa size.

Donk, mon santi ki mon'n permet – avek sa, mon'n permet sa kestyon vin dan Lasanble pou montre poudir mon napa naryen kont size sa kestyon. E mon oule osi dir, mon'n fer sa, mon pe propoz sa, aköz mon santi poudir mon pa pe met okenn blanm lo *Leader* Lopozisyon ki in prezant son kestyon malapropo, aköz ti annan

presedans. E sa lareg ti'n devret ganny kler oparavan.

I annan en lot size ki mon oule adrese e sa se kestyon ki *matter of privilege* ki Onorab Larsen ti demande. Mon'n adres sa size avek Minis Gouvernman Lokal. Mon'n ganny en repons. Mon'n donn sans repons Onorab Aglae ki ti prezant sa demann pour *matter of privilege* ansanm avek Onorab Larsen.

Repons ki mon'n gannye avek Minis Gouvernman Lokal se ki i zot Polisi pou partaz bann lenformasyon ki konsern proze distrik avek Manm Elekte pour sa distrik ki par dan planifikasyon pour sa soz.

(Interruption)

MR SPEAKER

E Minis - Minis Gouvernman Lokal in dir mwan poudir sa i zot Polisi.

(comments off-mic)

MR SPEAKER

Rezon – silvouple, respe. Sa i en kestyon ki nou kapab aborde avek Minister Gouvernman Lokal e lezot Minister pou regarde ki *limit* drwa en Manm Elekte Proporsyonnelman pou ganny lenformasyon avek Minis. Sa mon pa ankor fer li.

Mon'n deside, mon pa pe donn Onorab Larsen okenn *matter of privilege* lo sa size, aköz in persiste pour li lev sa pwen, menm ki mon ti'n dir mon pou etabli pozisyon lo la pour li.

Mon krwar Onorab Larsen pa'n respekte mon langazman ki mon ti donnen ki mon pou donn li en repons lo la. Donk, mon krwar poudir mon pa drwa li en *matter of privilege*. Mon'n eksplike.

Bon, lo size ki nou'n leve, Onorab Sebastien Pillay in demann *matter of privilege*. Mon rekonnet ki i kapab annan en *matter of privilege* si i santi i bezwen eksprim li. I annan 3 pwen ki in leve.

Enn pwen i konsider konportman Deputy Speaker. Mon pe zis dir, Onorab Pillay, mon pa'n demann ou - rekonnet - ki mon pa'n demann ou pou soumet an ekrir ou *matter of privilege*. Donk, mon pe dir ou reste lo bann pwen ki ou'n elabore.

E an plis ki sa, mon pe dir ou keston konportman Deputy Speaker, si ou bezwen adres li, ou bezwen adres li an ekrir avek mwan e pa dan en *matter of privilege* la an se moman. Onorab Pillay, mon donn ou laparol.

HON SEBASTIEN PILLAY

Mersi Mr Speaker. Mon byen kontan ki mwan mon zwir

menm kalite proteksyon ki Deputy Speaker dan Lasanble Nasyonal.

Mon *matter of privilege* i enn ki tre senp. Mon keston ki ti'n ganny *submitted* koman en PNQ ti ganny anvoye kot ou 10er en kar. 10er 01 mon annan rikord lo mon telefonn, mon *call* ou e mon eksplik ou ki mon pa'n kapab ariv kot Lasanble pou siny mon dokiman.

Me ki mon keston in ariv kot Lasanble e mon ti a kontan ou konsider ou keston. Ou dir mwan wi, ou pe konsider mon keston. Ou pe regarde pou donn mwan en *ruling*.

10er 58 mon re *call* ou ankor. Mon demann ou ankor enn fwa pou donn mwan en *ruling* lo mon keston. 12:47 mon re *call* ou ankor pou demann ou en *ruling* ki ou pa donn mwan ankor.

Pres 1er edmi, mon ganny en *email* sorti kot ou ki dir ek mwan koumsa poudir ou pa'n aksepte mon keston, an kontravansyon *Standing Order 36(2)(a)* ki i dir ki ou bezwen donn mwan en rezon pour aköz ou pa'n aksepte mon keston.

Bomaten mon vin war ou dan prezans Onorab Lemiel e Onorab Aglae. E ou'n admet dan ou lofis ki ou ti'n fini pran desizyon pou pa pran mon keston depi premye fwa ki

mon *call* ou. Ou'n admet devan sa 2 *witness* ki ou ti'n fini fer desizyon.

E ki menm ler prezan mon'n re *call* ou pou dir ou mon le anvoy en lot kestyon. Ou'n dir mwan ou pa pe pran okenn lot *PNQ*.

So, mon konklizyon i se ki ou ti'n fini deside pour ou pa pran mon kestyon, aköz i annan en keksoz ki Gouvernman *LDS* i le kasyet vizavi lanrezistremman *first time voter*! Sa i enn.

(APPLAUSE)

HON SEBASTIEN PILLAY

Dezyenmman. Dezyenmman. Dezyenmman, sa i montre-

(Interruption)

MR SPEAKER

Order!

HON SEBASTIEN PILLAY

Sa i montre – i montre poudir i annan keksoz dezonnnet ki'n ganny fer. Ou ti'n kapab dir mwan Mr Speaker, depi premye fwa ki ou koz ek mwan ki ou pa kapab pe pran mon kestyon. E ki alors ou pa pe admet mon kestyon e donn mwan rezon.

Ler mon'n demann ou aköz ou pa'n donn mwan rezon pou anvoy mon kestyon. Ou larepons ankör enn fwa devan le 2 *witness* sete ki aköz

mon'n met mon kestyon lo *Facebook*. Mon'n al lo rezo sosyal pou fer konnen.

Be Mr Speaker, o menm moman ki mon'n al lo *Facebook* mon'n osi met ou larepons ki ou ti'n anvoye o menm moman. So, a sa moman, ou ti *still* pa ankör donn mwan en rezon annakör avek *Standing Order*.

Savedir koman Speaker, ou'n vol nou *Standing Order* par pa donn mwan en larepons pour mon kestyon!

(APPLAUSE)

HON SEBASTIEN PILLAY

Prezan les mwan adres ou largiman otour size ki *Electoral Commission* ti vin dan lasan-

MR SPEAKER

Non. Ou pe *state ou matter of privilege*. Ou pa pe – ou pa pe adres rezonnman mon *ruling*. Mon *ruling* i final. Se tou.

Mon'n donn ou permisyon pou adres ou *matter of privilege*. Si ou'n fini lo la, mon a reponn ou. Mon pa pe permet ou pou kestyonn mon *ruling*. Terminen Onorab Pillay.

HON SEBASTIEN PILLAY

Mr Speaker, dan Lasanble le 13 *May* 2025, egzakte man 10er 07, ou dir bonzour Madanm Sheena Max ki sorti kot *Electoral Commission* pou

vin reponn en kestyon Onorab Gill dan Lasanble.

A sa moman, lefe ki zot ti an kontrol kestyon ki pe ganny demande, ti napa problem pour Vis-Prezidan vin devan Lasanble, vin avek Madanm Max pou reponn kestyon Onorab Gill.

MR SPEAKER

Mersi Onorab.

(comments off-mic)

MR SPEAKER

Mon'n tann –

(Interruptions)

MR SPEAKER

Order! Order!

(Interruptions)

MR SPEAKER

Order! Mon pe dir Onorab Vidot ek Onorab Loze aret kriy dan Lasanble anver Speaker. Anver Speaker! Onorab Pillay, bann size ki ou pe leve i bann size ki dan mon *ruling* ki mon'n fini adrese. Mon'n fini adrese!

(Interruptions)

MR SPEAKER

E nou pou termin la. Rezon aköz mon pa'n konsider en lot – premyerman lo kestyon letan ki mon'n pran. Mon le dir ki

mon ti pe pran letan pour mwan reflesir lo sa size.

E rezon – rezon aköz ki mon pa'n konsider en lot *PNQ* se ki mon'n konsider en lot mannyer ki Onorab Pillay pou ganny larepons lo son kestyon ki in poze. Mersi.

(Interruptions)

MR SPEAKER

Bon.

(Interruptions)

MR SPEAKER

Rezon – rezon aköz mon'n swazir sa prosedir se pou evite ki *Electoral Commission* i vin dan Lasanble avek en Minis. Me ki i vin endividuelman konman *Electoral Commission*.

Onorab Aglae, ou ti annan en pwen lo *matter of privilege* ki ou'n - konsernan Onorab Larsen. Ou kapab *state* li si ou le.

HON EGBERT AGLAE

Mersi Mr Speaker e bonzour tou dimoun, e nou bann envite ki dan Galeri.

Mr Speaker, mon le *raise a matter* swivan larepons ou *email* ki ou'n anvoy mwan ki date le 26 May ki dir ki;

“I am informing you that the following as the representative of your Caucus, I will not be addressing Honorable Larsen since she

persisted in raising this out of order after I've informed that I will clarify."

Mr Speaker, mon santi poudir Onorab Larsen pe ganny pini e ki ou koman Speaker, ou annan sa pouvwar responsabilite pou donn en Manm en larepons son *matter of privilege, either, in front of the House*. Ouswa ou ti kapab ekri li personelman!

E larepons mannyer ou pe donn mwan Mr Speaker, Onorab Larsen pe ganny trete koman en lot mannyer as en Manm Proporsyonnel. E ki letan ou pe get bann lezot Manm Proporsyonnel, pe ganny trete dan en lot kalite fason.

E letan mon get larepons ki'n ganny donnen Mr Speaker, ou'n *state* la bomaten. Akoz PS Perine i ti fer kler ki – i dir; *"However I must respectfully inform you that we are not in a position to share information requested, as doing so, should be inappropriate and could perceive as a lack of respect to the current district authority and the constituency they serve."*

(comments off-mic)

HON EGBERT AGLAE

Be selman, i annan 4 Manm LDS dan sa Lasanble. Onorab

Porice, Baie Ste Anne, Onorab Bistoquet ki i ganny akse ek lenformasyon. Onorab Simone Bistoquet i monte desann, tou lenformasyon i gannnen. Onorab Sultan i –

MR SPEAKER

Onorab, *stick* –

(Interruptions)

MR SPEAKER

Mon pe demann – mon pe demann Onorab Vidot, pou sorti dan lasal silvouple.

(APPLAUSE)

MR SPEAKER

Mon pe demann -

(Interruptions)

MR SPEAKER

Order! Mon pe demann bann Manm pou aret kriye silvouple. Gard lord.

(Interruption)

MR SPEAKER

Onorab Aglae, ou lo en *matter of privilege* lo lapar Onorab Larsen. Kontinyen reste lo la silvouple.

HON EGBERT AGLAE

Mr Speaker, sa ki mon pe fer resorti i an referans avek Onorab Larsen. Depi ki

manner in konmanse e kot nou'n arive ozordi.

E ou konman Speaker, mon ti a swete dan en fason edike pour ou kapab dir sa Lasanble en prosedir ki nou dwatet pe swiv kot i konsern Manm Proporsyonnel akse ek lenformasyon ek distrik!

Ou pa'n fer sa Mr Speaker e ou'n *fail* nou lo sa kote. Ou pa pe protez sa minorite. E mon santi poudir aköz mazorite zot annan tou pouvwar, zot fer sa ki zot anvil! Be pour nou sa i pa akseptab Mr Speaker! Mersi.

MR SPEAKER

Mersi. Kestyon - mon'n donn mon *ruling* lo sa size. Kestyon akse avek lenformasyon distrik par en Manm Elekte Proporsyonnel i en pwen ki Lasanble i devret leve avek Minister Gouvernman Lokal ek lezot Minister. Sa i fer par mon *ruling*. Mersi.

(Interruption)

MR SPEAKER

Ki *point of order* Onorab Pillay?

HON SEBASTIEN PILLAY

Onorab Pillay Mr Speaker. Pa Pillay. Onorab Pillay.

(Interruptions)

HON SEBASTIEN PILLAY

Mr Speaker, annou ganny en keksoz kler dan Lasanble.

(Interruption)

MR SPEAKER

Order!

HON SEBASTIEN PILLAY

Order 8 –

MR SPEAKER

Order silvouple. Wi, Onorab Pillay. Mon'n dir ou Onorab.

HON SEBASTIEN PILLAY

La ou la. Ou ganny li byen Mr Speaker. Dan sa Lasanble anba *Order 8*, ou asir *decorum* Lasanble e balans travay Lasanble.

A plizyer repriz dan sa Lasanble, bann *PS*, bann Minis in vini. Felisit Onorab Porice pou vizit proze lakaz ek zot. Pou vizit proze. Pou ganny lenformasyon lo bann diferan keksoz ki pe pase. Enkli *PS* Perin dan sa Lasanble Mr Speaker!

Alors, ou a met Onorab Audrey Vidot deor, aköz i pe lager son drwa! Ou a le met mwan deor aköz mon pe lager mon drwa!

MR SPEAKER

Mon'n -

(US Members walked out)

(APPLAUSE)

(comments off-mic)

MR SPEAKER

Bon, Onorab Esparon, ki –

HON REGINA ESPARON

Mersi Mr Speaker. Mon ti anvi *raise en point of order* akòz sa lakizasyon ki Onorab Aglae in fer. Si i annan laprev poudir Manm Proporsyonnel isi lo sa kote latab pe ganny lenformasyon, anmenn devan Lasanble. Mersi.

MR SPEAKER

Mersi. Tre byen. Nou a kontinyen avek nou biznes pour ozordi e mon a demann Madanm raporter pou apel Minis e son delegasyon pour keston.

Bon, avan mon rekonnet Minis e son delegasyon e dir zot bonzour. Mon pou retourn lo en pwen lo *Order Paper*. E sa se prezantasyon dokiman. Madanm Clerk, ou annan laparol.

MADAM CLERK

Mersi Mr Speaker. Bonzour Mr Speaker. Bonzour tou bann Manm. Tou bann *staff* Lasanble. Minis, e son delegasyon ki avek nou ek bann zanfan ki dan Galeri. Papye ki pe ganny prezante bomaten;

The Annual Report for 2024 – Committee on

Communicable Diseases, HIV/AIDS & SRHR. Mersi Mr Speaker.

MR SPEAKER

Mersi Madanm Clerk. Bonzour Madanm Marie-Celine Zialor, Minis, pour Lazenés, Spor e Lafanmir.

E egalman, bonzour Mr Mike Morel, Sekreter Prensipal dan Departman Lafanmir. Mr Daniel Kallee, *CEO Home Care Agency*. E sa se delegasyon ki nou annan pour premye seri keston.

Donk, byenveni e mersi pour ot partisipasyon. Nou pou pran bann keston ki'n ganny liste dan premye seri. E nou konmans avek keston 82 e sa i dan non Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis. Bonzour avek ou delegasyon. *Welcome* ban zanfan sorti Cascade dan *Gallery*. E bonzour tou bann dimoun a lekout.

Mr Speaker, mon keston i al koumsa; Eski Minis i kapab dir avek Lasanble ki'n arive avek sa Proze Lakaz *Senior Citizen* kot ti'n fini idantifye later e osi fer vizit lo sa sit dan Ile Perseverance? Mersi.

MR SPEAKER

Mersi Onorab. Minis, ou repons?

MINISTER MARIE-CELINE ZIALOR

Mersi Mr Speaker. Bonzour Mr Speaker avek ou *staff*. Mersi tou bann Manm Onorab prezan. Mersi tou bann zanfan. Bonzour bann zanfan dan Galeri e bonzour tou dimoun ki a lekout. E mersi Onorab pour ou kestyon.

Mr Speaker, konsepsyon Proze Lakaz *Senior Citizen*. Ouswa parey nou'n apel li "*Maison Troisième Age*", i date depi en pe letan pase. E i annan R12milyon ki ti ganny ranmase koman Bidze pour sa proze atraver CSR.

Plizyer rankont avek Lazans Lenfrastriktir SIA, e Lasosyasyon bann Trwazyenm az in ganny fer pou revwar plan e konsepsyon sa proze dan son totalite, anvi ki sa premye plan ki ti ganny prezante ti pou kout plis ki R30milyon pou realize.

Mr Speaker, apre bokou konsiltasyon, tou bann parti konsernen in agree pou diminyen grandeur sa plan proze pou fer sir ki i pa desot sa sonm 12milyon ki dan Bidze.

E apre dernyen konsiltasyon ki Departman Lafanmir in fer avek Lazans pour Lenfrastriktir Sesel ek Lasosyasyon bann Trwazyenm

Az e osi Minis Finans, nou'n tonm lo en Lagreman pou fer *business plan* pour sa proze.

Lide se pour ki sa proze i vin enn ki otosifizan kot bann trwazyenm az i kapab servi sa sant san ki i vin en fardo. Sirtou en fardo finansyel e administratif, lo zot lasosyasyon.

E an se moman nou pe esper sa *business plan* finalize e apre pour nou bouz devan avek sa proze. Mersi Mr Speaker.

MR SPEAKER

Mersi Minis. Onorab Bastienne, ou siplemanter?

HON DESHEILA BASTIENNE

Minis, mersi pour ou bann leksplikasyon ki ou'n donner. E bann lenformasyon ki ou'n donner i ase kler.

E mon krwar ki bann *senior citizen* la deor ki ti pe atann pou ganny en rapor lo kote zot ete, zot a satisfè ki keksoz pe bouze, pe marse. E mon a dir ou mersi. Mon pou napa kestyon siplemanter.

MR SPEAKER

Mersi Onorab. Onorab William, i annan en kestyon?

HON WAVEN WILLIAM

Mersi Mr Speaker. Mr Speaker, mon ti a kontan ganny ou *ruling* letan mon pe demann sa kestyon, si ou

krwar poudir i vo lapenn. Akoz mon pe *focus* dan le fitir. Atraver sa kestryon, mon anvi demann ou Minis avek idantifikasyon sid pour Ile Perseverance.

Pour soustenabilite a lavenir vizavi bann proze lakaz vye dimoun, ki zot pe mazin fer an plis dan kad ankouraz lafanmir pou pa zis – *well* dan en fason, zis depoz nou bann dimoun dan bann *Old People's Home* ouswa kazern.

Ki bann lankourazman, ouswa bann *scheme* ki zot kapab ofer lafanmir pou kapab fer bann lazoutman pou kapab abrit nou bann dimoun aze? Mersi.

MR SPEAKER

Mersi Onorab. Minis, i kapab reponn.

MINISTER MARIE-CELINE ZIALOR

Mersi Mr Speaker. Mersi Onorab pour ou kestryon. Petet mon pa konnen si mon'n mal konpran sa kestryon Mr Speaker. Me selman sa kestryon la i pa lo *Old People's Home*. I lo *Maison Troisième Age* ki en keksoz konpletman diferan. I en lot *projet*.

I annan en lot kestryon mon krwar ki Onorab Samynadin pe demande lo *Old People's Home*. Mon pa konnen Mr Speaker, si ou pou

permet reponn sa la, ouswa si petet nou a pran li apre?

MR SPEAKER

Mon pran ou pwen Minis, e mon krwar i valab. Mon ti a prefere ki nou pran sa kestryon an relasyon avek en lot kestryon lo menm size. Mersi.

Onorab – wi, Minis, mon apresye distenksyon ki ou'n fer dan lakaz *Senior Citizen*. Onorab Loizeau, ou kestryon i anliny avek kestryon orizinal?

HON NORBERT LOIZEAU

Mr Speaker, mon pe panse – mon ti a kontan ou donn mwan sa konsey lo mon kestryon ki mon pou al demande. Mon ti pou al *in regards* avek prive.

Ti annan en moman kot prive ti pou antre dan bann konstriksyon bann *homes*. Kot mon pe mazine si sa i pou antre dan sa kestryon *or* mon a esper Onorab Samynadin.

MR SPEAKER

Wi, *ok*. Parey Minis in endike. Mersi.

HON NORBERT LOIZEAU

Ok. Thank you. Mersi.

MR SPEAKER

Mersi. Prosen kestryon, nimero 80, Onorab Richard Labrosse.

HON RICHARD LABROSSE

Mersi Mr Speaker. Mon ti a dir bonzour Minis, avek ou delegasyon. Bonzour tou bann zanfan sorti Cascade e tou dimoun ki a lekout. Espesyalman ou sa enn sorti Plaisance.

Mr Speaker, kestyon 80 i al konm swivan; Eski Minis i kapab eksplik Lasanble ki bann travay ki'n ganny fer e pe ganny fer pour ki nou sistenm rezis pour *home carer* i annord e sipervizyon pe ganny fer pou byennet resipyan e osi bann ki donn sa servis? Mersi Mr Speaker.

MR SPEAKER

Mersi. Minis, ou repons?

MINISTER MARIE-CELINE ZIALOR

Mersi Mr Speaker. Mr Speaker, pour lemoman nou annan en *database* ki Lazans *Home Care* pe servi ki annan tou lenformasyon pour bann benefisyer ek zot bann *caregivers*.

Sa *database* i baze lo bann *carers* ki'n ganny idantifye par bann kliyan zot menm, ouswa manm lafanmir.

I annan en travay ki pe ganny fer avek en konsiltan pou kapab met en sistenm rezis ki pli efikas an plas. E an sa ki konsern sipervizyon, sa i ganny fer dan diferan fason, Mr Speaker.

Premyerman, i annan vizit ki ganny fer pandan lasemenn kot lakour. Zofisye lazans i verifye plizyer kriter pou evalye si bann swen i satisfèzan.

Dezyenmman, letan i annan en konplent ki antre, zofisye i al verifye kot sa ki'n fer sa konplent pou sey trouv en solisyon. E lazans i osi fer *survey* pou anmas lenformasyon.

E an 2024 Mr Speaker, lazans in fer *survey* dan 5 distrik. Perseverance 1 ek 2, Roche Caiman, Grand Anse Praslin ek La Digue.

An 2025 ziska aprezan *survey* in ganny fer Baie Ste Anne ek Anse aux Pins. E sa legzersis pou kontinyen dan lezot distrik. Mersi Mr Speaker.

MR SPEAKER

Mersi Minis. Onorab Labrosse, ou siplemanter?

HON RICHARD LABROSSE

Mersi Mr Speaker. Minis, mersi pour ou larepons ki ou'n donn nou.

Minis, zis pou al en pti pe an detay lo sa bann larepons ki ou'n donner. Ler nou pe koz lo kote Servis *Home Carers* ozordi avek zot resipyan. Savedir la nou pe koz lo tou le de kote.

Ou'n dir ki i annan bann sipervizyon ki ganny fer dan

distrik. Ou'n donn en pe detay. Me mwan ki mon ti a kontan konnen la ozordi Mr Speaker;

Eski kot *home carers* ozordi la ler nou pe koze zot annan zot en prosedir parey ki nou dir ki nou ganny servi en *guideline* standar?

Kot la bann *carer* zot menm zot konnen kwa ki zot merit pe fer, e bann resipyan osi zot konnen kwa ki zot pe ekspekte ek sa *carer*. An menm tan kot nou dir i napa en konfizyon ant tou lede.

Konmsi mon kestyon direk la, mon pe gete si i annan en standar – *guideline* standar kot zot laba, ki ler sa resipyan i vini i osi kapab ganny en kopi avek li ki i kit o bor li?

Kot ler i annan bann keksoz ki pase ou vwar zot par ler zot pe *call* tou diferan landrwa. Le senp rezon se ki aköz napa en standar *monitoring* avek sa.

Mon dezyenm kestyon ki mon ti a kontan demande ozordi Mr Speaker, pou siport bann dimoun kot *home carers* ozordi ki pe fer en bon travay laba mon kapab dir.

Sa avek bann lenteraksyon ki mon'n gannyen ek zot pandan sa 4 an ki mon'n Manm Lasanble. Mon pou felisit zot e remersye zot bokou pou asiste mwan ek mon bann zabitan.

E ler mon pe koz lo zot laba Mr Speaker, mon ti a kontan konnen si Minis i ava dir nou ozordi, ki bann *training* ki sa bann dimoun pe gannyen? Avek mon konnen ki i annan bann demann ki pe kontinyen ogmante.

Ki bann *training* ki zot pe gannyen, bann formasyon ki zot pe gannyen zot osi lo kote administratif e osi bann ki mont lo teren parey nou dir, pou al fer lenspeksyon, e ki i annan an plas pour zot ozordi pou ankouraz zot pou fer sa bon travay parey zot pe fer? Mersi Mr Speaker.

MR SPEAKER

Mersi Onorab. Minis, ou –

MINISTER MARIE-CELINE ZIALOR

Mersi Mr Speaker. Avek ou permisyon mon ti ava swete ki CEO Kallee i reponn sa 2 kestyon silvouple.

MR SPEAKER

Mersi. CEO, ou annan laparol.

CEO HOME CARE AGENCY DANIEL KALLEE

Mersi Mr Speaker. Bonzour Mr Speaker e tou Manm Lasanble. Mersi Minis pour refer kestyon.

Lo standar Onorab, pou reponn ou kestyon, nou annan en standar ki'n ganny devlope pour nou donn swen nou bann

dimoun kot lakour. I en dokiman konpreansiv. I la. E se sa ki gid tou nou bann zofisye *monitoring* ler zot fer vizit kot lakour.

Me an plis avek sa, pour nou plis sible swen ki nou bezwen donn nou bann dimoun, i annan osi en *care plan* ki ganny devlope spesifikman pour sa resipyan. Akoz pa tou resipyan ki parey. Nou pa le ki bann *caregivers* i travay dan vid. Olye donn sa swen medikal osi, zot fer zis travay domestik.

Donk, sa *care plan* i defini ki travay, ki swen nou bann *caregivers* pou donn nou bann benefisyer. E sa osi i ganny sipervize baze lo sa *care plan* ler bann zofisye i pase pou fer sipervizyon kot lakour. Mersi Mr Speaker.

Dezyenm kestyon lo *training*, mon apresye konpliman ki ou'n adrese pour bann staff dan *Home Care*.

Avek kantite *staff* ki nou annan, nou travay en kantite anba en ta presyon. *And* bokou dimoun i konpran. Bokou dimoun i eksprim satisfaksyon o milye en kantite fristrasyon, akoz tou dimoun i anvi son *case* i pas pli vit posib.

E sa i fer ki parfwa nou osi nou bezwen *care* pour nou bann *staff* dan lazans. Nou annan bann *in-house training* ki nou organize baze lo bann

keksoz ki spesifik ki nou war i enportan pour zot.

Me osi, nou annan sa bann lezot *training* ki'n ganny devlope avek bann lenstitisyon. Kot pandan ki zot pe travay, i annan lokazyon pour zot al ogmant zot konpetans lo lafason ki zot pe deservi zot servis. Mersi.

MR SPEAKER

Mersi *CEO*. Mon annan lezot kestyon. Onorab Labonte?

HON ANDY LABONTE

Mersi Mr Speaker. Bonzour Minis, avek ou *panel*. Minis, petet - nou konnen poudir i annan en gran lalis *home carers*. So petet si ou ti kapab dir nou konbyen *home carers* i annan e resipyan, si ou annan sa statistik avek ou?

Aprè petet, mon apresye ki *home carer* pe ganny en pe plis valorize e ki i pe ed zot ki ler zot al rod en *loan*. Bann keksoz, bann revè ki'n ganny fer dan Lalwa.

Me selman petet bann kestyon ki dimoun toultan i pe demande. Ki kriter petet pour en dimoun travay konman en *home carer* aprè pour en resipyan kapab kalifye pou ganny *home carer*?

Aprè, zis an pasan, petet, eski i annan en diferans ant dan kondisyon bann *home carers* ki travay kot bann lakour avek bann ki travay

dan bann *home* li menm li?
Eski i ganny klasifye parey?
Mersi.

MR SPEAKER

Mersi. Minis in endik CEO pou reponn.

CEO HOME CARE AGENCY
DANIEL KALLEE

Mersi Mr Speaker. Mersi Onorab pour ou keston. Lo lenformasyon kantite benefisyer ki – kantite *carers* ki nou annan. Aktyelman nou annan nou en lalis 2mil359 benefisyer ki 65 an, an montan. *Right?*

E nou annan nou en lalis 854 benefisyer ki aze ant 15 an a 64 an. So, ki fer ki la ler nou pe koz *caregivers* dan nou sistenm, nou annan nou 3mil275 *caregivers* ki pe ede plennman avek servis ki nou pe donnen.

MR SPEAKER

Thank you. I ti annan en lot keston. Si i annan en diferans ant sa 2 kalite *assignment*?

CEO HOME CARE AGENCY
DANIEL KALLEE

Kriter ki ganny servi pour nou *allocate* swen a domisil. Premyerman, i annan *eligibility test* ki ganny fer. Akoz nou mazinen poudir - nou konn tre byen poudir

Servis *Home Care* i en benefis sosyal.

Alors son premye faz, nou bezwen *apply* pour sa benefis. E kriter i baze lo kantite reveni ki annan kot lakour. Kantite *income* ki annan kot lakour. E sa ki zot pe demande. *Alright?*

Now, baze lo la i annan sa *mean testing* ki ganny fer e sa ki pou determinen rezilta si sa dimoun i kalifye ouswa si i kalifye lo poursantaz. Ouswa si i pa kalifye ditou. *Ok.*

So kriter pou vin en *carer*, dabor i annan ou laz. Ou bezwen annan en serten matirite. Pour lemoman la nou pe pran 25 a 65 an. Me parfwa i annan bann zenn ki i montre en serten matirite menm avan 25 an.

So, i annan en *assessment* ki ganny fer dan lazans. E kot parfwa i annan bann sityasyon kot nou war sa dimoun i kapab delivre. So, la konsiderasyon i ganny pran pour nou anmenn sa *caregiver onboard*, menm si i napa 25 an.

But, i enportan nou fer resorti la ozordi ki nou annan *carer*, *caregivers* ki par lao 65 an. So nou annan en lalis kot nou annan *caregivers* 65 an ziska 82. 82 an. Nou annan 199 *caregivers* ki'n ariv sa laz.

Nou annan 136 ki aze 60 a 64 an. Nou annan 38 bann *caregivers* ki aze ant 23 an

montan a 59 an. So, i donn ou sa *range of* laz ki nou pe dil avek pour *caregivers*.

Me kriter, nou bezwen – avek nouvo Lalwa, nou pou annan lanrezistremman ki pou baze lo konpetans sa bann *caregivers*. En pti pe zot abilite osi. *Ok?*

Donk, baze lo la, zot pou ganny donnen en sertifika ki sertifye zot konman en *caregivers*. *But*, foudre dir ki lazans dan son manda, dan son rol la, avek nouvo Lalwa, nou pou bezwen fer *training* avek nou bann *caregivers*. Nou pa zis pran zot, anrezistre zot, anvoy zot lo teren.

Donk, pour lemoman nou ankor pe servi sa *care plan* konman en kriter pour nou gete, pour nou swiv zot de pre dan swen ki zot pe donnen baze lo kondisyon sa benefisyer.

But, dan lavenir i annan bann *training basic* ki zot pou bezwen pas ladan, ki zot pou bezwen pran pour zot kapab – pour nou asire lazans ki nou pe anvoy en *caregiver* ki'n ganny formen pour li delivre, pour li donn sa swen. E kontribye dan sa *wellbeing* son benefisyer.

MR SPEAKER

Bon, mersi. Mersi CEO. I annan - Wi, mon santi-

CEO HOME CARE AGENCY **DANIEL KALLEE**

I annan ankor en bout kestyon. Ki diferans-

MR SPEAKER

Wi. Ale.

CEO HOME CARE AGENCY **DANIEL KALLEE**

Ki diferans i annan ant en *carer* dan en *home* avek ki dan lakour?

So, dan bann *home*, bann ladministrater *home*, ouswa kouvan, ouswa orfelina, se zot ki prepar routin swen ki bann *caregivers* i bezwen donnen. E baze lo sirkonstans ki annan kot sa bann *home*, kot bann kouvan e kot bann orfelina.

Be kot lakour, i en *one to one*. Ouswa, petet parfwa i annan plis ki en benefisyer. So, swen i diferan baze dan lenstitisyon. I annan bann ler. I annan bann diferan keksoz ki zot bezwen fer. Kontribye e travay konman en tim.

Akoz dan bann *home*, nou annan nou 83 *caregivers* ki pe travay an se moman. Enkli tou bann lorfelina e bann lenstitisyon pour zanfann tou. E zot servis i ganny dekrir par sa lenstitisyon li menm. Bann ki ansarz sa bann lenstitisyon.

Me, nou annan bann *training* ki nou fer. Nou'n fek fini fer *training* dan lasemenn la Anse Royale. Nou annan Au Cap ki

nou pe al fer dan *home*.

Donk, i annan sa vatevye konstan. Sa sipervizyon konstan osi kot bann *home*, kot bann lenstitisyon, pour nou asire ki i annan keksoz ki pe ganny fer pour *wellbeing* tou nou bann benefisyer dan bann lenstitisyon osi. Mersi.

MR SPEAKER

Mersi CEO. Bon, nou a bezwen bouze. *Panel*, mon annan 5 Manm ki reste pou demann kestyon lo sa size. Mon pou apresye si zot kapab donn bann repons bref e direk lo kestyon ki ganny demande. Onorab Esparon, ou kestyon?

HON REGINA ESPARON

Mersi Mr speaker. Bonzour nou bann zanfandan Galeri, Minis ek ou delegasyon. Mr Speaker, mon ti ava anvi demann Minis;

Dan ka kot i annan en resipyan pe travay avek 2 dimoun - en *carer* pe travay avek 2 resipyan. Eski zot annan en *incentive* an plis ki zot pe gannye? E si wi, ki kriter ki ganny servi pou determinen konbyen zot gannye?

Dezyenman, CEO in koz lo sa *care plan*. Konmela annou konnen i annan bann dimoun ki pe fer vini zot prop *carer*. Zot ganny zot *GOP* pou fer vini zot *carer*, eski sa *carer*

ki vini anba sa *GOP* i osi tonm anba *Home Care* e i osi i bezwen swiv sa *care plan*? Mersi.

MR SPEAKER

Mersi Onorab. *Panel*, bref silvouple. CEO, Minis, in endike.

CEO HOME CARE AGENCY DANIEL KALLEE

Mersi Mr Speaker. Mersi Onorab pour 2 kestyon. Lo kestyon si en *caregiver* pe travay avek plizyè benefisyer.

Wi, nou annan 22 *caregivers* ki pe travay avek plis ki en benefisyer. E lafason ki nou determin kriter pour nou donn zot sa *allowance* ki R700 pour lemoman, se i annan en *assessment* ki ganny fer lo teren ki kot lakour.

E, i pa otomatik si ou annan 2 benefisyer ou ganny R700. Akoz, si ou pe travay ek 2 benefisyer, petet zot byen, zot kapab marse. I annan serten aktivite ki zot kapab fer.

Me, dan en ka kot ou annan en benefisyer ki *bedridden*, ou annan en lot ki annan en lot kondisyon ki *demanding*, ki ou bezwen donn plis swen, se bann kriter koumsa ki nou servi. Bann kondisyon parey ki nou servi pou nou kapab *allocate* sa *allowance* R700. Ok?

So, *care plan* pour bann etranze. Nou pa ankor rantre dan sa faz travay. Me, dan nou Lalwa i annan sa provizyon pou osi travay avek bann *caregivers* ki prive.

So, an se moman i annan en travay konpreansif pe ganny fer. E an tan zelye, nou pou anmenn zot *onboard*. Zot pou bezwen anrezistre avek lazans. Zot osi zot pou bezwen annan en sertifika ki Lalwa i preski ki determinen pour zot travay pou donn swen. E a se moman la, standar e *care plan* i ava ganny aplike pour bann *caregivers* ki prive. Mersi.

MR SPEAKER

Mersi CEO. Onorab Naidu.

HON SATHYA NAIDU

Bonzour Mr Speaker. Bonzour Minis ek ou delegasyon. Zisteman, kekyon Onorab Labrosse in met lanfaz lo rezis. In plas lanfaz lo eski in annord.

Alors, ki travay ki'n ganny fer par *Home Care Agency* pou met sa rezis annord si in annan okenn travay?

Dezyenmman, lo size sipervizyon, konbyen ka *non-compliance* in annan vizavi *standard guidelines* ki annan pour bann *carer*?

E eski zot annan en *hotline* ki dimoun i kapab itilize pou raport bann ka kot

sa *carer* pa pe donn sa swen ki i merit pe donner vizavi sa resipyan?

Akoz nou konnen poudir *monitoring officers* zot annan serten limitasyon vizavi sipervizyon. E pour fini, zis en propozisyon.

MR SPEAKER

Ok, Onorab mon krwar ou'n lev 3 pwen.

HON SATHYA NAIDU

Mr Speaker, zis en propozisyon. I enportan pour *Home Care Agency*, parey *HFC*. *HFC* in vin devan, zot in fer piblisite lo lafason ki dimoun i kapab ganny akse avek sa fasilite.

Mwan mon santi vizavi *Home Care* osi, i annan bann resipyan ki malerezman zot bezwen pas dan en ta prosedir avan ki zot ganny sa sipor ki *Home Care* i donner.

Mon santi ki malerezman, malgre ki i annan lenformasyon ki pe sorti atraver Lasanble, pa tou dimoun ki ganny sans swiv. E zot manke. E alors, lo sa size i enportan ki i annan en bon *PR Campaign* lo kote *Home Care Agency* pou asire dimoun i ganny ede. Mersi.

MR SPEAKER

Mersi pour ou sizesyon. Minis? *Panel*?

MINISTER MARIE-CELINE ZIALOR

Mersi Mr Speaker. Mon ti anvi zis avan ler mon pas laparol avek *CEO* pou reponn detrwa sa bann kestyon spesifik. Asir Lasanble atraver ou Mr Speaker, sirtou Onorab Naidu.

Ki, sa bann travay kot *Home Care* la. Sa bann travay modernizasyon. Travay profesyonalizasyon i ase nouvo pou komanse li. I en travay ki nou bezwen fer parey taler kestyon in demande lo *train* nou bann *staff* avan.

Apré nou bezwen regarde, re aziste avek sistenm. Avek tou larestan lazans konsernen tou. So i en travay ki pe ganny fer anmezir nou ale. I pa ankor fini ganny fer. Mon krwar mon mazine *CEO* i ava dakor avek mwan. Prezan nou a pe ganny li byen.

E sirtou sa bann *survey* ki mon'n dir dan mon larepons se, atraver sa bann *survey* la, ki prezan sa bann lenformasyon ki vini nou komans aziste.

Apré nou osi nou bezwen al rod en pe *expertise*. Nou pa neseserman annan tou sa kapasite entern pour nou konnen egzakteman letan nou pe bouz dan modernite ki mannyer nou pou al fer.

E mon dakor ek Onorab Naidu Mr Speaker, *PR Campaign* ledikasyon i enn

parmi bann ki lo nou azanda pour nou kapab al fer li byen. E avek ou permisyon Mr Speaker, petet *CEO* i ava zis tous lo 2 pti detay ki mon'n manke. Mersi.

MR SPEAKER

Mersi.

CEO HOME CARE AGENCY DANIEL KALLEE

Mersi Minis. Mersi Mr Speaker. Mersi Onorab, pour ou lentervansyon, pour ou presizyon.

Lo kote kantite konplent ki nou pe kolekte toulezour. Akoz ler ou pe dil ek 3mil ekek benefisyer dan en zournen, dan en - distrik ki annan plis pli kantite benefisyer se Anse aux Pins avek 184. Pli pti gin se Perseverance avek 41.

Nou annan nou tou sa bann distrik e nou annan nou en lekip *monitoring officers* ki annan 11 ki lo teren. Apré nou annan son direkter. So, baze lo konplent ki nou gannye, nou pran bann ka vit. Pli vit posib nou azir, nou ale.

Me, parfwa pa toultan ki nou kapab al vites ki nou ti ava anvi ale. Me, i en konsern dan nou fason travay pour nou asire ki benefisyer pa ganny abize. E *carer* pe vin travay, i pa absante.

E mon ti ava profit lokazyon pou remersye nou bann zabitan dan distrik.

Lotorite Distrik osi. Nou bann manm fanmir ki raporte, ki fer presizyon annandler lo serten latitud dan travay ki pa korek. So, sa i ganny adrese vitman.

Mon pou dakor - 100poursan dakor avek ou. E parey Minis in dir. Kot nou'n sorti, kot nou'n arive, i annan en travay in ganny fer. Me an se moman, en *unit* ki pa ti egziste dan *Home Care* ki nou pe met an plas la dan sa letan, se *Customer Care Service*.

Nou annan nou en *Principal Liaison Officer* ki'n fek ganny apwente. E tre byento, avek en *campagne* medya. *Ce matin* mon'n fek fini fer en *interview* pou konmans sa *campagne* - Nou pe vini pou donn tou lenformasyon nou popilasyon lor okenn size ki annan pou fer avek sa kominikasyon, sa bon lantant.

E se sa ki nou ti manke dan lazans ler nou'n konmanse. Nou'n met lanfaz lo *registration*. Lo *monitoring*. *But now the Customer Care Service* pe rantre. E mon konvenki ki servis pou amelyore. Pou annan sa laliny telefonn *helpline*.

Me en keksoz ki nou'n deza enplimante se ki dan wikenn, nou annan zofisye ki lo *standby*. E menm si i annan – dan konze piblik osi. Menm si i annan serten konplent, serten rapor pou fer. Sa i ganny fer e vizit i kontinyen.

Menm dan bann letan kot dan wikenn e dan konze.

So, i determinasyon lazans pour nou kontinyen ofer en swen a o nivo. E ankorenn fwa, sa proses ki nou ladan i ava anmenn nou dan sa bon direksyon. Mersi Onorab.

MR SPEAKER

Mersi *CEO*. Onorab Monthy.

HON PHILIP MONTHY

Mersi Mr Speaker. Mr Speaker, mon kestyon fek ganny reponn par *CEO* konsernan sa Seksyon *Customer Care* ki ti en *lapse* ki mon mazine ti manke kot zot. Mersi bokou.

MR SPEAKER

Mersi. Nou a pas lo lot kestyon. Onorab Porice?

HON DOYACE PORICE

Mersi Mr Speaker. Mr Speaker, Minis ek ou delegasyon, tou mon bann koleg *MNAs* e bann etidyan dan *Gallery*, bonzour.

Minis, mon konnen dan lepase ti annan bann *supervisor* ki ti pas dan distrik pou get bann *carer*.

Eski zot pe mazin entrodwir ankore sa bann *supervisor*? Si wi, eski zot in deza pe entrodwir? Si wi, konbyen ki annan zot? Mersi.

MR SPEAKER

Mersi. *CEO*?

**CEO HOME CARE AGENCY
DANIEL KALLEE**

Mersi Onorab. Mr Speaker. Mersi Onorab. Ler nou pe koz *supervisor*, se nou bann *monitoring officers* ki lo teren.

So, an se moman, nou annan 12 dan sa lekip avek bokou negosyasyon. Mon kontan Gouvernman in reisi aprouv met zot lo *payroll* dan nou lazans. E dan sa 11, i annan 2 Praslin ki kouver La Digue, Baie Ste Anne e Grand Anse. E larestan i isi.

Me dan ka kot zot bezwen zwenn ansanm konman en tim pou al fer serten travay spesifik dan serten distrik, sa osi i en fason fer. I en fason travay ki nou organize kot lazans pour nou kouver en pli gran kantite nou bann benefisyer ki bezwen plis sipervizyon.

Nou ti ava anvi annan en *monitoring officer* dan sak distrik. Me selman mon krwar nou lo sa bon semen. Me ler i ava annan ase finans avek Bidze, nou ava kapab rantre dan sa direksyon pour nou kapab *ensure* en pli gran kontrol e sipervizyon lo *wellbeing* nou bann benefisyer. Mersi Onorab.

MR SPEAKER

Mersi *CEO*. Onorab Roucou?

HON MICHEL ROUCOU

Mersi Mr Speaker. Bonzour Minis. Bonzour tou dimoun ki pe ekout nou. Minis, an vi ki nou war poudir i annan en demann. Konmela a nou konnen poudir *carer* i annan 2 fason ki zot bann ler travay. I annan ki travay *half day*. I annan ki travay *full day*.

I dan bann lenstans kot bann resipyan pe demande ki zot ganny sa servis pour *full day*, nou war poudir i pran sitan bokou letan pour zot kapab ganny sa. Ki ou departman pe fer lo sa size pour zot kapab adres sa? Mersi.

MR SPEAKER

Mersi.

**CEO HOME CARE AGENCY
DANIEL KALLEE**

Mersi Onorab. Mersi Mr Speaker. Lo kestryon sorti *half day* pou al lo *full day*, i en prosedir ankor ki egziste ki nou bezwen swiv.

Nou pou bezwen refer en *Barthel assessment*. En *assessment* medikal. E baze lo sa *assessment* medikal, se la kot sa benefisyer i kapab ganny sa ogmantasyon dan bann ler ki sa *caregiver* pe donn li servis. Be solman, zot pou bezwen onnet. Zot pou bezwen senser dan sa demann.

E sa ki nou, nou pe vwar kot lazans se ki bokou nou dan nou popilasyon zot war servis swen kot lakour koman en fason pou ganny larzan. Alors, si zot anvi donn larzan en manm fanmir, zot pou fer tou sa ki zot kapab pou ganny sa lasistans.

Me i annan en prosedir enportan pour bann ki senser ki vre ki bezwen servi sa servis pou vin *full day*, nou bezwen refer sa *assessment*. I annan sa *means testing* i bezwen reganny fer kot lakour. Sa ka i ganny *reassessed*. E se la kot sa dimoun i sorti lo sa *half day* pour li mont lo sa *full day*.

Me *basically* i pou bezwen sa *medical assessment* ki kot klinik, kot dokter avek kot ners. Mersi.

MR SPEAKER

Mersi *CEO*. Fer en klarifikasyon vitman si ou annan Onorab. Nou'n pas en kantite letan lo sa size. Wi?

HON MICHEL ROUCOU

Be selman *CEO*, si ou kapab dir nou kantite letan i pran? Akoz souvandfwa nou war i pran sitan bokou letan ki aprezan sa resipyan petet li son sityasyon i degrade. Mersi.

MR SPEAKER

CEO, bref silvouple.

CEO HOME CARE AGENCY DANIEL KALLEE

Avek prosedir ki an plas, nou le fer tou nou posib pour nou kapab pran 1 semenn a 2 semenn. 14 zour.

Me selman parfwa ou konnen Onorab, nou dimoun i zis zot pa war nesesite pou anmenn tou bann dokiman ki enportan. Parfwa, menm si ou pe donn zot en lalis dokiman ki zot bezwen anmenn e re anmenn.

Par egzantp si ou pe fer en *mean testing*, ou bezwen reget ankor *income* kot lakour. Donk, sa bann dokiman ki met nou retar. E parfwa, dan bann kondisyon ki vreman kritik, nou les sa – nou fer sa *carer* konmans travay. Apre, ziska prosedir i fini rantre dan sistenm.

Me sa i pou baze lo sa *assessment*. E parfwa mwan menm konman *CEO*, dan bann ka koumsa nou al fer vizit avek bann zofisye pour nou vreman war lilitite e bezwen. E keksoz i ganny fer pou amelyor sityasyon. Mersi Onorab.

MR SPEAKER

Mersi. Nou a pas lo prosen kestyon e sa se limero 81 dan non Onorab Samynadin.

HON KELLY SAMYNADIN

Mersi Mr Speaker. Bonzour Minis, *PS* e *CEO*. Bann envite

dan Galeri, tou dimoun a lekout. Kestyon 81 i konm swivan;

Eski Minis i kapab dir avek Lasanble kan ki proze renovasyon *Old People's Home*, Au Cap i ekspekte konplete? Mersi.

MR SPEAKER

Mersi Onorab. Minis ek *panel*, wi?

MINISTER MARIE-CELINE ZIALOR

Mersi Mr Speaker. Proze Renovasyon lo Lakour bann Dimoun Aze Au Cap ti konmanse Mr Speaker, an Mars 2024. E dapre *scope* orizinal, travay ti'n sipoze fini konplete.

Me akòz sa i en renovasyon mazer ki premye fwa i pe ganny fer lo sa rezidan, Departman Lafanmir in deside sezi sa loportinite pou fer ki sa renovasyon i ankadre bann standar enternasyonal. Sa ki nou apel *Universal Design* Mr Speaker.

Pour ki sa fasilite pa zis selman modern. Me osi, parey nou dir an Angle, *elderly* e *disabled friendly*. E ki pa ti dan *scope* orizinal oparavan.

E Mr Speaker, i reste ankor en pe travay pou fer. *SIA* in endik nou ki kontrakter in fek retourn lo *site* la e zot bezwen omwen – omwen, si

tou keksoz i al byen, apepre 6 semenn Mr Speaker. Mersi.

MR SPEAKER

Mersi. Onorab Samynadin, siplemanter?

HON KELLY SAMYNADIN

Mersi *Minister*, pour ou larepons. Minis, nou vreman apresye ki apre plizyer lannen parey ou'n mansyonnen, ki sa *home* in dan labandon mon kapab dir, an sa ki konsern *maintenance*. Finalman travay renovasyon mazer in kapab ganny konplete. In kapab ganny fer.

Ou'n mansyonnen dan ou larepons anba renovasyon ki zot pe fer li *elderly, disabled friendly*. Si ou kapab donn nou en pti pe leksplikasyon lo la.

Apre mon ti ava kontan konnen an term sekirite. Anvi ki dan lepase in annan plizyer bann ka vol e kot *intruders* in antre dan *home* san permisyon pou vin kot bann rezidan ;

Eski ou Minister i kapab dir nou ki mezir zot pe mazin met an plas pou asire ki bann rezidan sa *home* i reste an sekirite a tou moman? Mersi.

MR SPEAKER

Mersi Onorab. *PS*, pou pran laparol.

PS FAMILY DEPARTMENT MIKE MOREL

Mr Speaker, mersi. Bonzour Mr Speaker, tou Manm Onorab.

Premyerman, zis en pti pe leksplikasyon lo *disabled friendly* ki nou pe koz lo la. Par egzanp; ti napa en *ramp* kot pou lasanm. Sa i enn bann louvraz ki reste pour nou fer. Nou pe fer akse en pti pe pli meyer. Nou pe fer bann lasanmben.

I pli fasil pour en dimoun antre dan, par egzanp si in al dan *wheelchair*. Kot i pa bezwen antre dan sa basen pour li pran son ben. Kot la prezan i kapab antre direktman dan en *wheelchair*. Menm si bann dimoun aze osi pa bezwen sot en pti bout.

Nou konnen ler laz i antre, parfwa nou ganny en pti pe konplikasyon medikal. Nou fer li pli fasil. Tousala. Nou pe met bann *ramps*. Nou pe met bann – pou tenir. Pou annan sipor. Sirtou dan *toilet*. E se sa bann amelyorasyon ki nou'n fer ki konser *elderly and disabled friendly*.

Lo kote sekirite, ankorenn bann rezon ki travay pa'n terminen se ki akòz dan sa ki reste pou fer nou pe servi en bout lofis pour nou *convert* li konman en *security post* zis o bor larantre.

E savedir plan se pou met en sekirite la pou kontrol en pe lekel ki antre. Ki zot

bann zabitan i viv en lavi ki napa okenn bann *disturbance*. Mersi Mr Speaker.

MR SPEAKER

Ale, Onorab Samynadin, ki ou le klarifye?

HON KELLY SAMYNADIN

Mr Speaker, zis en dernyen pti klarifikasyon ki'n sap mwan, vi ki *scope* proze in elarzi, petet kan ki zot pe mazin terminen konpletman avek sa proze? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mon krwar dan mon larepons orizinal kekfw petet Onorab pa'n tande Mr Speaker.

SIA pe dir ek nou sa kontrakter in dir apepre 6 semenn. Si tou keksoz i al byen sa. 6 semenn. Mersi Mr Speaker.

MR SPEAKER

Thank you. Mon ava avans lo lezot Manm. Onorab Esparon?

HON REGINA ESPARON

Mersi Mr Speaker. Minis, mon ti ava kontan konnen si parey dan sa program regilye, si zot annan en program regilye lo *maintenance* bann *Regional Home for the Elderly*?

E parey sa *scope* ki zot pe fer avek Au Cap la, pou fer li *disabled friendly*, si zot pe osi mazin en a lavenir pou fer lezot *Regional Home disabled friendly* osi? Mersi.

PS FAMILY DEPARTMENT
MIKE MOREL

Onorab, mersi. Wi, i bann leson ki nou'n aprann Au Cap. E dan tou bann lezot renovasyon ki nou pou fer – renovasyon mazer, nou pou enkli bann leson ki nou'n aprann.

E si i annan lezot keksoz osi ki antre nouvo, nou fer sir ki nou met li ladan. Nou profite. Mersi Onorab.

MR SPEAKER

Mersi. Wi, mon dir mon remarke nou pe zeneralize en pe. Annou sey gard keston lo size Au Cap. Me selman zot kapab pran legzanp Au Cap pou permet en lot keston en pe pli zeneral. Onorab Loizeau, ou keston?

HON NORBERT LOIZEAU

Mersi Mr Speaker. Bonzour Minis, ek ou delegasyon. Mr Speaker, mwan mon keston i relye avek pli boner ki mon'n sey demande.

Oparavan, avan Gouvernman LDS in vin o puvwar, ti annan en konversasyon *in regards to* prive pou antre dan sa biznes

lakaz dimoun aze. Kot posibilite ti pou annan bann alokasyon later kot zot, zot pou *build*. E zot pou administre sa.

Vi ki nou nouvo Gouvernman in antre, nou konnen ki Gouvernman i annan sa kontinite dan travay en lot, ki zistans sa konversasyon in arive kot petet i a kapab tir en pe presyon lo Gouvernman e nou a met sa en pe dan lanmen prive? Mersi.

MR SPEAKER

Mersi. Minis?

PS FAMILY DEPARTMENT
MIKE MOREL

Mersi Mr Speaker. Onorab, wi, an se moman konmansman lannen menm, konversasyon nou'n fer avek SIB akòz i ti'n anba zot pou annan sa PPP. En *Public Private Partnership*.

E diskisyon i pe kontinyelman deroule. Nou konnen poudir i annan en bout later ki'n deza *earmark*. I zis ki osi nou pe ansanm avek SIB nou, nou bout se nou pe travay en pti pe avek zot pou donn en – pou met serten regilasyon or serten *standing operating procedures* an plas, pour ki i vin en zafer ki i annan en standar ler i lanse. E diskisyon i an se moman pe deroule lo sa topik, Onorab.

MR SPEAKER

Mersi. Onorab William?

HON WAVEN WILLIAM

Mersi Mr Speaker. Mr Speaker, mon kestyon in ganny *partly* demande par Onorab Loizeau. Be selman Minis, mon pe zis anvi demande, par lefe ki avan ti annan sanzman Gouvernman, ti annan en plan pou annan en *Home Care* –

Non, non. En *home* pour bann vye dimoun ganny fer Grand Anse Mahe. Si ti'n fini ganny idantifye, mon anvi konnen si sa rikord i ankòr la ouswa sa rikord in ganny detri? E kan ki Grand Anse Mahe nou ekspekte ganny en *Home Care*?

Epi, Mr Speaker, si ou permet mwan. Sa sant Anse Boileau i ti sipoze *regional*. Me eski i ankòr *regional*, akòz zanmen zot demann nou si Grand Anse Mahe nou annan dimoun pou anvoy laba. Mon pa konnen si i sorti zis Anse Boileau. Mersi.

MR SPEAKER

Minis?

MINISTER MARIE-CELINE ZIALOR

Mersi Mr Speaker. Mr Speaker, si i annan plan pour *elderly home* pour Grand Anse, i pa kot Departman Lafanmir. Mon mazine petet i

ava kot *MLH* kot sa plan. Me selman i annan demann pou annan *elderly home* en pti pe partou.

Nou dernyen plan ki nou annan se pou fer enn Perseverance. Ouswa enn en pe pli gran ki en pe pli modern kot nou kapab osi tou re regard lafason ki mannyer nou pe *manage* tousala.

Ou konnen demann, enkli pour *Home Care carer*. Demann pour *elderly home* toulezour i kontinyelman monte. Kontinyelman ogmante. E nou pa pou kapab parey menm stratezi, menm model. I pa soutenab sa.

Nou pou bezwen – sanmenm sa ki travay ki tou lede bann lazans ki'n la asiz lo sa latab ozordi Mr Speaker. Nou pe bezwen anmezir nou a pe rezourd bann problem toulezour, nou pe bezwen osi tou regarde *medium term* a lonterm ki mannyer nou fer fas avek tousala.

Nou annan en popilasyon ki kontinyelman vyei. Ki kontinyelman malad. E i tonm lo Gouvernman en kantite. E nou en pti pe nou defi se ki nou bann lorganizasyon departman ensi ki lazans, in depas nou en pe lakantite demann ki pe vini. Nou *overwhelmed* en kantite.

E i pa fasil. Sanmenm sa bann kestyon ki nou pe demande parfwa i tarde

prosedir, ensidswit. I zis ki i annan en kantite nou pe cope avek. Toulezour demann i vini. E lafason ki mannyer bann dimoun i fer demann dan *home*, i pa vin atraver nou, nou al demann zot ki zot bezwen.

I riske kantmenm, wi, Grand Anse i ava annan demen *elderly home* i pa zabitan Grand Anse. Akoz kekfw bann zabitan Grand Anse zot bann zanfán, bann fanmir i pran swen avek zot bann dimoun aze. I tou depan lo bezwen.

E se sa ki nou anvi osi tou modernize Mr Speaker, ki nou bann lakaz nou bann dimoun aze i pou baze lo sa swen ki zot bezwen. Akoz pour lemoman, sa bann ki nou annan la, en pe tou dimoun i al dan tou sa bann *home*.

Sa ki Sesel i bezwen se en bon *nursing home* par egzanp. En *nursing home* ki nenport ki landrwa kot ou reste, ou ava kapab ale si ou napa en landrwa reste. Me ou laz i avanse e ou bezwen en *nursing home*.

E apre bann larestan *elderly home* i ava aprezan petet sakenn annan son spesifisite pa neserman vin en keksoz rezyonal.

Me selman sa bann diskisyon nou ankor pe fer ansanm avek *Home Care* pour nou regarde, prezant en plan

devan *Cabinet* byento, pour nou met bann finansman neser pou fer li lonterm. Mon pa konnen si mon'n reponn son kestyon Mr Speaker. Mersi.

MR SPEAKER

Mersi. I a bezwen satisfé, aköz sa i vreman en pe pli larz ki size ki'n ganny leve orizinalman. Mersi, nou a pas lo prosen kestyon e sa se 83, Onorab Regina Esparon.

HON REGINA ESPARON

Mersi Mr Speaker. Eski Minis i kapab dir Lasanble, ki plan son Minister pou annan lozman tanporer pour viktim vyolans domestik? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mersi Onorab, pour ou kestyon. Departman Lafanmir an se moman, napa.

Napa en lozman tanporer pour viktim vyolans domestik. Me departman pe fer demars avek Minister responsab pour Later, ki'n idantifye en landrwa ki deza annan serten lenfrastruktir lo la. Mon krwar nou'n deza koz lo la dan Lasanble.

E pou kapab konverti sa landrwa konman en lozman

pour bann viktim vyolans domestik. Prosedir i deza an plas e Bidze i deza la pou konmans fer reparasyon lo sa landrwa.

En komite ki konpri tou lazans ki travay avek viktim vyolans domestik, tel par egzanp; lapolis, Sosyal, in ganny etabli pou determin pli bon fason pou zer sa letablisman. E ki model apropiye osi ki ava kapab soutenir li dan en fason apropiye e lonterm.

E o moman ki sa i fini ganny fer, i pou bezwen annan en proze pilot pou teste sa model avan ki sa fasilite i ganny met a dispozisyon piblik. Mersi Mr Speaker.

MR SPEAKER

Mersi Minis. Ou siplemanter Onorab Esparon?

HON REGINA ESPARON

Mersi Mr Speaker. Minis, petet ou ti kapab dir nou, sa landrwa tanporer ki i anba renovasyon, i kapasite pou konbyen viktim? E kan ou pe mazine kekfw ki i kapab antre an operasyon?

E dezyenmman, eski ou satisfè ki annan sa sinerzi ant ou Minister avek Minister Sosyal, anvi ki sa Lalwa *Domestic Violence* i tonm anba *custodian* ou Minister?

Ki mannyer sa partenarya pe marse? Eski ou

satisfè ki i annan sa partenarya ant sa 2 Minister an sa ki konsern *domestic violence*, e met sa plan ou sa model progresiv devan pour sa *shelter*? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pou reponn sa dernyen keston e sa 2 lezot mon ava, avek ou permisyon, pas laparol PS Morel pou reponn.

Sinerzi wi i annan. Nou'n fer bokou, bokou diskisyon. En kantite *meeting*. En kantite diskisyon akòz zisteman pour nou rode – wi sa Lalwa i tonm kot Departman Lafanmir. E lenplimantasyon normalman par egzanp, tou bann viktim i pa Departman Lafanmir li.

Me, avek – nou konnen Sesel i pti, pti avek zis en pti gin resous ki nou annan ek bann dimoun. Nou pe diskite egzaktman pour nou konnen ki pli bon-

Ler mon dir model zesyon. Pou regarde egzaktman anba ki departman i pou tonbe lo kote sa bann viktim. E lamazorite bann landrwa napa kapasite. Nou bezwen pe devlop kapasite.

Pour lemoman, i ankòr avek Departman Lafanmir e

nou bezwen pe travay. E sa bann fason travay i ase nouvo aköz nou osi an term ekspertiz, i annan en pe *training* ki'n ganny pou ganny *expertise* pou rode ki pli bon fason modern pour nou fer fas avek sityasyon.

Par egzanp mon a donn ou en senp legzanp se ki, nou pe konmans demann sa kestyon. Be aköz nou bezwen tir viktim? Aköz nou pa tir sa *perpetrator* la? Aköz sa viktim i bezwen kit se li pour li ale. E laplipar ditan se bann madanm avek zanfan, ki vin en lot konplikasyon ankor letan ou pe koz lo fer *domestic shelter*.

E dapre bann resers, dapre bann leksperyans annan *domestic shelter* oparavan, i vin en lot problem sosyal parfwa letan ou pa fer li byen. So, sinerzi wi, nou'n konmanse la mon krwar PS i ava elabore.

Nou'n konmans koze. Konmans fer bann konversasyon pour nou vwar ki mannyer nou amelyore. Nou pa ankor tro byen satisfè. Me selman i pou vini.

Aküz ou konnen letan ou annan ou apepre 5,6 diferan lazans ki tonm anba diferan Minister. Pou travay ansanm i pa touzour fasil. Menm pour ou ganny par ler en letan pour ou zwenn, pour ou kapab-

Aküz tou dimoun pe tay avek 100 keksoz alafwa. Me selman nou konnen poudir sa in lo latap pour en pe letan. Me selman nou anvi, mon ti a zis kontan fer Lasanble konnen. Nou anvi fer en keksoz byen.

A pran en keksoz ki reflekte bann letid e bann fason fer modern ki pli bon pour nou bann dimoun. Mr Speaker, avek ou permisyon, mon ti a kontan pas laparol avek PS Morel pour sa 2 lezot kestyon. Mersi.

MR SPEAKER

Mersi. PS Morel, wi.

PS FAMILY DEPARTMENT **MIKE MOREL**

Mersi Mr Speaker. Mersi Minis. Onorab, pou reponn kan pou konmanse e si pou konmanse sa lannen.

I pou tou determin lo ler nou bann *meeting* ki nou pe zwenn avek nou bann *partners*. An se moman nou'n deza annan premye *draft* nou plan operasyon ki mannyer pou ete. Nou pou prezant ek zot sa semenn.

E apre sa la nou a kapab vwar ki mannyer nou bouz devan avek. Si i annan okenn amelyorasyon ki nou bezwen fer pour sa premye plan.

An menm tan nou pe travay tre pres avek SIA, pour ki ler nou nou'n pare avek nou plan, i konkret, zot osi zot

pou'n pare pour sa bout lenfrastriktir. Kapasite i pou determin apre ki nou plan loperasyon in konfirman.

Eski i annan sinerzi? Wi. Nou fer bokou rankont. Parey Minis in dir, i annan en amelyorasyon ki nou devret pe fer. E se sa nou pe travay pros avek bann lazans konsernen.

I enportan pou note ki enterpretasyon okenn bout Lalwa oubyen okenn regilasyon, sak dimoun parfwa i pran li dan son fason.

E se sa akòz ki nou bezwen tanzantan pe revwar, pe rezwenn ansanm, pour nou fer sir ki tou dimoun i lo menm *level*, parey nou dir. E mon krwar mon'n reponn ou bann kestyon Onorab. Mersi.

MR SPEAKER

Mersi. Mersi PS. Onorab Labonte?

HON ANDY LABONTE

Mersi Mr Speaker. Minis, mon kontan ler ou'n dir pou dir – akòz mon kestyon ti pou demande petet si pa ti pou pli fasil retir sa abizer, akòz li ki pe kree sa problem.

Me petet mon kestyon ki mon ti a kontan demande la; eski i annan en logmantasyon dan vyolans domestik atraver pei, si ou annan sa statistik avek ou? E ki rekour bann viktim i annan la imedyat ler

sa bann tel lensidan pe arive? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mersi Onorab, pour ou kestyon. Statistik Vyolans Domestik i pa zis kot Departman Lafanmir. Normalman i ganny raporte ek lapolis ouswa ek Sosyal. Apre i bezwen tou fason ganny anmase avek lapolis.

Nou sa ki nou gannye se bann dimoun ki vin fer *counselling* akòz kot nou i pa landrwa santral pou vin raporte. Me nou annan ki PS i a regarde si i annan statistik la.

Lakantite bann kliyan ki vini zot, zot vin fer *counselling* akòz zot in en viktim vyolans domestik. Kekfwa petet sa Mr Speaker, mon a pas laparol avek PS pour li reponn.

MR SPEAKER

Tre byen. PS?

PS FAMILY DEPARTMENT MIKE MOREL

Mersi Mr Speaker. Wi, nou kapab donn ou bann ka ki'n vin devan kot Departman Lafanmir.

2023 total ti 45. E lamazorite ti bann madanm. 42 madanm e 3 msye.

2024 i monte i ariv 67. 4 msye avek 63 madanm.

E 2025 ziska semenn pase - Zanyve ziska semenn pase ti annan 15. Tousala i bann madanm.

E petet zis pou fer en pti – met lanfaz en pti pe. Zis mon pou donn zot en legzanp. Par egzanp 2024 dan sa 67 ka - 67 ka i annan 45 ka ki nou dir sa i en sikse.

Savedir swa zot in separe dan sa relasyon. Oubyen i annan *counselling* ki'n ganny fer ant le de *partner* kot zot in retourn ansanm. E ladan i annan bann ka ki *unfortunately* i pa'n *successful*.

Sa i souvandfwa arive kot sa kliyan li menm, sa dimoun li menm i aret vini nou bann sesyon ki nou, nou donnen lo kote *counselling* avek psikoterapi. Mersi.

MR SPEAKER

Mersi. Mersi PS. Nou'n ariv pre letan ki nou pran poz. Me selman, i reste mwan 1 kestyon dan sa seri ki pour sa *panel*.

Mon krwar mon a prefere pous letan en pti pe pour nou terminen avek sa *panel* pou permet zot al fer lezot keksoz. Alor nou a pran kestyon 84 la, Onorab Esparon.

HON REGINA ESPARON

Mersi Mr Speaker. Eski Minis i kapab dir Lasanble ki kalite kanpanny aktiv e vigoure ki son Minister pe anvizaze fer dan limedya, pou dekouraz bann kiltir vyolans parmi zanfan Lekol e dan lakominote? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pour ou kestyon. Mr Speaker, nou Minister i deza angaze pou fer *campagne* Sansibilizasyon ek Prevansyon kont Vyolans. Espesyalman parmi bann zanfan lekol.

Tou le 25 le mwan nou obzerv Kanpanny ki nou apel *Orange Day* dan diferan lekol pou ed zanfan konpran kwa sa vyolans domestik. Rekonnet son lenpak e konpran bann diferan fason pour zot kapab evite e pour zot osi protez zot lekor.

Nou'n osi met an plas diferan latelye sesyon edikasyonnel ki vize a ranforsi sa mesaz kont vyolans.

Pou sit enn de legzanp; Program *Peace Ambassadors*. Program vakans Pran Swen Avek Lezot. E Program *Red Flags*.

E parmi bann lekol ki'n benefisye ek sa bann program i enkli; Pointe Larue Segonder, Lekol Primer Bel Ombre, Lekol Segonder Beau Vallon, Lekol Beau Vallon. Lekol Primer ek Segonder La Digue, ek Lekol Primer Baie Lazare.

Nou osi pe travay avek nou bann paran ki premye edikater nou bann zanfan. Kot la nou pe ekip zot avek bann bagaz pou edik bann zanfan pou vin pli responsab dan zot fanmir e kominote. Nou koz lo bann topik ki pou anpes sa sitasyon vyolans. Sirtou vyolans domestik.

Pou permet annan en pli bon lenplimantasyon pour bann aktivite vizavi nou bann zanfan, nou'n osi koz avek bann administrater lekol segonder lo konfli. Ki mannyer ou rezoli konfli san vyolans. Lo sanzman dan latitud nou bann zenn ek fason pou fer fas avek *bullying*.

Pou anplifye lo nou bann Program Prevansyon ki deza egziste, nou osi aktivman met lanfaz lo diferan lantrennman pour zanfan atraver nou bann partener parey *SIFCO*. E atraver kolaborasyon avek bann dimoun aze.

Dan kominote, nou fer Kanpanny Sansibilizasyon e Prevansyon an partenarya avek lezot lazans ek lorganizasyon. E pour

lemoman, nou pe servi bann *platform* parey medya e medya sosyal. E osi nou pe desantraliz nou bann aktivite pou anmenn li lo nivo rezyonal.

Sa i konpri bann aktivite parey *Orange Day* tou le 25 mwan, ki mon'n fek mansyonnen. Aktivite 16 zour aktivis pou dekouraz vyolans kont fanm.

E depi le 25 ziske le 10 Desanm, apard sa nou osi fer bann *Roadshow* ki souvandfwa koensid avek bann zournen enternasyonal ki permet nou pou vin pli pre avek piblik an zeneral. Kot nou pas bann mesaz ki souvandfwa relye en pe plis avek vyolans domestik ki pase dan bann fanmir.

Nou pe mazin fer program pli konpreansiv pour bann zenn ansanm avek lezot partner, pou promouvwar plis lape. Nou bann kominote - aköz nou krwar si nou met tou nou zefor ouswa laplipar nou zefor lo nou bann zenn ek bann zanfan, nou pou annan plis sikse pour nou ede transform lasosyete pou redwir vyolans dan pei. Mersi Mr Speaker.

MR SPEAKER

Mersi Minis. Wi, Onorab Esparon, ou siplemanter?

HON REGINA ESPARON

Mersi Mr Speaker. Mr Speaker, eski Minis i kapab dir nou si dan sa bann program ki in met devan nou, *NCC* i osi *onboard* avek zot dan sa program, i osi azour kwa ki pe ganny fer?

Epi si zot annan en Program *After care* pour sa bann zanfan ki pas atraver sa bann sityasyon *bullying*, sirtou bann zanfan lekol? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pou reponn sa premye kestyon, apre mon a pas laparol avek *PS* pou reponn larestan.

Wi, *NCC* definitivman. E *NCC* i annan depi 2 an pase en program entansif avek *parenting* ki i pe fer dan bann distrik. E la i telman annan sikse ki bann lakonpanyen prive pe demann *NCC*. E la zot annan bokou plis demann ki zot kapab fer fas avek. E zot pe fer bokou, bokou travay osi avek bann diferan lekol.

E malerezman mon bezwen dir sa, profite konman mon Lasanble Mr Speaker, pou dir; parfwa nou bann paran ki nou bezwen plis, zot pa vini. E letan par ler ou'n deplase-

Parey mon konnen *NCC* ti pe dan rezyon was sid, ti a pe met en pe lanfaz lo la, dapre demann bann lekol, letan nou'n ale e ou ale par ler i annan zis en paran ki vini, ouswa person pa vini, dapre apwentman ki nou'n donnen pour nou kapab ede. Se sa par ler bann defi.

Me selman nou pa bes lebra e nou kontinyen. *NCC* i *involved* en kantite. *SNYC* osi tou. Enkli tou nou bann larestan partener. Swa dan Minister. Swa an deor. E avek ou permisyon Mr Speaker, mon a pas laparol avek *PS* pou reponn sa 2 kestyon lezot avan. Mersi.

MR SPEAKER

Mersi. *PS*?

PS FAMILY DEPARTMENT MIKE MOREL

Mersi Mr Speaker. Onorab, wi, souvandfwa dan nou bann aktivite ki nou fer, sirtou kot lekol, si nou santi oubyen nou apersewar ki i annan bann zanfan ki bezwen bann latansyon en pti pe pli spesyalize, nou annan nou *Unit Counselling and Psychotherapy* ki nou refer zot avek pou ganny en pe *counselling*, en pe *mentoring*.

An menm tan, nou travay etrwatman osi par egzanp seksyon kot ledikasyon ki travay en pe avek zanfan an

regar pour *counselling* e tou sa.

So nou, nou vwar si lo nou kote nou santi nou kapab donn sipor atraver laprouvasyon zot paran, byensir. Oubyen si nou ekspedye bann *case* koumsa avek lezot nou bann *partners*. Yes. Mersi.

MR SPEAKER

Mersi PS. Onorab Labrosse, ou kestyon.

HON RICHARD LABROSSE

Mersi Mr Speaker. Minis, mon'n tann ou donn bokou lenformasyon la. Me selman en keksoz ki mon pa pe tro konfortab avek la parmi tou sa bann travay ki zot pe fer, ou Minister pe fer. Ou'n dir en keksoz ki i annan paran annandler ki ou bezwen zot ou pa war zot.

E mon santi sa kot lekòl osi Mr Speaker, i pe afekte osi bann lezot bann zanfan osi ki pe vin lekòl pou vin aprann, parey nou dir.

Minis, be eski la ler nou pe koze la, espesyalman Departman Lafanmir, ki bann travay ki i annan – en pti pe travay pli serye la nou pe koze. Oubyen kekfwà en *guidelines* oubyen en Polisi, ki nou bezwen kapab *tackle* sa bann paran parey.

Parske parey mon pe dir ou, Gouvernman i kapab fer

tou son byen. Me selman si nou pa pe ganny sipor sa lot kote ki pli enportan, napa naryen ki pou marse. Nou pou war nou pe zis pe koz lo la tou lazournen.

So, la mon ti a kontan konnen direktteman Mr Speaker, ki bann travay ki i annan serye ater la pour nou kapab *tackle* sa bann paran ki parfwà i donn difikilte pou vin devan? Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mersi Onorab, pour ou konsern. Kestyon mon krwar i tre valid. Lo kote pran aksyon ek paran, sa i Sosyal. Akoz i annan Tribinal Lafanmir, i annan Probasyon, i annan bann larestan landrwa ki pa tonm kot Departman Lafanmir.

Nou, nou louvraz nou se prevansyon. Se ledikasyon. Se anpese ki nou bann zenn paran ki pe monte i repet ankor sa sik pour ki apre Departman Sosyal li i kontinyen vwar son statistik pe ogmante. Sa i nou bout sa.

Nou, nou bezwen ranforsi en pti pe plis. E travay ki nou, nou bezwen fer se desantralizasyon. Al en pti pe pli pre ver sa bann paran. E petet osi, rod lot fason, rod

model ki mannyer nou – sa nou bezwen fer.

Lo kote pran aksyon, mon mazine ou pe mazin aksyon swa legal, swa lot aksyon sosyal. Sa pa nou ziridiksyon. Nou, nou plito travay lo prevansyon e travay lo pour nou pa repet sa bann menm senaryo ki nou pe vwar la.

Par egzanp nou'n travay – nou'n fer sesyon lannen pase avek tou lekòl pos segonder. Nou'n fer ek tou pou fer ki zot konmans, parey nou dir an Kreol, pwente. Zot konmans rod *boyfriend*, *girlfriend*. Konmans mazine apre byento, 18, 19 an fer fanmir.

Nou rod la pour nou redwir vyolans. Nou apel *dating violence* kot nou'n fer bann *Red Flags* avek zot pour zot vwar e pou bezwen war la deza poudir ler zot pe konmans la pe *date* pe pwente. Ou konmans war vyolans ki konmans antre. I pa sitan fizik parey petet letan zot in vin pli adilt. Me selman i konmans depi la li, akòz zot pe repet par ler sa ki zot vwar dan lakour.

E nou louveraz nou se sa. Ranforsi en pti pe plis sa e fer travay ek SNYC ansanm ek zot, ki par ler bann zenn i ekout en lot zenn, ki nou donn *training* parey mon'n dir dan mon larepons lantrennman. Zot ki zot konnen prezan, e zot kapab ed zot zanmi pour ki –

Nou, nou anvi koup sa lasenn vyolans dek konman i ankor zannfan zenn. Mon krwar lanfaz nou merit met la nou. E Sosyal li i ava fer sa bout ki prezan i ava fer sa bann larestan par ler aksyon legal wi, pou pran avek bann paran ki pa responsab.

Selman sa lo nou kote nou – nou, nou bezwen kontinyelman prevansyon, rod en fason pour nou al zwenn zot. Menm si nou bezwen al zwenn zot kot zot. Bann ki nou kapab, nou pou fer. Mersi Mr Speaker.

MR SPEAKER

Mersi Minis. Bon, nou kapab aret la avek sa seri kestyon. E nou a pran poz. E napa rezon pour mwan *limit* zot longer poz. Donk, nou a repran travay 11er 05. Mersi.

E les mon a swet bann zofisye ki pe kit nou. *PS* avek *CEO*, bon depar e bonn kontinyasyon. Mersi bokou pour zot partisipasyon.

(BREAK)

MR SPEAKER

Bon, mon a dir bonzour e byenveni bann zofisye ki'n zwenn Minis pour kestyon.

E nou annan premye Mr Ralph Jean-Louis, Sekreter Prensipal pour Lazenés e Spor. E Mr Albert Duncan, *CEO*

Seychelles National Youth Council.

Mersi pour zot partisipasyon. Nou ava al lo kestyon 75, Onorab Woodcock.

HON WAVEL WOODCOCK

Mersi Mr Speaker. Bonzour Minis avek ou lekip. Minis, mon premye kestyon i konm swivan;

Eski Minis i kapab enform sa Lasanble ki plan son Minister e SNYC i annan pou organiz e ankouraz plis aktivite pou ankadre lazenes lo Praslin? Mersi.

MR SPEAKER

Mersi Onorab. Minis, ou repons?

MINISTER MARIE-CELINE ZIALOR

Mersi Mr Speaker e mersi Onorab pour ou kestyon. Premyerman, *Youth Services Bureau* i ofer en varyete program ki ganny delivre par bann fasilitater ki'n ganny formen, ouswa ki annan nosyon lo program ki zot pe delivre.

Sa bann program i enkli; laklas ladans. Sesyon sipor travay lakour, sa ki nou dir *homework*. Latelye teat e seksyon pour bann zenn manman – sesyon (*sorry*), bann zenn manman. E parmi lezot.

Sa bann program i osi pou donn bann zenn en landrwa an sekirite e konstruktiv apre ler lekol, oubyen apre zot travay pour zot zwenn.

Dezyenmman, Mr Speaker, SNYC in lans en nouvo konseps ki apel Klib Lentere. En linisyativ inovativ kot bann group ek bann klib divize par bann zenn zot menm i kapab ganny sipor administratif e osi sipor finansyel.

Sa i ankouraz inovasyon e partisipasyon kominoter dan plizyer domenn tel ki *sport* lanvironnman, lar e lantreprenarya. E sa i permet bann zenn pou devlop zot pasyon e avek zot talan.

An sa ki konsern lankourazman kominoter, SNYC i travay an kolaborasyon avek Biro Ladministrasyon Distrik pou siport aktivite zenn lo nivo lokal.

Sa partenarya, i asire ki bann program pour zenn i adapte avek bezwen sak kominote e osi ankouraz en sans responsabilite e lapartaz dan devlopman bann zenn.

Nou annan osi bann *Grants* pour zenn antreprenner, kot sa lannen nou'n ganny plis ki 130 aplikasyon. Enkli 10 sorti kot Praslin. Sa bann *Grant* i annan bi pou ankouraz e siport bann zenn pou lans oubyen agrandi zot biznes.

Sa i konplimant lobzektif nasyonal pou promouvwar en kiltir inovasyon parmi nou bann zenn, kot zot a kapab kontribye pozitivman dan devlopman ekonomik pei.

E anmezir Mr Speaker, ki SNYC i kontinyen evolye dan son rol pour emansipasyon nou bann zenn, enkli nou bann zenn lo Praslin, mon ti ava oule profit lokazyon pou ankouraz bann zenn Pralinwa pou kontinyen vin devan avek zot bann lide e proze. E nou a fer li ansanm avek kolaborasyon SNYC. Mersi Mr Speaker.

MR SPEAKER

Mersi Minis. Onorab, ou siplemanter?

HON WAVEL WOODCOCK

Mersi Mr Speaker. Minis, premyerman les mwan remersye ou Minister sirtou SNYC, CEO Duncan pour zot sipor pou *set up* en *Youth Service Bureau (YSB)*, Grand Anse Praslin.

Ozordi nou annan plizyer group lentere ki pe ankadre bokou zenn. E i annan bon kolaborasyon ant bann *program officers* SNYC avek mon lofis. Gouvernman Lokal, DA, ki osi annan son *Animators Scheme*.

Kot nou tou nou pe ede organiz plizyer aktivite e program, parey nou'n vwar

plizyer aktivite kot Sant Kominoter Grand Anse, Praslin pandan sa vakans Avril.

E Minis, in menm annan dan lepase nou'n vwar kot plizyer bann lasosyasyon fondasyon, parey en legzanp; *Unique Foundation*, ki'n organiz plizyer aktivite pou ankadre bann zenn.

Ozordi Minis, ler nou koz lo zenn, i annan sa persepsyon ki zenn i pli enterese avek *entertainment*, lanmizman, manze, bwar, diverti kontan. Me larealite ozordi in sanze.

Akoz i annan plizyer lezot lentere ki bann zenn i annan pe angaze, pe antre ladan ozordi parey; teknolozi, medya sosyal. *TikTok*, ki mon osi mon en *big fan* ozordi. *Instagram*, *YouTube*, *Snapchat*, *AI*, *gaming*, *mental health*, *wellbeing*, *climate change*, *social justice*, *online advocacy*, *coding*, *eMarketing*, *entrepreneurship*, *fashion*, *anime*, *swimming*, *influencers*, *K-Pop*, spirityalite, lar. E plizyer bann lezot aktivite ki bann zenn i annan lentere ladan.

So, lo Mahe nou annan bokou plis ekspertiz e dimoun ki annan leksperyans dan sa bann diferan domenn. E i mank en pe sa lo zil pou siport bann zenn ki enterese dan sa bann domenn.

Alor mon kestyon; eski SNYC pe mazin met plis lanfaz lo sa bann lezot lentere ki bann zenn i annan ozordi?

Petet organiz bann sesyon ouswa *gear* zot bann aktivite dan sa bann direksyon, dan sa bann domenn.

Akoz mon senserman krwar ki i pou ede *empower* nou bann zenn lo Praslin e tir en bon pe sa bann zenn petet bann ki'n antre dan bann lezot move lenfliyans. Mersi.

MR SPEAKER

Mersi Onorab. Minis, ou repons?

CEO SNYC ALBERT DUNCAN

Bonzour Mr Speaker. Bonzour tou Onorab. Bonzour tou dimoun ki pe swiv sa sesyon dan lakour. Mersi Onorab pour ou kestyon. Kestyon vremen enteresan.

Mon krwar lakle sikse SNYC pandan sa 2 dernyen lannen se ki, nou'n sey diversifye nou bann aktivite ki nou fer, aköz nou konnen zenn i annan diferan lentere, diferan pasyon. I pa zis dan *entertainment*.

E mon krwar sa persepsyon wi, i en persepsyon ki zenn i pli enterese dan sa bann keksoz. Me selman ler ou get realite ou realize ki i annan en kantite

zenn ki anvi partisip dan sa bann keksoz ki ou'n nonmen.

E zis pou *follow-up* lo sa ki *Minister* in koz lo la lo nou *Youth Hub*. Mon ava zis donn en pe plis detay pou montre en pe kwa ki nou deza pe fer. Apre mon a eksplike kwa ki nou pe fer. Apre mon a eksplike kwa ki nou pou fer dan lefitir.

Par egzanp bann fasilitater ki nou annan an se moman dan sa *Youth Hub*, zot pe fer bann, parey nou dir, bann laklas *after school*, oubyen apre ler travay.

So nou deza annan bann keksoz parey *drama*. Nou'n deza annan fasilitater ki pe montre *modelling*. Nou annan *mobile filming* tou. Nou annan *engineering*. E sa laklas i sitan popiler ki nou pe rod plis lespas pour nou kapab ankadre tou sa bann marmay. I annan *extra class* Angle.

Bann klib lentere ki nou annan osi i tous diferan laspe. I annan en klib lentere artizanal kot bann zenn pe aprann fer bann keksoz artizanal. Nou annan enn pour lanvironnman ; enn *Save The Ocean*. Apre en klib foutbol.

E mon osi mon byen *proud* pou dir i annan en zenn – zis par egzanp en lot legzanp kot nou pe ede dan sa laliny.

I annan en zenn fiy Praslin, Camilla Cupidon ki pe reprezant *Commonwealth* – i nou reprezantan lo nou

Commonwealth Youth Council and i pe travay lo en Proze ki apel *AI Academy*, zisteman.

So sa nou pe ed li. Nou fasilite son transpor ler i desann Mahe. I pe travay avek Minister Ledikasyon. I pou travay ek bann zenn Praslin. E sa i pou donn bann zenn bann *skills* dan *generative AI*.

Zis parey ou pe dir *AI* ki *generate contents*, *zimaz*, *videos*. Parey ou pe dir, *TikTok*, *tousala*. *So that's the next step*. Akoz zenn tou kou pe rod, pa sa ki popiler la. Be sa ki pe vini dan lefitir.

Mahe osi nou annan *Youth Tech*. En program kot bann zenn pe devlop bann *video game*. Bann ki senp. E mon krwar dan lefitir sa i en keksoz ki nou pou anmenn Praslin.

Si ou get *hackathon* ki'n fek pase, ou pou war ki zot in ganny plis zenn ki zot in deza gannnen. Akoz i annan bokou zenn ki'n sorti dan nou Program *Youth Tech* ki'n partisipe. So nou annan en kolaborasyon etrwat avek *DICT* ki mon krwar sa osi nou kapab anmenn Praslin.

Nou osi nou annan lo kote lanvironnman. En Program *UNDP Global Shapers* ki nou *Youth Brigade*, Praslin i vreman *involved* ladan. Nou ti annan en – zis mwan pase nou ti Anse La

Blague. Nou ti pe plante pou *restore* mangliye laba.

E osi nou annan bann – nou travay bokou avek bann NGOs osi Mahe ki mont Praslin. Sa osi en keksoz nou pe devlope. Semenn pase nou ti annan *Elles Foundation* ki ti pe travay avek bann *teenage mothers*. Bann zenn manman pou donn *parenting skills*. E nou vreman angaze ladan.

So, mon krwar nou pe fer en bon pe la. Be selman parey ou pe dir, nou pou rod tou fason pou anmenn plis fasilite, plis program desantralize, keksoz ki nou pou fer Mahe.

E dan nou Bidze sa lannen nou ti fer sir ki nou met plis dan *domestic travel* zisteman pou fasilite sa bann keksoz. Mersi bokou.

MR SPEAKER

Mersi *CEO*. Mon annan kestyon Onorab Porice.

HON DOYACE PORICE

Mersi Mr Speaker. Bonzour *CEO*, avek *PS*.

Minis, eski ou Minister atraver *SNYC* i annan bann lesanz aktivite pour bann zenn sorti lo Praslin e Zil Pros, avek bann zenn lezot pei dan larezyon, zis parey bann trwazyenm az i fer bann *gimelage* avek bann lezot pei? Mon santi ki sa i pou ed zot lev zot nivo. Mersi.

MR SPEAKER

Mersi Onorab. Mon a donn laparol – CEO ki pou kontinyen?

CEO SNYC ALBERT DUNCAN

Mersi Onorab. Pou reponn ou keston, nou napa en programm spesifik pour lemoman ki konsantre zis lo Zil Pros pou fer lesanz.

Me selman ler nou swazir bann zenn pou fer lesanz, souvandfwa nou ganny bann zenn ki sorti lo zil. Be selman mon krwar i en bon nide, petet i en keksoz ki nou devret get ladan. Mersi bokou.

MR SPEAKER

Thank you. Ok, nou'n – nou fini ek sa keston la. Ah, nou bezwen fer en sanzman delegasyon.

Donk, mon remersye Mr Albert Duncan ki pe kit nou e pou sed laplas pour 2 lezot zofisye. Mersi Mr Duncan. Bonn kontinyasyon. E an menm tan, Madanm raporter i a apel lot zofisye.

Bon, bonzour Mr Marc Arissol, *CEO National Sports Council* e Mr Aldo Rose, *Senior Project Officer National Sports Council*. Mersi pou zwenn nou. Nou kontinyen avek keston 76, Onorab Woodcock.

HON WAVEL WOODCOCK

Mersi Mr Speaker. Bonzour CEO. Minis, mon premye keston;

Eski Minis i kapab enform sa Lasanble ki plan son Minister pour bann nouvo fasilite *sport* lo Praslin, e ki travay renovasyon ki NSC i anvizaze antreprann lo bann diferan fasilite *sport* lo Praslin, parey *Water Sport Centre*, Stad Amitié, laplenn Grand Anse Praslin, eksetera? Mersi.

MR SPEAKER

Mersi. Minis, repons?

MINISTER MARIE-CELINE ZIALOR

Mersi Mr Speaker. Mersi Onorab pour ou keston. Mr Speaker, lamazorite proze lo Praslin in ganny bidzete pour lannen 2026, 2027.

E la nou a pe koz lo devlopman fasilite spor konba Grand Anse. Renovasyon *court basket* Baie Ste Anne. Renovasyon fasilite *judo* Baie Ste Anne.

E travay ki pou re antreprann byento sa lannen se renovasyon lo laplenn Grand Anse e serten travay lo Stad Amitié. Parey re aranz lafnet ek laport. Twatir aköz i pe ganny ekspoze ek salen. E reparasyon *fencing*, enstal dalo e fer drenaz konvenab. E osi fer en *la salle de bain* avek sa dortwar ki la aktyel.

E Mr Speaker, sa i bann travay ki mon mazine apwe CEO i a donn plis detay si Onorab i annan keston siplemanten. Mersi Mr Speaker.

MR SPEAKER

Mersi. Wi, nou a pas lo siplemanten Onorab Woodcock.

HON WAVEL WOODCOCK

Mersi Mr Speaker. Mon keston i plizumwen pour CEO. I annan serten travay ki'n ganny fer e vizit ki'n ganny fer lo plizyer sa bann sit.

Sirtou kot Stad Amitié, laplenn Grand Anse ti an demars pou sanz *fence*. E osi serten travay renovasyon lo *Water Sport Centre*.

I annan bann pti alokasyon bidzeter pour plizyer sa bann travay. Petet CEO osi i kapab donn nou en pe detay lo bann travay ki pou konmanse byento e si i kapab donn nou en *time frame* osi. Mersi Mr Speaker.

MR SPEAKER

Mersi. Minis, ou a donn CEO laparol.

CEO NSC MARC ARISSOL

Mersi Onorab, pour ou keston. Avek ou permisyon Mr Speaker, mon a pas ou avek nou *project officer* ki ava reponn sa bann detay. Mersi.

MR SPEAKER

Mersi. Wi?

**SENIOR PROJECT OFFICER
NSC ALDO ROSE**

Bonzour Mr Speaker. Mersi pour ou keston Onorab. Louvraz li menm lo *Water Sport Centre* Praslin, i pa ti'n ganny bidzete pour sa lannen.

Ki nou'n fer, nou'n reisi fer en plan ki'n pas kot *Planning*, in aprouve. E i pou – nou ti'n anvi met li dan plan sa lannen. I sipoze pas - fini konmanse, akòz i ti'n ganny *tender*. Ti pou al prosedir *tender* tar lannen pase, ki nou pa'n ganny sans.

Selman i annan en serten louvraz ki ti pli irzan pour sa lannen ki'n tonm dan Bidze. Louvraz *CJSOI*. Bann *venue* lo Mahe e *Beach Soccer*. Nou ava gete dan sa lannen. Nou pa pou kapab ganny en *timeline* spesifik pour sa louvraz lo *watersport*. Mersi Mr Speaker.

MR SPEAKER

Mersi. Nou'n terminen la? Tre byen, nou ava – i annan pwen ki pa'n reponn? Ale, kontinyen. Kontinyen.

**SENIOR PROJECT OFFICER
NSC ALDO ROSE**

Lo Stad Amitié li i en keksoz ki pour sa lannen, nou pou konmans li dan dezyenm *half*

sa lannen. Sa louvraz ki pa tro konplike.

E *SIA* pou vin *onboard* pour nou fini drafte *scope*. *SIA* pou vin *onboard* pou kapab fer *tender* sa louvraz. Sa i pou vin dan dezyenm *half* sa lannen.

MR SPEAKER

Tre byen. *Ok*, nou a kontinyen ek *kestyon* lezot Manm. Onorab Loizeau?

HON NORBERT LOIZEAU

Mersi Mr Speaker. Bonzour Minis ek ou delegasyon ankor enn fwa. Mr Speaker, mon anvi demann Minis;

Vi ki ti annan en moman dan Lasanble ti annan serten lasirans ki ti ganny met devan *floor* Lasanble *in regards to* Stad Amitié.

Me nou konman en Komite COGA ler nou ti al vizit sa stad, nou ti trouve ki i annan en pe dezord laba. Kot laplenn, Federasyon Foutbol ki ansarz. Graden avek *changing room*, NSC. Landrwa dormi dortwar mon krwar - mon pa pe mazine lekol sa lot antite. Annefe ti annan 3.

E nou ti war ki i annan en dezord. A lafen nou pa ti kapab konnen mannyer nou pe demar nou travay. Nou ti zis sorti, ale.

Eski zot in rezourd sa kot petet zis NSC ki pe responsab sa, *or* mon pa konnen, eski i

annan en travay ki'n ganny fer pou rektifye sa? Mersi.

MR SPEAKER

Mersi. Minis, diriz ou *panel*.

MINISTER MARIE-CELINE ZIALOR

Mersi Mr Speaker. Mersi Onorab pour ou *kestyon*. Mon pou pas laparol apre avek CEO pour li donn ou plis detay. Me selman sa bann lenfrastruktir sportif par egzantp, avek bann federasyon - la nou pran spesifikman stad foutbol.

Letan *FIFA* – aköz *FIFA* i *sponsor* en pe. E letan i *sponsor*, i met dan lanmen federasyon. E sa bann negosyasyon nou pa'n al ladan. Nou ti'n konmanse nou. Nou pa'n al ladan aköz parey ou konnen nou'n vreman, vreman okipe avek *beach soccer*.

E la nou annan en lot dan nou lanmen, ler nou pou fini pran avek *CJSOI* en pe. Me selman i annan bann detay ki CEO i ava kapab eksplik en pti pe plis Mr Speaker. Mersi.

MR SPEAKER

Thank you. Kontinyen.

CEO NSC MARC ARISSOL

Mersi bokou, Mr Speaker. Zis petet donn en pti pe pli – *shed* en pe plis lalimyer lo sa sitasyon. *Issue* ki nou pe resevwar se ki Federasyon

Foutbol pour li kapab *takeover* sa landrwa, i bezwen ganny en *lease*.

Me sa i difikilte ki nou pe gannnen. Petet mon ava pas avek Mr Aldo ki ti asiste sa *meeting* pour li donn zot en pti pe pli detay lo sa problem *lease*.

MR SPEAKER

Thank you. Kontinyen *please*.

**SENIOR PROJECT OFFICER
NSC ALDO ROSE**

Yes. Mersi Mr Speaker. Wi, sa landrwa li menm li later i pour Gouvernman. Prezan nou ti annan bann diskisyon avek Federasyon Foutbol pour zot kapab ganny *partially* en *lease* lo parey zot annan Stad Linite.

Koumsa zot kapab kouver sa laplenn sentetik e annan en plan devlopman pour zot kapab refer sa laplenn li menm e refer li net. Selman striktir batiman an zeneral i anba ziridiksyon responsabilite NSC.

Sa se louvraz ki nou pe antreprann an se moman. E i pou annan en Bidze ki swiv lannen prosen lo Stad Amitié. E sanmenm ki nou ti anvi ganny sa koze final avek Federasyon Foutbol pou kapab ed zot parselman pou fini sa pti proze lo laplenn li menm.

Sa diskisyon pa ankore fini. Prezan nou, nou

kontinyen avek nou bann louvraz ki nou annan lo lenfrastriktir li menm. Lo *building*. Lo *changing room*. Son twatir an zeneral. Mersi.

‘Dormitwar sanmenm sa ki Minis in dir. I annan en pe louvraz Amitié. Sa dortwar li menm i napa en *la salle de bain* parey in dir. E an se moman zot pe sorti. Bann zwer pe sorti pou al dan twalet piblik avek *changing room*.

Non. Wi, wi. *Changing room* ki bann dimoun i servi pour letan i annan *match*. Sa ‘dormitwar li i sipoze annan son prop *la salle de bain* pour li. E sa nou anvizaze fer sa lannen.

MR SPEAKER

Yes, ou kapab ganny en klarifikasyon Onorab Loizeau.

HON NORBERT LOIZEAU

Mr Speaker, klarifikasyon i lo – nou konnen NSC li – mon'n konpran ki *FIFA* li i pou responsab laplenn zot proze. NSC, stad li menm. Me sa dortwar la, eski i pou tonm anba NSC ouswa i pou tonm anba sa lot lorganizasyon ki nou ti ganny dir pe *operate*?

MR SPEAKER

Thank you. Wi, Mr Rose ki pou kontinyen, oubyen...? Minis, wi?

MINISTER MARIE-CELINE ZIALOR

Mersi Mr Speaker. Mr Speaker, sa dortwar nou ki pe envestir. I pou tonm anba nou responsabilite. Mersi Mr Speaker.

MR SPEAKER

Thank you. Mon annan kestyon Onorab Roucou.

HON MICHEL ROUCOU

Mersi Mr Speaker. Minis, si ou kapab dir nou, eski bann louvraz ki pou ganny fer lo bann fasilite *sport* Praslin, eski i pou ganny fer par faz, anvi ki nou'n aprann poudir ti napa en Bidze, e zot in fer serten demars pou zot ganny en larzan?

Si pou ganny pour lekspektasyon demen ki bann zabitan Praslin ava krwar poudir louvraz pou ganny fer en sel kou. Ki mannyer pou ganny fer, si par faz?

Akoz nou war poudir i annan bann landrwa parey laplenn Mont Fleuri, i deza annan en Bidze la. Selman bann louvraz pa ankor demare. Si bann travay lo kote Praslin zot pou fer li par faz li menm li? Mersi.

MR SPEAKER

Mersi. Minis? *Panel?*

MINISTER MARIE-CELINE ZIALOR

Mersi Mr Speaker. Wi, mersi bokou Onorab pour ou kestyon. Mon krwar en tre bon kestyon. Donn mwan en loportinite pou reponn sa kestyon bidzeter.

I ti'n bidzete li. Me dan mon larepons inisyalman pour Praslin mon ti'n dir bann proze ki dan kestyon inisyal, i ti'n bidzete 2026/2027. I annan bann renovasyon selman ki ti pour 2025. Parey pour tou larestan distrik i annan en pe travay renovasyon 2025.

Avek nou bann difikilte finansyel renovasyon *Beach Soccer*, Finans in deside – nou ti annan nou sa bann larzan renovasyon. Ti annan menm en *buffer* tou.

Finans in deside aköz sa *emergency* finansman *Beach Soccer* ki pa'n vini. Sa promes pa'n delivre. Nou'n bezwen – tou sa bann larzan anba NSC la, nou'n bezwen pran pou fer renovasyon pour *Beach Soccer*.

E la prezan, nou dan negosyasyon. La nou pe koz avek Finans pour nou kapab vwar ki mannyer prezan nou fer bann priyorite pour nou kapab remet sa larzan dan Bidze pour nou kapab fer sa bann travay.

Travay pou fer li. Nou bezwen zis prezan fer sa bann negosyasyon. En pe sa bann travay administratif plito, avek Finans, pour ki i remete. I ti

bezwen fer li vit atraver *NSC* pour nou kapab vitman kapab fer sa bann louvraz *Beach Soccer*.

La prezan nou pe al refer sa legzersis pour nou kapab – bann larzan ki ti deza la 2025 dan Bidze, pou vwar pour nou fer sa bann louvraz ki *on hold*, zis aköz nou pa pou kapab peye pour lemoman. Nou pe travay lo la. Mersi Mr Speaker.

MR SPEAKER

Mersi Minis. Bon, nou'n termin la pour sa keştyon. Nou ava avanse. Mon annan 2 keştyon dan non Onorab Egbert Aglae ki pa dan lasal. Donk, mon ava avans lo keştyon 79, Onorab Richard Labrosse.

HON RICHARD LABROSSE

Mersi Mr Speaker. Minis, mon a dir bonzour ankor enn fwa ek ou nouvo delegasyon. Keştyon 79 i al konm swivan;

Eski Minis, i kapab enform Lasanble ki travay ki son Minister in fer avek Federasyon *Sport* pour fer sir ki zot azour avek Lalwa e bon zesyon zot lorganizasyon? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mersi Onorab pour ou keştyon. Premyerman Mr Speaker, nou annan *MOU* ki nou'n sinyen avek Biro Rezistrar pou fasilit travay, pour ki nou ganny lenformasyon avek Biro Rezistrar lo stati sak Federasyon avek Lasosyasyon *Sport* ki anrezistre.

E mon bezwen re fer sorti ki Biro Rezistrar in enform nou ki in annan en amelyorasyon lo stati nou bann federasyon ek lasosyasyon.

Dezyenmman Mr Speaker, *NSC* in fer foronm pour bann lasosyasyon avek federasyon pou met zot azour ek bann nouvo lenformasyon ki annakor avek sa *Sport* Polisi.

E *NSC* in osi form partener avek Lenstiti *Guy Morel (TGMI)* pou ede asiste bann federasyon avek serten konpetans tel ki zesyon zot Bidze, *Leadership*, *Management*, Ekrir Proze, Anti-Koripsyon e Etik, parmi lezot size.

E de plis, a sak fwa ki i annan sanzman dan Lalwa, parey lannen pase ti annan. Departman Lazenés ek *Sport* i organiz Sesyon Sansibilizasyon pou met zot azour avek sa bann sanzman. Mersi Mr Speaker.

MR SPEAKER

Mersi Minis. Nou annan siplemanter Onorab Labrosse?

HON RICHARD LABROSSE

Wi, Mr Speaker. Minis, mersi pour lenformasyon ki ou'n donnen. Minis, dan ou lenformasyon mon pa'n sezi kekfwa si ou'n dir li dan en lot fason. Si ou ti kapab re dir ankor.

Si i annan okenn mekanizm regilye ki ou Minister i annan, etandonnen ki NSC i sa lorganizasyon ki bann federasyon i sipoze anrezistre anba la, si mon korek?

E eski NSC zot annan bann *compliance check* ki zot fer avek bann federasyon? Ler mon dir *compliance check*, eski zot rankontre bann federasyon regilyerman pou regarde ki mannyer zot bann progre pe ale, vi ki la Minis in fer sorti ki i annan bon lantant avek Biro Rezistrar? Ki sa i tre byen.

Mon dezyenm kestyon ki mon ti a kontan demann NSC, etandonnen ki Minis zot in fer zot travay zot osi;

Eski i annan bann sesyon *Capacity Building* osi ki NSC i ofer sa bann federasyon, pou ed zot konpran zot responsabilite legal e administratif? Mersi Mr Speaker.

MR SPEAKER

Mersi Onorab. Wi, Minis?

MINISTER MARIE-CELINE ZIALOR

Mersi Mr Speaker. Wi, sa dernyen kestyon definitivman wi, i annan. Se sa ki mon'n eksplike kot mon ti'n dir, sesyon ki departman in fer. Sesyon ki NSC in fer.

E parey lannen pase, ti annan sanzman dan Lalwa kot tou sa bann federasyon 30enn zot, ki annan zot in bezwen re al anrezistre aköz sa nouvo Lalwa kot *Registry*, kot Departman Lazenek *Sport* ti fer sesyon. I form parti sa.

E i annan sa bann sesyon, bann topik ki mon'n mansyonnen kot Guy Morel – Lenstiti Guy Morel. Kot nou'n travay avek zot, nou'n devlop sa bann – zot ki'n devlope, bann konpetans pour nou fer bann *training* anmezir nou ale.

E pa bliye sa bann federasyon zot osi ganny *training* avek zot partener enternasyonal. I annan pa mal ki vin fer ki nou benefisye, ki zot vin fer isi Sesel. E i annan osi kot zot ale, zot al fer aletranze.

E lo sa kote premye kestyon mekanizm, mon pa konnen petet Mr Speaker, atraver ou, si Onorab i a kapab donn en legzanp spesifik. Me selman, sa ki mon kapab dir, *compliance* – aköz ler ou anrezistre, i tonm anba Biro Rezistrar ki Lalwa.

Compliance par egzanp, soumet zot kont. Enform Biro Rezistrar si i annan okenn sanzman bann Manm. Ekrir zot Konstitisyon. I tonm kot Rezistrar. Sa *compliance* i fer laba.

E nou, nou gannnen. Nou demande. Nou ganny lalis stati. Zot *status*. Kekfwa Kreol ki pa kler. Zot *status* egzakteman lekel ki pa *compliance*.

Aprè definitivman sa i vin kot NSC e NSC, CEO i kapab eksplike ki bann mezir kekfwa petet ler zot pa *compliant*, ki i arive. Mersi Mr Speaker.

MR SPEAKER

Mersi.

CEO NSC MARC ARISSOL

Ok, mersi Mr Speaker. Zis pou azout en pti pe. Lo nou kote parey Minis in dir, *compliance* premyerman i bezwen ganny fer avek *Registrar*. Savedir si ou pa *in good standing* nou, nou pa pou aksepte sa federasyon.

So pour zot fer sa, zis pour mwan pas en pti kou briyevman. Zot bezwen anmenn lalis zot AGM. Zot *minutes meeting* kot nou. *Annual Report*. Zot program *Calendar of Activities* ki zot pe mazine pou fer dan sa lannen. I annan zot bann *new committee members* ki'n annan

eleksyon si napa. Zot Sertifika in *Good Standing*.

So, baze lo la, se la prezan ki nou, nou donn zot en *affiliation letter*. E apre osi nou'n kapab *issue* zot avek zot *Grant*. E *Grant* nou toultan fer li dan 2 faz. Savedir zot ganny premye lanmwatye. Apre la zot ganny dezyenm semester. Ok.

So sa i bann mezir. So savedir, mezir prensipal se si zot annord avek *Registrar*. Se sa ki nou regarde. E menm dokiman ki zot *submit*, i re *submit* kot nou *as well*. Mersi Mr Speaker.

MR SPEAKER

Ou'n lev lanmen Onorab Labrosse?

HON RICHARD LABROSSE

Yes, Mr Speaker, zis en pti klarifikasyon.

MR SPEAKER

Klarifikasyon.

HON RICHARD LABROSSE

Mersi byen bann lenformasyon ki zot pe donner. Byen enteresan. CEO, si ou ti kapab zis klarifye pour mwan la si ou annan sa *data* avek ou la, kantite lakonpan –

Si ou pe donn mwan en pousantaz la ozordi, kantite lakonpannyen - kantite federasyon, eskiz mwan, ki *non-compliance* ozordi

konpare avek bann ki *compliance*? *Thank you.*

MR SPEAKER

Mersi. *CEO*, i a kapab adrese?

CEO NSC MARC ARISSOL

Anyway, mon napa sa poursantaz kalkile la. Me selman, nou annan en pti minim federasyon ki *non-compliance*. Mazorite nou bann federasyon i *compliant*. Mersi Mr Speaker.

MR SPEAKER

Thank you. Bon, nou a ekout lezot Manm. Mon annan Onorab Monthy.

HON PHILIP MONTHY

Mersi Mr Speaker. Reponn en pti gin mon kestyon lo zafer *compliance*.

Me selman avek tou sa bann formasyon ki zot pe donn bann federasyon, eski zot satisfè avek amelyorasyon ki zot in vwar in annan lo kote sa bann federasyon?

Akoz tou resaman mon'n swiv en *issue* avek *basketball*. Eski zot in war en *improvement* lo nivo bann federasyon?

E lo zot kote osi petet, mon konnen zot pa kapab tro enterfer ek bann federasyon, me ki mesaz petet zot a kapab pase avek bann diferan *sportsman*, *sportswomen*, pour ki lo sa bann federasyon

zot ganny *the right person*, dimoun ki kapab, ki annan abilite pou diriz en federasyon?

Akoz sa osi i enportan. Ou kapab donn ou kantite formasyon. Me selman si ou napa sa dimoun ideal, konpetan a latet sa bann federasyon, tou kou i pou annan bann *issue*. So ki lo zot kote petet zot kapab fer pour sa sansibilizasyon? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pour ou kestyon. Mon krwar tre bon kestyon.

Mon ti ava petet avan ler mwan mon pran lo ki nou pe fer. Akoz nou'n diskite lo la, *CEO* i ava kapab petet donn en pti pe plis lo ki bann defi e si i annan en *improvement*.

Mwan lo nou kote, nou kapab dir dan Minister an antye, *the improvement* se ki la nou kapab koze. Kominikasyon i ganny fer ne pti pe pli byen, menm si nou pa agree.

Me selman, pour letan mon ti fek vini mon rapel 2020 Mr Speaker, i ti difisil. Menm pour ou kapab ganny zot pou koz avek zot ti vreman, vreman difisil. Konversasyon parfwa

bann *meeting* ou pa'n fini fer, zot leve zot ale.

La konmela napa sa. Nou kapab kalmeman nou kapab adres bann keksoz. Nou kapab koze. Selman mon mazinen poudir sa i en amelyorasyon. Me selman mon pou les *CEO* ki travay pli pre avek zot, pou koz lo son leksperyans. Mersi Mr Speaker.

MR SPEAKER

Tre byen. *CEO*?

CEO NSC MARC ARISSOL

Mersi Mr Speaker. Petet zis pour mwan donn en pti pe an global. Nou'n war en pti pe poudir bann federasyon – letan mon'n antre dan lofis, bann federasyon in annan en pti pe mank komunikasyon. In annan en pti pe mank *empowerment*.

E nou fodre nou konpran kler poudir *NSC* pa fer *sport*. *NSC* i siport *sport*. Se federasyon ki fer *sport* arrive. Parfwa nou – tou dimoun ler i annan en problem ek *sport*, nou blanm *NSC*. Me nou, nou pa pe fer - mon pa anvi vin fer sa *blaming game* la. Nou bezwen travay ansanm, ki *sport* i monte.

So, *this is why* kot nou'n vwar petet enn de bann defayans ki'n annan. Akoz parey toultan mon'n dir, parfwa i annan bann dimoun ki i annan for ataker li. Me

selman i napa sa kapasite pour li vin en *chairman* oubyen pour li vin en sekreter.

So, *this is why* nou ti come up lannen pase avek sa program pour nou *empower* zot. E program ti enteresan parske nou ti regard depi kot nivo sekreter par egzanp, mannyer ou pran *minutes*. Ki mannyer ou ekrir en *projet*.

Akoz nou pa anvi ki zis bann federasyon i depan lo sa larzan. Sa *Grant* ki nou pe donn zot, aköz i annan ki ganny plis ki kanmarad. So, nou'n anvi osi zot konnen mannyer pou ekrir en proze avek zot *parent body* disiplin, pour zot kapab ganny bann *funding*.

So, tousala nou'n *focus* lo la. Nou'n *focus* lo *ethics as well*. Nou'n *focus* lo koripsyon. Ant-koripsyon, kot tousala nou'n fer. *Transformational leadership*, kot nou'n ede ki mannyer pou *lead* konman en *chairman*, ki nou kapab war nou bann federasyon bouz pli devan.

Me par kont, mon bezwen – e menm mannyer pou *manage* finans osi. Me par kont nou defi, sa program ti fer lo en baz 5 zour. Nou'n vwar poudir i annan federasyon ki petet dernyen minit ki i dir i pa kapab vini. Oubyen ou vwar poudir bann ki konmanse, pa fini. So sa en pti pe nou bann defi.

Parfwa nou dir nou kapab anmenn bef kot delo, me nou pa kapab fer li bwar delo. Me selman nou parey mon pe dir ou lo nou kote, nou pe donn tou nou sipor bann federasyon. E nou'n annan osi – nou'n entrodwir *forum* kot nou'n konmanse lannen pase.

Sa lannen osi nou pou annan en *forum*. Me selman parey zot konnen nou'n en pti pe – nou latansyon in diverse avek sa bann aktivite ki'n annan sportif dan pei.

Me nou pou bezwen fer kot nou annan sa kominikasyon e sanz lide ansanm, e pour nou adrese ki nou a kapab travay dan en pli bon direksyon. So sa en pti pe nou lespri ki nou pe sey anmenn pou fer sir ki *sport* i kontinyen *flourish* dan pei. Mersi, Mr Speaker.

MR SPEAKER

Wi, Minis, ou le azoute?

MINISTER MARIE-CELINE ZIALOR

Wi, mersi, Mr Speaker, aköz mon pa ti ankò fini reponn son kestyon lo ki nou pe fer.

Mon krwar globalman letan mon pou get an zeneral, nou lo sa kote *improvement* i annan wi. Me selman de lot kote osi par ler ou'n mansyonn serten federasyon kot ou vwar menm problem i revini. Letan ou krwar ou'n rezourd, i revini.

Sa set aköz parfwa i annan bann disiplin ki annan en kalite kiltir ki pa ankò ganny *challenged*. Nou pa ankò adres sa kiltir sa disiplin. E par ler osi, nou annan nou, pa sa komite antye li. Endividi. Enn ouswa 2 endividi.

Ou konnen, par ler dimoun i pran keksoz personnel. I krwar sa disiplin pour li. I annan dimoun i krwar par egzanp si i pa la, en disiplin pa pou marse. Pa pou fonksyonnen.

E i sa bann konportman endividyal ki la prezan nou, nou pou bezwen regarde. E bann konversasyon en pe difisil ouswa i bann fason fer kot nou – sanmenm sa nou'n ganny *MOU* avek Rezistrar pour nou kapab.

E byento nou pe mazin pou nou anmenn *NSC Act* devan *Cabinet* pou fer serten sanzman pour ki nou, nou kapab ganny sa manda legal pour nou kapab fer serten keksoz ki la pour lemoman nou napa. So legalman nou pou al fer sa.

Dezyenmman, nou pe al fer sa bann Program Sansibilizasyon Lantrennman pour bann zenn. Mon krwar i annan serten disiplin, si mon pou *être* fran Mr Speaker, pour mwan dir Onorab Monthy atraver ou. Mon ti ava voudre vwar bann nouvo lespri. Bann

nouvo – bann zenn vin avek modernite. Vin avek lafason fer diferan.

E pou fer sa fodre ou fer bann zenn vini e nou donn zot *training*. E letan i annan eleksyon, pour nou kapab dir; be vwala, nou annan bann dimoun avek kapasite.

Parfwa zot lentansyon i pa move li. Pa move. Me selman, i annan bann evolisyon dan *sport* ki'n depas en kantite dimoun la ki pe zer sa bann federasyon ek lasosyasyon.

E nou pou bezwen vini. Parfwa kantmenm ou pe anmenn bann keksoz nouvo, zot pa pare pou ekoute. Zot pa tro, tro anvi. Zot pa tro krwar.

Me nou pou bezwen definitivman – wi, definitivman nou pou bezwen enkli, pa zis sa federasyon. Me enkli osi *management* Zesyon *Sport* an zeneral. E enkli depi son *coach*. Depi son *manager*. Tou sa ki lantouraz *sport*. E nou pou bezwen fer travay.

E petet la nou pe vwar en pe friksyon en pe, ki fer nou krwar napa amelyorasyon. Akoz oparavan avan nou, nou vini, pa ti ganny adrese sa bann keksoz. Pa ti ganny met devan. Pa ti kler. Laverite pa ti pe ganny dir. Nou pe sey fer dimoun - pa *upset* dimoun.

Me la mon krwar nou pou bezwen met tousala laba dan lespri pour nou fer sir nou

bann atlet e nou Komite Sportif i ganny sa ki pli meyer. Ki nou vwar la nou'n fek en *World Cup* ki mannyer nou bann atlet in fer byen. Mon krwar tou nou bann atlet Seselwa i *deserve* ganny sa sans parey.

E vwala aköz nou, nou deside pour nou fer li. E fer sir ki letan ou annan ou en group dimoun ki'n ganny *trained*, nou kapab prezan met kriter dir; si ou pa'n pas serten konpetans, ou pa pe kapab fer laplikasyon. Pour ou vin en *chairperson* en lasosyasyon, i bezwen annan serten kriter.

Nou pa ankor ariv la, me nou lo sa semen progre pour nou kapab – pou arive. E nou pe travay pros avek Rezistrar definitivman, pou ed nou pour nou kapab fer sa. Mersi Mr Speaker.

MR SPEAKER

Mersi Minis. Kestyon Onorab Romain?

HON GEORGES ROMAIN

Mersi Mr Speaker. Minis, ou kapab dir nou si tou federasyon in anrezistre avek Biro Rezistrar a sa moman la, si ou kapab dir nou sa?

E mon dezyenm keştyon. Anvi ki nou konnen ler federasyon i an defo, parey nou dir pa an *compliance* avek Biro Rezistrar, e sa federasyon normalman zot pa an aksyon.

Parey zot *league* pa an fonksyonnen.

E mon krwar Onorab Monthy in fer resorti par egzant *basketball*. E nou tou nou konnen ki Sesel atlet bann *basketball*, Seselwa nou zwen byen. Madanm konman msye. E nou'n war ki performans in vreman tonbe dan Zwe De Zil.

E alors Minis mon ti a kontan met sa kestyon devan ou. Ki i annan dan plan, anvi mon konnen pa tro kapab antre dan federasyon parey CEO in dir.

Be ki plan zot annan parey en *plan B*, ki si en federasyon i arive ki antre an defo, ki prezan sa *league* pa pe fonksyonnen oubyen sa federasyon pa pe *perform*, pour zot kapab fer sa federasyon o pli vit posibil retourn an aksyon?

Akoz nou bann atlet ki pou ganny afekte. Pa bliye nou annan bann konpetisyon nou'n pran par ladan. Apre nou Sesel nou perdi. Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi, Mr Speaker. Mersi Onorab, pour ou bann kestyon tre valab.

Parfwa – ou'n nonm *basketball*, be selman nou'n fek pe re verifye ankor avek Rezistrar avan nou vin la, yer. I pa'n mansyonn mwan poudir *basketball* i an defo, i non-compliance li.

Parfwa letan ou annan problem dan ou bann lasosyasyon ek federasyon, i pa neserman i en keksoz legal li. I riske ki ilegalman zot *comply* tou – zot tik tou sa bwat ki annan kot *Registrar*. Me i - par ler i move zesyon.

Ler mon dir move zesyon, zot ava krwar kekfw pran mon mal. Non. Move zesyon parfwa i zis, fer krwar i annan dimoun ki napa konpetans pour li organiz en *league* byen. Sa i pou tonm dan move zesyon. Ouswa pou kontinyen. Ouswa i annan bann keksoz ki pa'n prevwar. In mal ganny fer.

Definitivman nou, nou pa – nou antre ladan. Nou regarde. La nou annan nou 2 federasyon kot nou'n fek diskite avek Rezistrar. E in dir ek nou ki nou kapab fer. Ki nou pa kapab antre ladan.

E nou menm pe koze. I annan enn nou pe koz avek son federasyon enternasyonal ki i ti vin isi la pandan *Beach Soccer*, kot nou'n annan serten kominikasyon. Egzakteman pour nou vwar ki mannyer nou antre. Ki mannyer nou ede.

Nou, nou premye bi premye enstan se pou ed zot. Akoz definitivman, se kominote sportif ek tou sa bann fanmir ki fer *sports*, ki zot ki perdi. E pei an zeneral osi tou i perdi avek rezilta. Se sa ki nou fer. Nou pa reste lebra krwaze. Nou definitivman vwar e regarde ki mannyer nou ede.

E i annan bann lenstans. Par egzanp, mon konnen NSC in menm, bann ki pa kapab fer zot kont. In donn zot en dimoun ki pou fer zot kont pour ki zot kapab vin, konmsi, *comply* avek Rezistrar.

Me selman lamazorite zot – Rezistrar fek dir nou yer. Lamazorite zot stati legal kot Rezistrar i bon. I annan apepre kekfw a en 3, 4. Napa bokou. Nou'n demann li donn nou tou sa bann detay. Napa bokou.

Nou annan 2 an partikilye nou bezwen al travay avek la. Nou pe fer, in donn nou en pe dele letan pour nou kapab fer sa. Rezistrar pou travay avek zot. Larestan i zis zesyon anndan.

E la mon ti ava lans lapel, profite Mr Speaker, pour osi bann atlet ek zot bann fanmir ek bann klib pour zot osi tou zwenn nou dan sa kanpanyi ki nou pe fer la. I pa kapab zis responsabilite lo Gouvernman. Akoz i annan en kantite dimoun, nou pa anvi pa byen ek mon dalon. Ouswa

mon pa anvi ganny problem avek entel.

Pour letan i annan *vote*, i annan eleksyon, si klib ouswa endividi, depan lo Konstitisyon ki i dir lekel ki *vote*. Ki zot osi zot fer en zefor, zot regroupe, zot anmenn en kanpanyi pour ki sa dimoun ki meyer pou diriz sa federasyon. Sa lasosyasyon i kapab fer.

Nou'n deza fer pour enn de lasosyasyon ki'n vin kot nou. Nou'n ed zot pour zot kapab remet lo lipye. I bezwen osi annan en volonte.

Akoz apre pa bliye Mr Speaker, sanmenm sa bann dimoun kot nou pou'n vini, apre pou vin anmenn kestyon dan Lasanble ki pou vin dir ek nou, nou pe enterfer, politisyen pe enterfer avek *sports*.

So, i en semen ki de kote sa, ki nou pou bezwen par ler sansib nou pa tro osi tou oule enterfer pou dir zot ki pou fer. Lekel ki pou mete. Me si zot vini, nou pa pou kapab al tro enterfer si nou napa lenformasyon. E si i pa vin formel.

Akoz en kantite fwa dimoun kekfw i war nou, enformelman i donn en konplent. Nou pa kapab azir lo la nou. I bezwen vin en let formelman. Lamazorite fwa i al kot biro kot PS. Kot *Grievance* i ete laba i vin formelman, apre pour nou kapab fer fas avek.

E lamazorite fwa, i pa en kestyon *compliance* kot Rezistrar. I zis en move zesyon ladan. E letan nou'n gannyen formelman, la nou kapab vini regarde ki mannyer nou kapab ede.

Me pa bliye mon'n lans lapel avek tou bann atlet ek zot fanmir osi. Donn nou en koudmen dan sa demars ansanm pour nou kapab fer ki Zesyon *Sports-*

E nou nou'n fer en pe lavans. Nou'n fer en pe lavans. Me i annan nou ankor pa mal travay pour nou fer. Mersi Mr Speaker.

MR SPEAKER

Mersi. *Ok*, klarifye Onorab.

HON GEORGES ROMAIN

Minis, mersi pour ou larepons byen detaye. Selman ler ou pe eksplike, mon'n vreman satisfè, akòz ler ou'n dir plis ledikasyon.

Selman anvi ki bann federasyon ler zot pe fer zot AGM. La ki zot fer zot bann eleksyon mazorite letan. E nou pa ganny ase piblisite lo la. Kekfwa si sa piblisite ledikasyon ti pli byen, ki parey ou'n dir plis dimoun i a desann. E kekfwa bann *vote* i ava ganny sorti pli byen, dan en serten sans ki dimoun –

Akòz kekfwa annandler nou pa konnen sa bann keksoz pe arive. Parey kekfwa

pa tou atlet sa bann federasyon ki desann. Prezan kekfwa en desizyon i ganny fer ki pa satisfèzan. Mersi Mr Speaker.

MR SPEAKER

Tre byen. Minis, i kapab azoute, wi.

MINISTER MARIE-CELINE ZIALOR

Mersi, Mr Speaker. Mersi bokou Onorab, pour sa komantr. Definitivman zot bezwen *advertise* plis. Me selman osi tou, mwan mon retoun ankor lo responsabilite nou bann atlet.

Akòz, en Komite Egzekitif i apepre konbyen? 5, 6 dimoun parfwa. E komite en atlet, parey ou'n mansyonn *basketball*, i en kantite klib sa. I preski mon krwar en bon pe distrik. I en kantite dimoun.

E mon krwar – se sa ki mon pe dir pou dir, ed nou. Mon pe dir, zot bezwen zot osi al ver zot lasosyasyon, zot komite, rode kan AGM. E zot osi pa esper si kekfwa petet –

Akòz i annan sa. Nou'n vwar enn de GM ki'n ganny fer. Kot i annan ki i pe konteste, ki rapor in vin kot nou. Nou'n dir fer ofisyel. In fer. Nou pe al dil avek. Kot si i annan –

I mannigans dan eleksyon. Dan sa bann eleksyon komite la, ki mon pe koz lo la. E i annan bann

dimoun ki anvi reste e i konnen. I konnen kekfw petet i annan en kanpanny pour en lot dimoun met kandidatir. Tousala i annan. Me zot dan minorite.

Mazorite nou bann dimoun ki kontan ki fer byen - ou konnen, nou ki bezwen fer sa. Si nou kree lespas, nou kit vid pour bann negativite antre. I pou antre. E keksoz i al mal letan bann dimoun pozitiv, bann dimoun ki annan *sport* aker i reste akote, i pa fer naryen.

E sa bann dimoun i bezwen zot osi, si nou annan nou en ventenn klib, nou, nou kapab fer kanpanny dir zot; desann, vin vote. I annan AGM e nou kapab – konmela nou konnen nouvel lo medya sosyal i al vitman.

La dir i annan en *show*. Tou dimoun i konnen aköz nou pe - annou fer parey avek *sports*. Sa ki konnen. I annan dimoun ki konnen. Partaze, fer tou dimoun konnen e nou kapab si nou anvi, nou kapab fer, pour ki sa dimoun ki pli byen kapab zere, li ki ganny eleksyon.

Akoz en kantite fwa mon tann konplent, par ler, apre letan zot vini mon dir; be wi, pour ki ou ti vote ou? Ou konpran? E zot al *vote* pour menm dimoun apre ki zot konplent. Sanmenm sa ki mon

pe dir, annou partaz sa responsabilite.

Akoz apre letan en komite legalman in etabli, ou bezwen travay avek sa ki la. E parfwa sa ki la wi, nou koz en pti pe pli byen. Me selman i pa bezwen ekout nou li. Apard si i kas en Lalwa, la nou kapab antre ladan ouswa en kriter.

Me si i pa'n kas en Lalwa, son lafason fer, son model ki i fer, nou pa kapab vini vin dir li ki i pou fer. Sa i son bann dimoun ki la ki form parti sa lasosyasyon.

Lasosyasyon i pa zis sa 5 Manm Egzekitiv li. I tou sa bann manm ordiner ki la aköz zot vote. E zot kapab zot osi si Konstitisyon pa bon, zot konnen ki mannyer. Si zot pa konnen, fer sa. Sa ki mon pe lans lapel ozordi atraver Lasanble, atraver ou Mr Speaker, pour nou fer bann dimoun –

Zot krwar zot napa pouvwar zot. Zot krwar tou pouvwar i dan lanmen Gouvernman. Pouvwar i avek en bon pe avek zot laba. E nou pou fer en pe sansibilizasyon. Vre nou osi nou merit fer en pti pe plis ledikasyon. Me selman atraver ou, mersi bokou Onorab pour ou'n anmenn sa kestyon ki nou'n kapab eksplike. Mersi.

MR SPEAKER

Mersi Minis. Nou a kontinyen.
Onorab William?

HON WAVEN WILLIAM

Mersi Mr Speaker. Minis, mon anvi demann avek ou, par lefe ki nou pe koz fitir *sports* Sesel e bon *management*. Akoz sa kestyon pe met for lanfaz lo bon zesyon.

Par egzanp dizon Lasanble nou anvi vote pour en dimoun, eski ou santi poudir i annan ase sansibilizasyon vizavi CV bann endividi ki pe prezant zot nominasyon pour zot ganny elekte lo bann federasyon?

Akoz pour mwan sa i tre enportan. Akoz ou kapab vin dan en *meeting*, me wi mon vwar bann dimoun fizikman. Be selman, nou napa en detay lo zot kapabilite pou kapab pran en *vote*.

Epi dezyenmman, ankor pour lavenir *sport* dan Sesel, mon'n vwar poudir Prezidan in bezwen enterfer lo kote *the Beach Soccer World Cup*. E mon krwar la zot pe byen prepare pour *Zwe CJSOI*. Me nou annan *Jeux des Iles* ankor dan 2 an.

Eski zot panse poudir bann dimoun lo federasyon dan lavenir i bezwen ganny en pti *allowance* en peyman, en reminerasyon? Akoz fer li volontarya ozordi Minis, partou pe rankontre bokou difikilte.

Mon pa pe dir pou dir nou pa devret promote volontarya. Me eski zot pe mazin en pti pe lo sa, ki fason petet – mon pa konnen lezot pei ki mannyer bann federasyon zot marse?

Me mon santi poudir sa osi i en eleman ase enportan. Akoz pou *run* en federasyon avek pe resours, difikilte ki ou fer fas avek e kalite mantalite, karakter bann dimoun, ensidswit. Petet zot devret pe konsider sa bann keksoz, se tou. Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi, Mr Speaker. Mersi Onorab William, pour ou bann refleksyon, analiz mon krwar vremen enportan.

Premyerman lo kote sansibilizasyon. Taler letan mon'n reponn kestyon pou regarde kwa ki nou kapab fer. Mon krwar Onorab Monthy ki'n demann sa.

Mon'n dir ki nou pou bezwen a longer ditan *train* nou bann dimoun. Bann zenn, kot nou ganny en nouvo zenerasyon bann ex federasyon. Bann Manm Egzekitif zenerasyon. E ladan nou kapab pran sa sizesyon definitivman lo sa ki konsern bann kriter ki bezwen avan ler

ou kapab kalifye pour ou vin lo Komite Egzekitif ki ou kapab fer sansibilizasyon.

En pe parey nou'n revolisyonz *Youth Assembly*, ki zot vote prezan tousala. Mon krwar la avek *sports*, definitivman mon krwar nou bezwen al dan sa direksyon. Mon dakor avek ou. Pour nou kapab konmans anmenn sa.

Me i bezwen fer en keksoz gradyel aköz kiltir pour lemoman zot pa ankor abitye. Ki gradyelman e ki prezan nou sanz sa. Be se sa rezon aköz nou pou bezwen sanz *NSC Act* legalman, pour nou kapab annan sa manda pour nou kapab fer sa.

Ki nou, nou kapab met regilasyon pour ki sa i ganny fer ki zesyon – lo kote zesyon e son lafason ki mannyer eleksyon i ganny fer, tousala nou ava kapab travay lo la. E i en travay longman ki mon krwar departman pe fer pour en pe letan la apre en kantite vatevyen, en kantite diskisyon avek zot. E ou dezyenn pwen valab ankor, definitivman.

Me ou konnen, i – mon krwar i – ki ou'n anmenn sa pwen devan la, i ase enteresan. Sa federasyon ki ou pe mansyonnen la ki nou'n bezwen enterfer, zot ganny peye zot par *FIFA*. Zot gannye peye par *FIFA*.

Federasyon Foutbol i mon krwar sel federasyon.

Mon krwar *FIBA* osi, me i pa ankor ariv Sesel. *FIFA* kot son *CEO*, son bann manm, sa bann dimoun ki zot annan *staff* permanan. *Staff* ki pa ni lo en *temporary contract*. Zot lo en kontra kot zot travay a plen tan avek federasyon. Zot sel federasyon ki zot ganny peye. Zot ganny transpor tou. Zot ganny tou keksoz zot.

So, mon pa konnen kantmenm zot ganny peye, i pa vadir ki ou annan lefikasite. I en lot keksoz. Me selman, definitivman mon dakor. Aköz ler *FIBA* ti vin Sesel lannen pase, sa Proze *Court Roche Caiman*, zot ti mansyonnen zot poudir omwen ki i ava annan enn ou 2 *staff*, regarde, aköz bann federasyon enternasyonal zot kapab ede.

Zot kapab ede kot zot, zot kapab peye pour ki ou annan ou omwen 1 ouswa 2 Manm Egzekitif ki zot, zot ganny peye, zot permanan. Ki louvraz i fer i kontinyen. Zot, zot ganny *trained* avek sa federasyon, sa lasosyasyon enternasyonal pour ki i fer.

I bann modernize, bann keksoz modern ki mon krwar nou pou bezwen konsidere. Mon krwar nou pou bezwen mazin lo la. E eski i pou sorti dan en Bidze Gouvernman? Sa i bezwen en deba en pe pli larz pour nou kapab fer pouvwar. E ki bann paramet, ki bann

regilasyon ki pou annan avek sa?

Me selman i en bon pwen mon krwar Mr Speaker. Mon krwar i en keksoz ki petet kekfw si nou pe progrese nou bezwen mazin lo la. Mersi.

MR SPEAKER

Mersi. Wi, Onorab William, ou kapab klarifye.

HON WAVEN WILLIAM

Klarifikasyon. Mersi Mr Speaker. Minis, i enteresan. Petet Seselwa deor la pa ti konnen poudir Federasyon Foutbol zot ganny peye.

Petet ti a bon nou donn en pti pe plis detay lo la. Akoz petet si i annan dimoun demen bomaten ki i doue, i anvi vin devan. Me i pa ti konnen poudir pe donn en pti granm.

Petet i osi i ava deside poudir; be *ok* la, *next election* mon a prezant mon lekor devan. So Minis, ki egzakteman bann benefis ki bann manm lo Federasyon Foutbol zot gannyen?

Me eski sa osi dan lavenir - par egzanp; eski *volleyball* i gannyen e ki lezot ankor ki ganny lasistans deor? Me ki nou, nou kapab fer e si pou promot lezot? Akoz lefe ki nou anvi promot tou bann *sport* an mazorite Sesel. Mersi.

MR SPEAKER

Wi, Minis, ou annan keksoz pou azoute?

MINISTER MARIE-CELINE ZIALOR

Mr Speaker, mersi bokou. Mersi bokou Onorab pour sa bann remark. Pour lemoman zis foutbol.

Bann larestan Lasosyasyon, Federasyon enternasyonal pa ankor ariv sa nivo kot zot fer sa. Parey mon pe dir, selman *FIBA* i pe – zot a pe travay lo la. Zot a pe fer serten propozisyon ki nou bezwen konsidere.

Me selman lo kote bann benefis sa bann dimoun foutbol, sa akoz i pa al Gouvernman, nou pa pou konnen ki zot gannyen e ki zot bann benefis ki zot gannyen. Selman nou konnen. E in toultan leka sa.

In toultan leka poudir sa *CEO* – i annan en *CEO* la i annan en pe bann larestan bann dimoun osi ki travay avek Federasyon Foutbol ki zot, zot ganny peye. Mersi Mr Speaker.

MR SPEAKER

Mersi. Onorab Sandy Arissol?

HON SANDY ARISSOL

Mersi Mr Speaker. Bonzour Mr Speaker. Bonzour Minis ek tou dimoun ki a lekout. Mon ti a kontan demann Minis 2 pti kestyon senp.

Nou pe koz federasyon e mon'n tann ou Minis mansyonn plizyer keksoz lo la. Mon ti a kontan demann ou, *Federasyon Sport* ki son konpozisyon li, letan ou pe koz Manm Egzekitif, ki son konpozisyon? Pour bann dimoun deor tande.

Dezyenmman, ki rol en federasyon dan lorganizasyon *sport* Sesel? Mersi Mr Speaker.

MR SPEAKER

Mersi. *CEO*, ou pou eksplike?

CEO NSC MARC ARISSOL

Ok. Normalman, nou annan sa ki nou apel *Executive Committee*. Annandler nou dir li – *shorten* li pour *ESCO*. I annan zot *chairman*. I annan de fwa kot i annan en vis-*chairman*. Sa i depan. Tousala pou depan lo zot Konstitisyon.

I annan Konstitisyon pou *allow* en *chairman*. I annan ki menm dir Prezidan tou. So, ou pou annan ou en *chairman*, vis-*chairman*, trezorye.

E parfwa i annan de fwa kot, parey mon dir ou, depan lo son Konstitisyon. I pou annan en vis-trezorye, vis-sekreter, sekreter, eksepera. Sa i bann *executive members*.

Apre ou pou annan bann – wi, apre osi annan de fwa kot ou annan ou sekreter zeneral *as well*. Ok? I tou depan ankor enn fwa lo Konstitisyon sa Federasyon Sportif. Apre ou

pou annan bann *ordinary members*. Wi.

Ok, federasyon son rol prensipal se pour li *manage* sa *sport*. Ok? E parey ou konnen i bezwen donn en *schedule* si pou annan bann *league*. Li ki organiz sa bann *league*. E nou, nou antre ladan zis pour nou siport zot avek en *Grant* pou ed zot ler zot pe *manage* zot *league*.

E osi zot pe – osi parey mon pe dir, zot osi bezwen annan sa bon relasyon avek zot *body* enternasyonal. Kot i annan de fwa kot nou, tou bann *chairman* nou peye pour zot al zot konferans ki ganny fer, swa anyel. Tou depandan lo zot federasyon enternasyonal. Mersi.

MR SPEAKER

Mersi. Onorab Loizeau?

HON NORBERT LOIZEAU

Mr Speaker, mon – annefe, mon plito annan – permet mwan fer en pti komanter pou ranforsi pwen Onorab William. Akoz in demann sa kestyon ki mwan mon ti anvi demande *in regards of* bann federasyon, bann manm federasyon i ganny en sipor monneter.

Akoz mon anvi konmsi siport sa en pti pe plis. Pa konmen en kestyon. Me konman en pti komanter, vi ki konman en federasyon-

MR SPEAKER

En komanter bref? En komanter bref mon a permet ou Onorab.

HON NORBERT LOIZEAU

Wi. Zot ki organiz federasyon. Tou bann levennman. Zot pa ganny okenn keksoz monneter konman en *allowance* or en peyman.

Me selman bann *referees*, bann *table officials* zot, zot ganny peye. Me selman zot dan *background* zot fer tou travay. Zis mon ti anvi fer en pti pe komanter lo la.

MR SPEAKER

Tre byen. Minis i le azout keksoz lo la?

MINISTER MARIE-CELINE ZIALOR

Wi, mersi Mr Speaker. Vi ki nou a pe osi koz lo evolisyon *sport* Sesel, *sports* i en Lendistri li. E Sesel nou annan en kiltir kot nou bann dimoun zot depan bokou lo Gouvernman pou pey tou keksoz.

Si nou anvi *sport* i evolye, parey nou anvi i evolye. Nou pou bezwen met lanfaz mwan mon krwar lo ledikasyon, lo *training*. E *train* bann dimoun ki zot kapab mobiliz resours zot menm.

Akoz danze ki nou pou al ladan la Mr Speaker, si Gouvernman i pey tou

Egzekitif. Kantmenm si *allowance* i fer sa la. Se ki apre Gouvernman ki pou annan kontrol lo tou *sports*, lo tou keksoz.

E mon mazine poudir nou pe fer mars an aryer si nou pou al dan sa direksyon. E i pou anpes devlopman evolisyon pour sa bann diferan disiplin pour zot kapab lo zot menm vin lotosifizans e lo zot menm osi annan zot bann prop komite teknik.

Annan tou sa bann keksoz ki parey *sports* aletranze nou bezwen swiv. Nou pa kapab les ki sa bann modernizasyon, bann fason fer aletranze, depas nou. E apre osi i riske met nou an kontrovansyon avek zot bann federasyon enternasyonal. Akoz i sipoze reste en keksoz endepandan.

Nou, nou bezwen met lanfaz. Mon konnen i en pe difisil la. Nou pou atrap lanmen nou. Nou atrap lanmen, nou ede. Me selman Mr Speaker, petet nou pe al dan en pti direksyon en pti pe danze 2 fwa. E annou pa mazine - nou pou bezwen fer en pe keksoz, en kiltir ki pou ale pour parey sa *stadium* nou'n fer 50 an Sesel.

Nou pe mazin nou ki la. Demen nou, nou pa la. Lot group dimoun ki vini ki annan bann *behaviour* ki kontrole, ki diktater. Nou kapab mazine

ki – nou kapab mazine ki pou arive avek *sports*.

I pou vreman difisil pour nou bann atlet kapab avek zot bann fanmir e kominote ganny sa laliberte pour zot kapab pratik zot *sports* dan en fason ki teknik, ki syantifik.

Dan plas kefwà en group dimoun, sirtou politisyen ki pe kontrole. So, mon pran kont sa sizesyon Mr Speaker. Selman mon ti ava kontan fer sa pwen devan. Mersi.

MR SPEAKER

Mersi Minis. *Ok*, i reste mwan Onorab Naidu. Onorab?

HON SATHYA NAIDU

Mersi Mr Speaker. Zisteman, byennet *sport* ti ganny konsidere parmi popilasyon konman priyorite Gouvernman, kan nou konnen poudir federasyon osi i annan en rol pou zwe.

Atraver *Beach Soccer*, nou'n realize poudir i annan en federasyon an partikilye ki kot kestyon in ganny poze lo la. Zisteman nou okouran poudir Gouvernman pa pou kapab enterfer dan zesyon en federasyon ouswa gouvènan en federasyon.

Me selman dan lenstans ki piblik an zeneral, bann siporter foutbol. Bann ki kontan sa *sport*, i annan pa mal konsern.

Kestyon se; eski pou napa okenn posibilite pou Gouvernman fer en demars avek *FIFA* pou fer sir ki Federasyon Foutbol i kapab annan en *financial audit* lo baz latransparans?

Prenan kont, i annan pa mal larzan ki pe ganny investir, pou asire ki larzan ki en lorganizasyon enternasyonal pe donn en federasyon lokal dan konteks nasyonal, Federasyon Foutbol Sesel par egzant, kot i kapab annan bann travay dan sa laliny ? Mersi.

MR SPEAKER

Mersi. Minis, ou annan en repons?

MINISTER MARIE-CELINE ZIALOR

Mr Speaker, mersi. Mersi bokou Onorab pour ou kestyon. Kot i konsern odit bann kont tou federasyon. Sa i Rezistrar.

E si i annan par egzant okenn, parey nenport ki *grievance* kot nenport ki lasosyasyon. Fodre son bann manm zot *lodge* en *grievance* atraver biro *PS* e sa i al kot Rezistrar.

I bezwen annan en *grievance* formel ki ganny *launched*. Ler i annan sa, la investigation i kapab ganny fer. Mersi Mr Speaker.

MR SPEAKER

Mersi. Nou'n termin sesyon kestyon la. E i reste mwan pou remersye Minis e son delegasyon pour zot partisipasyon e pour bann repons ki zot in donnen. Mersi bann Manm pour zot kestyon.

Nou pou pran poz dezennen parey *schedule* e Lasanble a rebran 2er apre midi. Mersi.

(BREAK)

MR SPEAKER

Bonn apre midi Manm Onorab. Bonn apre midi nou zofisye Lasanble e piblik ki pe swiv nou. Nou *item* lo nou *Order Paper* apre midi i *Statement* lo size *flexible working arrangement*.

E pou komanse e nou ava apel Minis ek son delegasyon silvouple. En enstan – an wi, *hold on* madanm, en pti moman.

Wi, Onorab Henrie ti'n demann mwan laparol pou prezant en *matter of privilege* ki mon'n aksepte donn li. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, mon ti'n vin vwar ou pou mon *raise* en *matter of privilege* anba *Order* 40. Parski dan *lunch break Bills Committee* in

zwenn pou konsider en *Bill* ki'n ganny gazete.

E tradisyon ki nou'n pran kot Lasanble se ki *Bills Committee* i bezwen pran en *Bill* avan, ki i fer *First Reading* e i konsern travay Lasanble.

Malerezman nou pa'n kapab fer sa, aköz le 3 Manm US, *United Seychelles* ki Manm sa Komite pa'n *turn up*. E mon santi poudir zot labsans in afekte privez - mon privez koman en Manm sa Komite, in afekte privez sa Komite e in afekte privez Lasanble pou anpes nou travay.

Aküz Mr Speaker, nou bezwen annan *Quorum* pou nou kapab fer sa travay. E enn sa letan, tou bann Manm *United Seychelles* ti lo *precinct* Lasanble Nasyonal.

Dezyenmman zot ti'n ganny sifizaman lavertisman depi avan wikenn, poudir Komite pe zwenn, ozordi.

E trwazyenmman zot ganny en *allowance* pou asiste bann komite. E mon krwar poudir i mal lo zot par pou fer sa kalite - annan sa kalite latitud ver travay.

E alor mon santi poudir privez pou mwan, pou Komite e Lasanble in ganny afekte par zot aksyon. Mersi Mr Speaker.

MR SPEAKER

Mersi Onorab. E wi, mon'n note ou *matter* ki ou'n *raise*.

Mon pe konsidere, i en sityasyon en pe nouvo. Vi ki zanmen nou'n ganny en kot *Bills Committee* in raport e ki i pa kapab fer zot travay aköz labsans bann Manm. Mon pou donn ou en *ruling* lo la Onorab. Mersi.

Madanm *Hansard* Raporter nou a kapab apel Minis e son delegasyon prezan.

Bonn apre midi Minis Francourt, Minis pou Lanplwa e Zafer Sosyal. E bonn apre midi Ms Veronique Bresson Sekreter Prensipal pou Lanplwa, Mrs Shella Mohideen *Chief Secretary Public Service Bureau*, Mrs Suzanne Morel *Chief Policy Analyst* dan Lanplwa e osi akote Mrs Audrey Nanon *Executive Director* dan Sekretarya Minis.

Byenveni zot tou pou partisipasyon dan *Statement*, e travay Lasanble lo size ki devan nou e sa se mon a relir li: -

Flexible working arrangement (staggered working hours) in public service starting 1st June 2025.

Avek sa, Minis mon a envit ou pou fer ou prezantasyon ou *Statement*.

**MINISTER PATRICIA
FRANCOURT**

Mersi Mr Speaker. Mr Speaker, permet mwan premyerman pou swet ou e tou

Manm Onorab sa Lasanble en bonn apre midi. E osi tou Seselwa e dimoun ki pe regard, oubyen ki pe swiv deliberasyon Lasanble Nasyonal partou lo form medya.

Mon osi remersi ou Mr Speaker, pou akord mwan sa posibilite pou fer sa *Statement* devan Lasanble.

Mr Speaker, mon *Statement* ozordi i konsern proze pilot ki pe ganny antreprann pou entrodwir fleksibilite dan ler travay dan Sekter Piblik.

Enn konsiltasyon inisyal ti ganny fer pou diskit diferan kalite laranzman travay fleksib, ki kapab ganny entrodwir Sesel, koman en nouvo form travay.

Sa ti permet pou idantifye bann defi aktyel e prezant bann pwen pou konsiderasyon pou fer sir ki sa bann pratik i ganny enplimante efektivman.

Mr Speaker, aktyelman serten lorganizasyon dan pei pe met en pratik ler travay fleksib, enkli travay kot lakour ki'n pran lanplwa apre lepidemi *COVID-19* an 2020.

Sa form travay pa tro ganny pratike Sesel, me i reste en demann, parski i kapab kontribye anver annan en balans ant travay e lavi famiyal, amelyor prodiktivite, permet lanplwa pou bann

group avek serten konsiderasyon spesifik e osi adres defi tel ki blokaz trafik.

Mon oule fer resorti ki serten provizyon legal i egziste pou sa fason travay. E mon ti a swete ki plis anplwayer i adopte ler travay fleksib kot i kapab.

Parey nou konnen. Avek devlopman dan lanvironnman lekonomi nou pei, sanzman dan Polisi i anmenn bokou eleman pozitiv dan prodiktivite ek satisfaksyon dan lanplwa.

Par kont, sa i kapab osi prezant bann defi ki enkli:- Serten travayer ki ler tre boner, pe - me zot pas bokou letan dan trafik, ki fer ki dan serten sityasyon zot ariv tar dan travay oubyen kit travay boner pou evit trafik.

Sa i tou le bomaten parey nou konnen e tar apre midi, ler laplipar travayer pe deplase an menm tan. Sa pratik i kapab retard louvraz ki'n ganny programmen e afekte bann fonksyonman pou delivre servis.

Aktyelman bann ler travay strik pa atir bann zenn paran, ek responsabilite lafanmir e travayer enformel, oubyen *casual* pou antre dan marse lanplwa.

Tradisyonnelman ler travay in reste statik e pa'n modernize pou zwenn devlopman global e bezwen lafors travayer.

Mr Speaker, lanfaz lo laranzman travay fleksib pe ogmante dan lemonn, koman en mezir ki reponn bezwen marse lanplwa e lekonomi ki pe evolue.

Be Sesel, ler travay fleksib in vin enportan, pou annan en balans ant lavansman ekonomik e byennet travayer.

Lalwa Lanplwa Sesel 1995, i fer provizyon pou diferan form Kontra Travay tel ki kontinyel, Kontra *fixed term*, *part time* e *casual* ki ganny pratike dan bokou lorganizasyon.

Lalwa i senpleman demontre ki en travayer pa devret travay plis ki 60 erdtan par semenn.

Malgre sa fleksibilite, serten anplwayer pa pe adopte nouvo pratik travay. Mon rekonnet ki serten kontrent tel ki enfrastruktir, latitid ek prodiktivite i en konsern pou anplwayer ki pe fer zot petet ezite, pou bouz lo ler travay fleksib.

Mr Speaker, prenon kont bann pwen ki mon'n eksplike oparavan. Gouvernman Sesel in anons lansman en program pilot, pou entrodwir travay ler fleksib dan servis piblik komansman le 1 Zen 2025.

Sa linisyativ ki'n ganny aprouve par Konsey Minis le 5 Mars, 2025, i reflekte stratezi

devlopman nasyonal e lanbisyon Gouvernman pou moderniz pratik travay, amelyor efikasite.

E asire ki servis piblik i reste fleksib anver bann bezwen ki pe evolye. Travay ler fleksib i permet bann travayer komans e fini zot lazournen travay a diferan ler, pandan ki zot asire ki zot anpli zot lobligasyon travay.

Dan sa proze pilot travayer dan Sekter Piblik pou annan fleksibilite pou swazir enn parmi 3 ler travay; - 7er bomaten ziska 3er e apre 3er apre midi, 8er ziska 4er ouswa 9er ziska 5er.

Pou asir kontinyasyon servis, sa bann ler in ganny propoze tou an asiran ki ant 9er a 3er tou travayer i devret pe travay.

Bann travayer pou gard an total 7 erdtan travay par zour, san kont ler manze. I enportan pou note ki sa legzersis pe ganny fer pou tou travayer dan Sekter Piblik.

Travayer pou bezwen diskrit ek sa ki responsab pou Resours Imen dan zot lorganizasyon, lo zot ler travay prefere.

Anplwayer e travayer pou bezwen agree lo sa opsyon ki'n ganny swazir avan ki i pran lefe. Mr Speaker, mon espekte ki sa proze pilot lo ler travay fleksib i anmenn bann benefis swivan; -

Redwir presyon kontinyel lo fanmir, amelyor balans lavi travay e lavi personnel, rediksyon dan retar pou ariv travay, satisfaksyon dan travay e osi ogmant prodiktivite dan bann lazans Gouvernman.

Konzesyon trafik i diminyen, a longer ditan e plis dimoun i ava ganny atire pou zwen lemonn travay, an vi ki zot kapab swazir diferan ler komanse ek ler fini depan lo kalite travay ki ganny antreprann.

An plis, sa proze i met lanfaz lo amelyorasyon dan servis ekselans, pou asire ki tou travayer servis piblik i pran zot responsabilite tre serye e manm piblik i benefisye avek en servis ki alaoter.

Mr Speaker, sa proze pilot pou ganny met an plas pou en premye peryod 4 mwan. Pandan ki bann lazans Gouvernman pe kontinyen swiv son lenplimantasyon e raport lo bann fakter; tel ki son adopsyon, performans bann travayer; si i annan amelyorasyon dan trafik ek lefe zeneral lo servis piblik.

Biro Servis Piblik pou kordin prosedir anmas lenformasyon e soumet en rapor detaye avek Konsey Minis pou revizyon.

Depandan lo rezilta i kapab annan bann

lamannman, ouswa sa proze lo ler travay fleksib i a ganny elarzi pou fer sa Polisi vin pli efikas.

Pou nou kapab vwar sa vre lanpler benefis ler travay fleksib, Departman Lanplwa in komans diskisyon avek *ILO* pou antreprann e resers lo nivo nasyonal.

Sa resers pou konplimant travay ki'n ganny fer par Departman Lanplwa e analiz nou konteks pou vwar bann servis an plas ki pou bezwen pou sa nouvo fason travay.

Zisteman, sa proze pilot ki pe ganny entrodwir pou ede pou akseler nou plan pou bouz lo en pli gran lanpler, an rekonesan sa ki i annan serten lorganizasyon travay ki'n deza fini adopte sa fason travay fleksib.

Mr Speaker, sa reform i sinyal en sanzman apropiye e modern dan servis piblik. E Gouvernman i reste angaze pou kontinyen develop en lanvironnman travay ki progresiv efikas, e ki adapte avek bezwen nou bann travayer e nou sosyete.

Nou pe swete ki sa proze pilot i ganny enplimante ek sikse pou en kolaborasyon kontinyel avek tou bann partener kle, pou promouvwar linovasyon ek sanzman pozitiv dan servis piblik.

Mon pe lans en lapel ek tou travayer dan Sekter Piblik, pou met zot azour avek sa proze pilot lo ler travay fleksib.

Sa fason fer pou anmenn bokou benefis pozitiv dan zot travay. Akoz i pou donn zot sa loportunite pou annan en balans ant travay e zot lavi fanmir ki vremen enportan.

Nou rekonnet ki pa tou travayer ki pou ganny egzakteman sa ler ki zot oule. Me solisyon i devret efikas e balanse pou asire ki travayer e osi lorganizasyon i sorti koman ganyan. Mersi Mr Speaker.

MR SPEAKER

Mersi Minis, pou ou *Statement*. Nou a pare pou pas mon krwar dan Staz Komite pou permet bann Manm enterakte avek lezot bann zofisye.

Mon pa tro siny keler nou bezwen pran en Mosyon pou pas dan Komite oubyen keler i permet ki nou zis pas direktteman, mon konnen sa kestyon in ganny leve.

Me selman pou asire ki nou lo bon platform, petet parey zot apel *abundance of caution*, nou pou demann en Mosyon pou nou pas dan Staz Komite a se moman.

Manm ki ava anvi prezant sa Mosyon silvouple? Mon a ganny en Manm

demann sa Mosyon. Wi, Onorab Arissol.

HON SANDY ARISSOL

Mersi Mr Speaker. Bonn apre midi Minis avek ou lekip, bonn apre midi tou dimoun ki a lekout.

Mr Speaker, si mon pe get byen anba *Order 84(1)*, kot nou anmenn en Mosyon pou demande ki Lasanble koman anba en rezolisyon nou *move the process* pou nou al dan *Committee Stage*, pour ki nou a permet Minis avek lezot son bann zofisye kapab reponn dan bann kestyon ki nou demande.

MR SPEAKER

Wi, mon krwar ou devret azoute Onorab, ki ou pe demann sa Mosyon pou *comply* avek *Order 38 (2)* pou permet kestyon anba Minis, avek bann zofisye.

HON SANDY ARISSOL

38(2) Mr Speaker?

MR SPEAKER

Wi, 38(2).

HON SANDY ARISSOL

Anr, *Statement yes, Statement by the Minister* wi, mon osi *move* Mr Speaker, anba 38(2) sa i a permet ki letan Minis in fini fer son *Statement* ki nou ganny bann larepons nesaser

avek osi son bann zofisye. Mersi bokou.

MR SPEAKER

Mersi. Mon a ganny segonnman silvouple? Onorab Esparon.

HON REGINA ESPARON

Mersi Mr Speaker. *Motion seconded.*

MR SPEAKER

Mersi. Manm a vot lo sa Mosyon. Mersi. Tou Manm in vote. Mersi. Mon pou swete ki Chairman *Standing Orders* i ekersi sa pwen lo kan ki nou devret pas en Mosyon pou al dan komite oubyen non. Avek sa serzan nou a kapab pas dan Staz Komite.

E nou a komans pran bann kestyon bann Manm. Mon oule dir mon annan lentansyon ale ziska 3er 30 lo sa *item*. E rezon aköz se ki si, parey nou'n fer dan lepace nou depas en pe, apre i koup nou lazournen aköz i tro tar pou nou al lo e lot *item*.

So, otan ki posib mon pou sey fer mannyer ki nou pran sa *item* ziska 3er 30. Mon komans avek Onorab Hoareau.

HON JOHN HOAREAU

Mersi Mr Chair. Bonn apre midi Minis avek ou delegasyon, bonn apre midi tou dimoun ki pe ekout nou.

Minis, mon ti oule en pti pe klarifikasyon wi, mon *welcome* sa lide *flexi hours* dan servis piblik premyerman, mon krwar i en progre i en pa annavans. Me mon ti oule serten klarifikasyon, e ki swiv sa nou pou vwar ki bann lofis ki rann en servis piblik i pou ou ver depi 7er ziske 5er?

Akoz si ou pe kalkile, ou annan 3 *sets of flexi hours* ki ou'n mete, son komansman i 7er-3er, 8er-4er, 9er-5er. So eski pandan en zournen nou pou vwar ki lofis piblik pou ouver 7er ziske 5er? E eski sa i pou annan en lenpak lo kote bidzeter pou sa lorganizasyon osi? Eski ou'n mazine si pou annan en lenpak bidzeter? Mersi.

MR SPEAKER

Mersi. Minis.

MINISTER PATRICIA FRANCAULT

Mersi Mr Speaker. Mersi Onorab. Si ou permet mwan mon a les CS Mohideen reponn *please*? Mersi.

MR SPEAKER

Mersi. Wi, PS.

CS PSB SHELLA MOHIDEEN

Mersi Mr Speaker. Mersi Minis. Onorab, premye bout ou kestyon lo si i pou annan sanzman dan *opening hours*. Pou le moman nou pe kit

opening hours pou reste 8er a 4er.

Me solman i annan bann diskisyon ki nou pe fer pou nou regarde par egzanp i annan dimoun ki ti a kontan al lofis en pe pli boner ou konnen aköz lofis prezan pou ouver pli boner 7er.

Ki ti a kontan al lofis en pe pli boner, e ouswa pou zot pa mank travay, ouswa pou al lofis apre 4er osi pou zot pa mank travay. Me sa i bann diskisyon ki pe ganny fer dan sa *piloting* pou nou vwar ki mannyer i ale, apre baze lo rezilta ki nou pou gannyen atraver sa analis ki nou pou fer apre *pilot* i bann desizyon ki nou a ganny fer.

Me selman pou le moman *official opening hours of* bann lofis i reste 8er-4er. E sanmenm sa dan kominike ki nou'n fer ki Minis osi in koz lo la, i annan sa ki nou apel sa *core hours*, *core hours* i vedir 9er ziska 3er fodre tou travayer i dan lofis e se la ki nou pou fer plis bann tranzaksyon avek piblik.

E eski pou annan kou bidzeter? Letan nou'n fer diskisyon nou pa'n vwar poudir ki sa pou annan okenn kou bidzeter. Mersi.

MR SPEAKER

Mersi *Chief Secretary*. Onorab Monthy.

HON PHILIP MONTHY

Mersi Mr Speaker. Bonn apre midi Minis avek ou delegasyon.

Mon kestyon Minis, ou konnen ler lekol i dan vakans e mwan mon fer sa remark akoz mon fer fas ek trafik tou le granmaten mon bezwen bouz granmaten i napa vreman sa problem trafik, akoz lekol i dan vakans i annan mwens transpor lo semen.

Be mwan mon ti a konnen lo zot kote ki mannier ki zot in fer sa refleksyon? Eski in annan diskisyon ek Minister Ledikasyon, eski ler lekol pou reste parey? Akoz i annan bann paran i annan zanfan. So, i pou enteres mwan pou vwar ki mannier ki zot in fer sa legzersis, sa kalkilasyon pou ler zot pe entrodwir sa konsep *flexible hours*? Ok, mersi.

MR SPEAKER

Mersi. Yes, lekol ki'n lev lanmen la? Ms Morel.

**CHIEF POLICY ANALYST
SUSAN MOREL**

Mersi Mr Speaker. Mersi Onorab pou kestyon. Byensir konsiltasyon ki nou'n fer nou'n konsilte diferan *stakeholders*, ki enkli Minister Ledikasyon avek *SLTA*, Lazans Transpor lo Later. E dan diskisyon nou'n vwar poudir ki

ler ki lekol i komanse e ler ki lekol i fini i en konponan trez enportan dan sa propozisyon pou fer ler travay fleksib.

So, pou lenstans nou ti'n deside ki ler lekol i pou reste pou reste- pou napa sa sanzman. Me selman pou annan sa *monitoring* ki pou kontinyelman ganny fer. E annefe i pe ganny ankouraze pou petet zanfan ki- pardon, paran ki napa zanfan petet zot bouz en pe pli boner, e oubyen zot swazir sa *staggering hours* 9er 5er ki ava petet annan en lenpak lo trafik ki ava redwir.

Donk, in annan diskisyon avek Minister Ledikasyon, *SLTA* parey mon'n dir. In osi annan diskisyon avek *SPTC* akoz nou bezwen prenon kont ki paran i pran bis e osi zanfan lekol. *SPTC* zot, zot osi zot *onboard*. Zot in pran sa dan en fason pozitiv kot zot ava fer lazisteman avek zot bann *schedule* an mezir ki zot pe *monitor*.

Se pour sa ki sa 3 mwan i en peryod pilot ki enportan pou nou kontinyelman *monitor* pou nou vwar kote petet pli tar i riske annan sanzman.

I ti menm annan diskisyon petet pou lekol komans ler lekol pou komans en pe pli tar. Me selman dan sa proze pilot pou le moman nou pou kontinyen *monitor* pou get reaksyon paran e manm piblik avek *staggered*

hours pou nou gete petet pli tar kote bann lazisteman i kapab vini. Mersi.

MR SPEAKER

Mersi Ms Morel. Onorab Henrie.

HON GERVAIS HENRIE

Mersi Mr Chair. Bonn apre midi *panel*. Mon premye kestyon Mr Chair, i konsern en pe sa ki Ms Morel fek dir aköz ler nou pou enplimant en tel Polisi i pou annan bann lezot partner ki bezwen ganny konsidere sa i enkli par egzanj wi, *SPTC*.

Aküz pou dimoun bouz granmaten, ouswa par egzanj bann servis ki ofer sipor bann travayer dizon i annan dimoun pa pran pti dezennen kot li e si i annan bann landrwa Anvil i kapab aste en keksoz pou li bwat ou manze granmaten. So ki kalite konversasyon i pe annan avek bann partener otour Sekter Lanplwa? Sa i mon premye kestyon.

E dezyenmman, dan sa 4 mwan ki sa proze pou lo en baz pilot, eski i annan bann lezot konponan inovativ ki nou kapab anmenn ladan? Par egzanj sa kestyon *parttime* oule ki dimoun i travay *full time*. Ouswa *work from home* akote sa *flexible working hours*. Mersi.

MR SPEAKER

Mersi. Minis, i a zis endike. Ms Morel.

**CHIEF POLICY ANALYST
SUSAN MOREL**

Mersi Mr Speaker. Mersi Onorab, pou kestyon. Zis petet pou remet lanfaz ki in annan diskisyon avek plizyer *stakeholders*. I annan en group zot ki nou ti fer en rankont avek zot lannen oparavan e apre resaman ler propozisyon ti ep al lo Konsey Minis.

Par egzanj parey mon'n dir avek *SPTC*, *SLTA*, Minister Ledikasyon, *IECD*, *DICT even*, nou ti'n annan sa diskisyon avek zot. Menm Departman Lapolis, byensir i annan serten *stakeholders* ki pou fer serten lazisteman pandan proze pilot, par kont i annan serten ki petet zot pou vwar en pe ki rezilta sa *staggered hours* in anmenn pandan sa 3 mwan e apre zot a kapab fer serten lazisteman.

So bann diskisyon nou'n pran kont tou sa bann keksoz, departman osi nou'n menm kontakte serten lorganizasyon dan prive, parastatal ou Gouvernman, kot nou'n demann en pe ki tandans zot pe vwar dan bann aplikasyon ki pe vini pou *staggered hours* i plis dimoun travayer pe swazir sa *staggered hours* oubyen pe reste lo ler travay avan.

Ou kapab dir i preski balanse kot ou vwar pou lenstan, petet avek ziska ler ki bann aplikasyon i antre kot nou vwar ki i annan plizoumwèn i balanse kot sa ki pe kontinyen 8er, 4er e kot sa ki pe fer *staggered hours*.

Bann landrwa osi kot i vann manze par egzanp *take away* i annan serten ki nou'n kontakte zot pou bezwen aziste akòz pou le moman zot pw vwar ki zot pou bezwen petet revwar en pe zot bann ler an mezir ki travayer i adopte sa *staggered hours*.

So pou lenstans zot pa ankor *fully* fer en gran sanzman setadir dan zot ler ki zot vann manze, me an mezir ki travayer i komans sa pilot ki le 1 Zen ki pou *fully*, ler tou dimoun in fini *submit* son aplikasyon la zot ava vwar ki manner nou ava fer sa lazisteman.

So, nou annan sa bann diskisyon nou pe rode sa bann lenformasyon. Mersi.

MR SPEAKER

Minis, ou kapab azoute?

MINISTER PATRICIA FRANCOURT

Mersi Mr Speaker. Mersi Onorab, pou ou kestyon. Onorab, petet mon a fer resorti nou prezans ozordi la i zisteman petet leta nou pe koze dimoun pe ekoute pou zot

konpran en pe pli byen sa *pilot*, me osi pou zot vwar bann loportinite.

Letan mwan mon asize mon mazin ek mon tim nou koze, nou war en kantite loportinite ki kapab ouver dan bann pti *small businesses and stuff like that*. So dimoun i bezwen konpran ki nou pe anmenn devan e ki bann loportinite ki sa i kapab anmenn.

Par egzanp osi i pe fini 5er, *will the* landrwa kot i pe servi manze avek *staggered hours you know*, e ki sa pou anmenn si par egzanp Anvil ti annan aktivite *what does that mean you know?* So, mon krwar tou bann sekter i en loportinite pou zot komans *think outside the box* en pti pe.

So, to come back to your questions, parttime hours parey mon'n fer resorti dan Lalwa i deza egziste li, solman parey mon ti pe dir petet i annan ezitasyon *for us to, as employers* pou nou al ladan.

Me solman, napa naryen ki anpese, petet nou'n tradisyonnel avek bann erdtan 8er-4er *for so long*, ki nou pa pe *think* poudir be *this is possible, 20 hours a week* en dimoun i oule fer en louvraz *it's possible*.

So, i *again* bann keksoz pou nou regarde poudir be *ok*, ki sa group dimoun ki al benefisye avek *part time hours*

and so on? Will it be the working mums? Would it be en lot kategori dimoun par egzant ki pa kapab travay the whole 60 hours and so on?

And then nou the other question from working from home, pou le moman nou napa sa policy e therefore nou napa striktir se pour sa ki nou pe reste zis avek enn koman en pilot and the who knows further on nou kapab regarde. Me solman i pa defann ki private sector pe deza enplimant working from home.

I annan zot ki annan bann bon *policy in place*, bann bon *structure in place* e nou, letan nou pe fer nou bann konsiltasyon e nou pe *still gather* nou bann lenformasyon. Nou pe koz avek bann ki nou konnen ki annan bann bon pratik *already*, bann bon model pou nou kapab aprann *if we have to come to this further on then at least we know* en pti pe manner keksoz pe marse lo teren. Mersi.

MR SPEAKER

Mersi Minis. Onorab Romain.

HON GEORGES ROMAIN

Mersi Mr Speaker. Bonn apre midi Minis ek ou *panel*. Minis, ler mon'n asize mon'n ekout ou byen, mon osi mon pou dakor ek mon bann koleg ki i en tre bon nide aköz

kantmenm nou ptipti selman sa *traffic jam* i en gro problemm Sesel.

E alors ler mon pe regarde mon'n ekout ou baze lo sa 4 mwan sa *pilot study* ki zot pou fer zot pou pran zis en opsyon. Si mon konpran byen kekfw. Me selman ler mon pe regarde mon krwar kekfw sa i en sizesyon ki mon pe mazine si i pou posib pou annan 2 opsyon ladan, kekfw 7er-3er avek 9er-5er?

Rezon parey Onorab Monthy in fer resorti, ki ler i annan vakans napa *traffic jam* vreman lo semen. E alors vi ki enn nou koleg in fer resorti ki zot pa pe mazin sanz ler leköl, pou mwan sa rezon ki zot pe dir sa, aköz ler ou pe regarde leköl i komans 7er 45 e savedir bokou bann paran ki pe anmenn zot zanfän leköl zot pou bezwen kite probableman ki pe servi transpor zot pe kit kot zot kekfw dan bann ver 6er an montan.

E savedir zot, zot kapab fini travay 3er e menm zot kapab pran zot zanfän retourn ek zot aköz leköl pou'n fini. Tandis ki lezot dimoun ki napa zanfän zot pou tant pou desan pli tar zot ava ganny san enn opsyon 9er a 56er.

E mon pou dakor ek Onorab Hoareau, aköz ou kapab *extend* servis 7er ziska 5er. Kot Seselwa i ganny en pli

bon servis lo en pli longer ditan osi tou.

Alors Minis, mon kestyon sa i ti en sizesyon, alor si ou kapab pe mazin osi dan sa lanpler, an vi mon konnen zot pe al fer *pilot study* pou 4 mwan. Sa i mon sizesyon ki mon ti a kontan kekfwa si ou ti kapab konsidere aköz mon krwar sa i pou ede ki ler i annan lekol ki sa pa vreman sa ap vreman sa.

Alors, mon pe mazine ki ou panse lo sa sizesyon kekfwa ki mon'n met devan? Mersi Mr Speaker, Mr Chair.

MR SPEAKER

Minis, reponn oubyen *panel*.

CHIEF SECRETARY PSB SHELLA MOHIDEEN

Onorab, si mon'n byen konpran ou kestyon se ou pe regarde si en anplwayer. En *employee* i kapab swazir 2 opsyon?

HON GEORGES ROMAIN

Mersi Mr Chair, permet mwan. Ki mon pe demande dan en serten sans zot pou pran zis en opsyon baze lo zot *pilot* ki zot pou fer apre zot *study*.

Mwan ki mon pe demande, si Minister i kapab konsidere kekfwa pou annan 2 opsyon kot sa dimoun, sa travayer i ganny sa opsyon pou li komans 7er-3er en lot travayer li i komans 9er-5er?

Zot tou zot pou travay 7erdtan.

Me selman sa enn ki annan zanfann pou al lekol probableman li i pou kit pli boner ou anmenn son zanfann lekol aköz lekol i komans 7er 45. Tandis ki sa en ki napa zanfann li i pou desann pli tar, e sa kekfwa i a ede pou tir en pe sa blokaz trafik dan semen.

Prezan lo- *on top of that*, nou ganny en pli bon longer ditan lo kote servis ant 7er ziska 5er. Sa ti vreman mon kestyon. Mersi Mr Chair.

MR SPEAKER

Mersi, *Chief Secretary*.

CHIEF SECRETARY PSB SHELLA MOHIDEEN

Mersi Mr Speaker. Mersi Onorab. *Actually*, Onorab i egzakteman sa ki nou pe enplimante.

So, travay i depi 7er ziska 5er. Prezan en travayer li par egzanp nou pe regard bann manman ki bezwen anmenn zanfann boner lekol, petet zot, zot a pran sa opsyon 7er-3er, aköz 3er apre i ava donn zot loportinite osi pou fini en pe boner pou zot komans anmas zot zanfann.

8er-4er sa i tradisyonnell be osi petet bann ki zot, zot napa bann *commitment* ki kapab vin en pe pli tar, petet napa zanfann pou anmenn lekol e i *ok* pou zot reste en pti

pe pli tar apre 4er, zot, zot kapab pran sa opsyon 9er-5er.

E, letan nou'n lanse dan Gouvernman, nou'n osi dir avek landrwa travay i enportan ki nou travay ansanm pou sa vin en sikse. Si tou dimoun i vini i dir nou tou nou oule komans 9er-5er nou pa pou vwar son benefis. Si nou tou nou vini nou dir nou oule komans 7er a 3er nou pa pou vwar son benefis.

So, i bezwen en travay kolektiv ki nou tou nou oule ki wi, lorganizasyon, pei i benefisye i kapab donn par egzanp bann paran ki annan zanfan en pe priyorite, pou zot al swazir avan lezot bann nou petet ki napa sa *commitment* zanfan.

Me solman sa fleksibilite Onorab ki ou'n koz lo la i egzaktaman sa ki nou pe komans *pilot*. Mersi Mr Speaker.

MR SPEAKER

Mersi, *Chief Secretary*. Onorab Mondon.

HON TERENCE MONDON

Mersi Mr Chair. Minis, mersi pou sa bon linisyativ. Minis in mansyonn travay kot lakour. Eski *Minister* pe osi mazin revwar lafason ki zot servi lespas lofis vi ki pou annan fleksibilite travay kot lakour osi petet pou zot maksimiz lespas? Mersi.

MR SPEAKER

Mersi Onorab. *Chief Secretary* pou pran laparol?

CHIEF SECRETARY PSB SHELLA MOHIDEEN

Mr Speaker, petet pou mwan fer en pe komanter lo *work from home* i en pratik ki i ganny fer. Me selman i ganny fer dan en fason en pti pe *ad hoc*. I pa ankor ganny kontrole par en *policy*. Me selman nou'n komans avek travay ki nou pe fer avek Departman Lanplwa, *Public Service Bureau*, i en pratik ki nou'n komans regard ladan.

Me selman li i en pti pe pli konplike petet sa ki nou pe entrodwir, sa *flexible working arrangement*. Par egzanp zis pou mwan donn ou enn de pti keksoz ki nou pou bezwen regard ladan si nou pou entrodwir *work from home* - par egzanp en *workstation setup* pou en dimoun. Konnen en bon pe dimoun konmela i *work from home* petet i asize ek son *laptop* lo en *dining room table*. *This is not* en bon pratik.

Si ou pe travay dan lakour ou pou bezwen annan en *proper* - sa ki nou apel en pti lofis dan lakour kot ou pou annan ou *desk*, ou pou annan ou *chair*. Akoz si ou pe fer li *one-off*, i pa pou annan lenpak lo ou *where as* ou pe fer li en *long term*.

Ou bezwen annan en landrwa ki konfortab. I annan sa ki nou osi regarde parey *Data Security*, si mon mont ek en *file* en travayer kot mwan pou mwan al travay lo la. Lekel ki *ensure* ki sa lenformasyon ki lo *file* i reste konfidansyel ?

I annan osi teknolozi, mon pou bezwen fer sir ki tou travayer i ganny swa en *desktop* ki enstale kot li ouswa en *laptop* ki mon donn li. So, Onorab Hoareau ou ti'n demann mwan bann zafer Bidze pou sa enn ki nou pe fer. Si nou pou al dan *work from home*, i pou annan bann kou bidzeter. So, nou bezwen planifye li en pti pe pli byen avan ler nou enplimante.

So, pou sa rezon nou pa'n al dan tou le de, nou pe komans avek sa enn ki *staggering working hours*. Nou pou pilot li, nou pou anmase nou pou regarde ki mannyer nou *fine tune* li. Me selman i pa vedir ki nou pa pe *explore* sa opsyon *work from home*. I pe ganny eksplote, i pe ganny diskite. E *at the right time* nou ava tournen pou nou enform Lasanble kan i pou ganny enplimante. Mersi Mr Speaker.

MR SPEAKER

Mersi *Chief Secretary*. Swivan, Onorab Roucou.

HON MICHEL ROUCOU

Mersi Mr Chair. Bonn apre midi Minis, lekipe. Minis, ou'n koz en pti ep lo bann travay fleksibilite. Parey si mon'n tann ou byen ou dir 7er-3er, 8er-4er, apre ou'n dir 9er-5er. Nou annan sa gran group dimoun ki pe travay *shift*, bann ki fer bann gran *working hours*. Parey mon konnen i annan bokou bann travayer sekirite lo por. I annan *airport* osi tou.

Si i annan en serten travay osi, mon konnen zot pa pou benefisye anba la, la. Si i annan serten travay ki ou Minister pe fer ki zot osi petet dan lefitir i ava fleksibilite ler travay ki zot osi zot a kapab benefisye lo kantite grander letan ki zot fer dan *shift*? Mersi.

MR SPEAKER

Mersi Onorab. Wi, PS, ki pou adrese.

PS VERONIQUE BRESSON

Mersi Mr Speaker. Bonn apre midi Mr Speaker. Bonn apre midi tou Onorab prezan e tou dimoun. Onorab, mersi pou ou kestyon. Lalwa Lanplwa, Lalwa aktyel i donn en spesifik *bracket* ler travay ki en dimoun i kapab travay ladan. Savedir Lalwa i dir ou pa kapab plis ki 60erdtan par semenn.

Prezan i depan lo en anplwayer. Sa kestyon in leve

taler konsernan *part-time*. *Part-time* i egziste li, i pou toultan egziste e en dimoun ki santi i anvi travay *part-time* i diskite avek son anplwayer pou li pran sa opsyon pou li travay *part-time*. E pou travay *shift* nou konnen sa i pa en keksoz ki ou kapab dir ki i en *flexible hours* pou adapte avek.

Unless sa anplwayer, sa lorganizasyon li menm ki li i kapab annan serten laranzman ki kapab fer pou fer sa antre dan son lorganizasyon. Me selman sa travay fleksib i pli adapte avek bann dimoun ki annan bann travay fiks, bann ler travay fiks pou ou war son posibilite ki mannyer i kapab aranz ou lorganizasyon.

Akoz mazine travay *shift* i en fason travay spesifik ki en lorganizasyon i adopte depandan lo sa servis ki i pe donner. Si par egzanp nou pou pran en restoran, i pa pou kapab adopte en fason travay fleksib si son servis ki i pe donner pou ganny afekte. So, i plito adapte avek bann ler travay ki fiks apre sa servis ki sa landrwa pe ofer.

Par egzanp nou pou vwar kantmenm dan bann ler travay fiks, lorganizasyon parey dan Gouvernman oubyen dan prive, ou pou vwar ki sa travay fleksib i pa pou adapte avek bann dimoun spesyalman ki fer bann

support service parey en driver, en *telephone operator*, en *cleaner*. Kantmenm i adapte avek son lorganizasyon, me selman li sa endividi pa pou kapab sa fleksib adapte pou li, *ok*. Mersi Onorab.

MR SPEAKER

Mersi PS. Onorab Labrosse.

HON RICHARD LABROSSE

Mersi Mr Speaker. Bonn apre midi Minis ek ou delegasyon. Minis, mon vremen ankouraze avek sa ki mon pe tandé ozordi. Parske sa osi i form parti bann sanzman ki dimoun ti a kontan vwar. Mr Speaker, mon 2 kestyon ki mon ti a kontan demann Minis ozordi la, Minis, mon'n ekout ou byen pandan mon prezantasyon. Me selman i annan en keksoz ki mon pa'n tann ou koz lo la.

Ozordi mon konnen dan bokou landrwa travay parey dan bann landrwa Gouvernman osi i annan sa mo disiplin osi kot nou koz latitid travay ki touzour ganny monte parmi lapopilasyon sirtou ler zot pe servi sa zot bann servis.

E ozordi ler nou pe koz lo sa nouvo proze pilot, eski ou Minister zot in fer kek travay oubyen zot annan kek Polisi dan zot lanmen la, ki pou fer sir ki standar travay pa tonbe,

ouswa an dot mo parey nou dir an Kreol, bann servis ki dimoun i gannye zot pa pe war zot ganny afekte, dan sa si i annan bann travay ki'n ganny fer sirtou dan servis piblik ki nou pe koze?

Minis, apre mon dezyenm kestyon mon ti a kontan konnen ler nou pe koze ozordi en lot keksoz ki mon'n santi pandan sa 4an osi ki nou'n mank dan pei - I *mean* ler nou'n vini sirtou nou'n vwar se ki formasyon bann travayer, konnen ler nou pe koz dan servis piblik. E la ozordi nou pe al lo en nouvo proze pilot ki tre byen, eski la si ou ti kapab konfirm ek Lasanble si kekfw a i annan bann *training sessions* ki zot Minister pe ganny fer avek bann lorganizasyon pou zot kapab adapte avek sa nouvo proze? Mersi Mr Speaker.

MR SPEAKER

Mersi Onorab. Minis, ou annan laparol.

MINISTER PATRICIA FRANCOURT

Mersi Mr Speaker. Mersi Onorab, pou ou kestyon. Onorab, en vreman pwen enportan ki ou'n fer resorti *in terms of* sa nouvo fason fer nou konnen poudir i annan travayer i annan latitud, i annan konportman *and so on*.

Mon'n konsilte avek bann Minister letan mon'n a *few days ago*. Eski sa legzersis pe ganny fer dan zot Minister *in terms of* sa nouvo laranzman travay? Mon pa krwar - mon krwar sa konversasyon i pa en konversasyon kot ou asiz ek sa dimoun ki i dir ou wi mon oule fer 7er-3er, 9er-5er tan,tan,tan.

I en konversasyon ki pli *deep* ki sa. I en konversasyon ki ou ganny sans koz ek sa dimoun en pti pe lo ki ou pe remarke mannyer i travay dan *organization*, eski i annan en bon konportman pou le moman? Eski i annan en bon latitud? Eski i vin travay a ler? Konmsi i en konversasyon sa ki nou'n ankouraze pou arive avek travayer pou nou kapab tonm lo sa konklizyon ki sa bann erdtan ki nou pe swazir. Mon a donn ou en legzanp.

Si par egzamp ou ganny ou en travayer ki toulezour dan 8er-4er i vin tar. I pou vreman difisil pou son *supervisor* dir li pran sa enn 7er-3er. Ou konnen i annan bann konversasyon ki anmezir ou pe koze ou pe reflekte avek sa travayer. E pou mwan sa mon'n war li koman en bon legzersis, aköz tou Minister, son *HR* avek zot bann *supervisors* i bezwen annan sa konversasyon pou garde kwa

ki pe marse, kwa ki pa pe marse dan ou ka.

Akoz tou dimoun i bezwen ganny sa konversasyon, si zot pa ankor gannye i *still in the process, right?* So, konportman i bezwen antre ladan, latitid i bezwen antre ladan, *trust*, ki mannyer ou *trust* sa dimoun poudir letan i pe vin 7er-3er ki kekfwa laplipar dimoun pe vin 8er-4er. Be letan li in vini i prodiktiv, i a pe travay. I pa pe zis bwar *café* asize lo en *settee*. Apre ler son kanmarad i vini 8er prezan ki li i ale.

Se sa bann *monitoring* ki bezwen arive dan bann *MDAs*, pou fer sir poudir i annan lizye konmsi ki pe obzerve e evalye, e kolekte lenformasyon e se sa ki pou kapab ed nou pou nou kapab fer sa bon evalyasyon. So, mon poudir *trust* i vreman en pti mo, me selman i en keksoz ki travayer i bezwen enplimante. E fer sir poudir i en pratik ki ariv souvan.

I deza en keksoz ki nou respekte avek travayer. Me parey nou konnen pa tou dimoun ki ou kapab *rely* lo li *to be trustworthy*. E pou fer sir pou zot kapab realize poudir zot sa ki Gouvernman in anmennen i en bon keksoz pou Sesel, pou travayer, pou anplwayer. *I mean this is one of the best pilot* ki mon krwar Sesel pe resevwar *at the moment*.

E nou'n vwar poudir dimoun pe resevwar sa vreman byen. Dan dele letan ki'n donn zot poudir ek zot *you have to submit your* aplikasyon. Dimoun in fer sa byen, e dimoun in *respond*. So, in montre ou poudir dimoun in dir "*you know what we know what is good for us*".

Si ou konnen sa ki bon pou ou, alor i enportan pou delivre fer tou sa ki ou annan pou fer pou fer sir ki sa kalite fason travay ek sa loportinite i reste. Akoz si i pa marse nou bezwen revwar. So, responsabilite i lo tou dimoun *out there to make sure that it's done*.

Petet mon a les Mr Speaker, CS koz lo *training* pou si pou annan *training* an plas pou sa, *and then lo standards* petet. Mersi.

MR SPEAKER

Mersi. *PS*, pou kontinyen.

CHIEF SECRETARY PSB SHELLA MOHIDEEN

Mersi Mr Speaker. Petet Onorab zis avan mon koz lo *training* mon ava azout en pti pe lo sa ki Minis in koz lo la. Mon krwar mon bezwen osi met lanfaz lo sa *Performance Management Systems* ki *part of RBM* ki nou pe enplimante dan Gouvernman.

Mon ankouraze ki nou komans vwar en pe rezilta

pozitiv, kot travayer i komans konpran ki pou li ganny en *high rating* a lafen lannen i pa zis lo son bann lobzektif, i osi latitud ki nou mezire atraver bann konpetans. Travay ki nou pe fer Onorab nou pe sanz kiltir ki'n egziste pou bokou letan, kot *appraisal* pa ti vreman en kiltir dan Gouvèrnman.

E mwan letan mon antre dan Gouvèrnman mon krwar mon'n deza dir sa isi dan Lasanble. I annan dimoun pou 5an in dir ou i pa'n deza ganny *appraised*. So, nou pe kree en nouvo kiltir e sa nouvo kiltir ki nou pe kree, kot nou pe met lanfaz lo performans atraver sa ki nou apel sa *performance contract* i pou anmenn benefis.

E nou'n swazir la pou nou anmenn sa *flexible working arrangements*, akòz nou annan osi sa *tool* parey nou dir ki nou kapab servi osi pou regarde eski sa fleksibilite pou annan en lenpak pozitiv lo performans. E i en keksoz ki nou pou mezire dan sa letan pilot. Kot *training* i konsènen Onorab, i annan en kantite *training* ki pe ganny fer dan Gouvèrnman.

E mwan koman *Chief Secretary* petet mon pa tro satisfè lo sa ki nou apel *return on investment*. Konmsi pou vwar ki mannyer sa *training* prezan i anmenn sa servis de kalite. E i annan en travay ki

nou pe fer pou nou regarde. Eski sa *training* ki nou pe fer i *training* ki ideal? Eski nou pou bezwen sanz en pe sa *training* ki nou fer? Ki nou anvi Gouvèrnman i *invest* parey mon dir i *invest* en kantite dan *training*.

Me selman ki mannyer nou pou vwar *return* lo sa *investment* i en travay ki nou pe fer an se moman. Me selman *training* en kantite e ganny fer. Mersi.

MR SPEAKER

Mersi CS. *Sorry*, ennler mon melanz CS avek PS. Onorab Samynadin.

HON KELLY SAMYNADIN

Mersi Mr Speaker. Bonn apre midi Minis avek ou *panel*. Minis, mon ti a kontan premyerman konnen si i annan okenn provizyon ki an plas pou bann anplwaye ki petet pa pou pe kapab partisip dan sa proze pilot an rezilta natir zot louvraz oubyen akòz bann kontrent operasyonnel.

E dezyenmman Minis, ou'n mansyonn bann lavantaz *flexible working hours*. So, mon ti a kontan konnen kwa ki zot pou e obzerve koman amelyorasyon vizavi prodiktivite par rapor avek sa proze pilot? E ki mannyer sa pou ganny mezire *across* bann diferan departman? Mersi.

MR SPEAKER

Mersi Onorab. Minis, diriz ou *panel please*. *Chief Secretary*.

CHIEF SECRETARY PSB SHELLA MOHIDEEN

Mr Speaker, mersi. Mon ava pran premye bout kestyon. Onorab sa enn linisyativ ki nou pe enplimante la *unfortunately* parey PS i eksplike pa tou dimoun ki pou kapab benefisye, *ok?* Par egzanp si ou en travayer Imigrasyon ou travay *airport* ou pou bezwen la letan sa avyon i arive pou ou fer *clearance*.

So, *unfortunately*, natir travay serten dimoun i pa pou posib pou nou kapab enplimante. Me selman i pa anpese pou nou anmezir nou modernize, nou *benchmark* avek lezot *practice* si nou vwar i annan bann linisyativ ki ava benefisye bann travayer nou a kapab enplimante. Me selman pou le moman, i annan travayer pa pou benefisye. Mersi.

MR SPEAKER

Thank you. Ti annan lot pwen pou... i *ok?* Nou a kontinyen. Onorab... i annan lot pwen?

CHIEF SECRETARY PSB SHELLA MOHIDEEN

Ok. Mr Speaker, mon a pran sa dezyenm bout osi. I annan bokou benefis ki nou pe

ekspekte, akòz ou gannnen kantite konsern avek travayer dan Gouvènmàn. Par egzanp ou annan bann manman ki dir ek ou koumsa letan 3er i sonnen son lespri pa anpe, akòz i pe mazinè lekèl ki pou anmas son zanfan lekòl.

Ouswa i annan travayer ki dir ek ou koumsa letan in pas 1erdtan dan bis, letan i ariv travay sa long traze i deza fatigue avan ler i ariv travay. Nou pe swete sanmenm sa nou pa pe fer li gran pou komanse, nou'n fer pilot en mwan preparasyon avek 3 mwan enplimantasyon pou nou regard ki bann benefis nou pe vwar.

E bann benefis ki nou pe swete vwar se enn nou pe swete i ava annan *improvement* dan *service delivery*. Si ou en manman ki abitye toultan pe dir avek mwan koumsa letan 3er i sonnen, mon pe kas latet mon pe mazinè lekèl ki pou anmas mon zanfan. Ki la mon pe dir ou, ou kapab komans 7er pou ou ale 3er.

Mon pe ekspekte prezan letan ou la dan lanplwa pou sa 7 erdtan ou pe delivre. Nou pe osi regarde ki si ou pe delivre prezan nou bann *customer* i ava ganny en servis ki alaoter. E nou pe osi swete ki sa konzasyon trafik, nou ava diskite. Mon krwar mon koleg Susan in mansyonn nou ti fer

bokou diskisyon avek bann *key stakeholders*. *SLTA* pe *monitor* trafik pou nou regarde.

E nou pe swete parey i ete dan vakans, ki avek sa *staggering working hours* i ava annan mwen konzasyon trafik. E ki mannyer nou pou mezire? *Public Service Bureau* in deza fer en pti kestryonner, ki nou ti sirkile ansanm avek *the policy* ki nou pe regarde ki kantite anplwayer ki pe adopte sa *staggering working schedule*.

Nou osi oule regard en pti lenpak lo *service delivery*. Nou oule osi mezir *employ satisfaction* avek zot *productivity*. E osi nou oule regard en pti pe bann *challenges* ki nou'n rankontre. So, anmezir nou ale nou pou kontinyen anmas lenformasyon pou nou kapab anmenn bann *remedial strategy* parey nou dir. Mersi Onorab. Mersi Mr Speaker.

MR SPEAKER

Mersi, *Chief Secretary*. Onorab Arissol - Sandy.

HON SANDY ARISSOL

Mersi Mr Speaker. Bonn apre midi Minis e ou lekip e tou dimoun ki a lekout. Letan mon'n ekout Mrs Mohideen koze an relasyon avek diferan kalite travayer ki pou kapab, ki pou benefisye atraver sa ler fleksib. Mon mazine bann

ansennyan zot enn bann ki pa pou tonm dan sa kategori.

Parske si mon mazin byen, *Polytechnic* toultan bann ansennyan ti vini letan zot annan zot peryod *teaching*. Me par kont dan bann lekol Gouvernman bann ansennyan zot bezwen la apartir 7er annou dir ziska 3er letan lekol i large. So, mon pa konnen si zot in pran kont bann ansennyan kekfwa depandan zot *timetable*.

Si mon pa pe *teach* ant 9er, me mon *teach* 10er an desandan mon osi mon kapab vini sepa 10er ziska ki ler. Me sa ki mon anvi demande an relasyon avek ledikasyon, eski dan tou sa bann travay ki nou pe fer an relasyon avek ler travay fleksib, eski Minis ou osi ou pe fer en travay avek Minister Ledikasyon kekfwa osi pou nou get ler ki lekol i komanse dan nou pei an relasyon avek travay fleksib pou bann ansennyan e bann *non-teaching staff* dan bann lekol.

Olye lekol komans 7er edmi, pou fini 2er 45, kekfwa nou a kapab re balans li ozordi avek lemonn ozordi. Ler travay i fini paran parey Mis Shella in dir taler, *sorry* toultan mon'n apel li Mis Shella - Mrs Mohideen, ou'n dir pou dir sa paran i trakase ler 3er i sonnen parske son zanan.

So, eski i annan en travay ki pe ganny fer oubyen ki pou ganny fer an relasyon avek Minister Ledikasyon ler lekòl an relasyon ek bann ansennyan?

Dezyenmman, mon ti a kontan demann en kestyon an relasyon avek mon'n tann ler manze taler. Sesel tou departman Gouvernman son ler manze i parey. Ler mwan mon sorti dan prive, mon ler manze i 12 a 1er, mon anvi e lakot en biro Gouvernman pou mwan fer en demars, tou biro Gouvernman i fermen.

Parske bann travayer Gouvernman zot tou zot al manze menm ler. Me eski dan sa demars pou ler fleksib, eski zot pe osi mazin en ler fleksib ler manze dan Departman Gouvernman ki permet sa endividi ki'n profit son ler manze pou li fer sa pti demars kot Biro Gouvernman pou li ganny sa servis ki i pe rode? Mersi Mr Speaker.

MR SPEAKER

Mersi Onorab. Minis, wi?

MINISTER PATRICIA FRANCOURT

Mersi Mr Speaker. Mersi Onorab. Onorab, mon kapab reasir ou ki konversasyon sirtou avek Minister Ledikasyon i kontinyel *right from the beginning*, akòz i enn nou bann *main stakeholder*.

Sa *pilot*, ou konnen letan ou pe fer en pilot mwan mon toultan krwar e mon ti met ek *the experts around us* ek bann leres dimoun.

Si ou pe anmenn en kantite sanzman *all at once, the chance of failing is very high*. Ou bezwen pran sa ki realistik e *manageable right from the beginning*. E se sa ki nou dir sa *period of 4 months*, pou nou kapab *then* evalye. Minister Ledikasyon i pe *observe* li osi, i bezwen annan sa bon lobzervasyon. I bezwen pe realize ki pe arive avek paran *and so on and so on*.

So, li osi i en lenformasyon pou *crucial* pou kapab donn nou, pou kapab fer sa evalyasyon. I *mean* bann konversasyon ki nou'n annan avek ledikasyon, par egzanp letan nou pou'n ganny en *findings*, letan nou pou'n ganny en *better picture* ki mannyer keksoz in deroule baze lo ki mannyer i ete la *without disrupting* sa bann leres parey Ledikasyon *which is a change of school hours is a major thing*.

E nou pa kapab zis sot ladan san proper konsiltasyon avek diskisyon *and so on*. Me selman par egzanp parey bann konversasyon annavans ki nou pe annan avek mon koleg Minis avek son tim ek mon tim, *in the future* eski nou bezwen get par egzanp bann

keksoz *breakfast club* pou sa dimoun ki oule komans 7er-3er? Eski en zour dan lefitir nou bezwen annan bann *breakfast club* ki komans 6er bomaten?

Petet i pa pou sa menm dimoun ki pou kontiny lazournen pe travay. I kapab i vini i travay 3erdtan zis pou *breakfast club*, sa dimoun i komans 7er i ganny sans *drop son zanfán and so on and so on*. Bann konversasyon avanse, eski petet *in the future* lekol i bezwen annan bann *after school club for homework*.

Ki sa paran ki pe fini 9er-5er, i konnen son zanfán i an sekirite, i kot lekol. So, sa bann konversasyon i byen avanse selman mon *believe* poudir menm nou en Gouvernman responsab, nou pa en Gouvernman ki zis sot dan keksoz latet premye apre nou bite, apre nou pa konnen ki'n arive.

Nou *believe* ki nou bezwen pran keksoz *step by step*. E mon krwar si ou fer li byen nou annan en *complete overview*, nou *findings* pou kapab determinen. Akoz parey tou sanzman letan i arive parey letan nou war in sanz *one way traffic to 2 way traffic* la kot *Cable & Wireless*, pa nou ki determinen ki mannyer driver pou fer.

Driver i *walk and drive* la prezan ki determinen *what is*

the result. Is it better or not better? So, mon krwar i enportan pou nou pran keksoz *one thing at a time* ki *manageable*, ki realistik. Ki letan nou donn nou konklizyon, i enn ki ferm prezan nou kapab *built* lo larestan. Me selman mon kapab *reassure* you poudir konversasyon avek tou sa *stakeholders particularly* Transpor, Ledikasyon, *childminding service, IECD and so on* in fer bokou. E nou *still* ankor pe fer bokou lo sa bann konversasyon. Mersi.

Mon pa konnen si mon'n mank... Wi, mon mazineen poudir *again* i bann konversasyon ki fleksibilite i bezwen *apply*. E menm bann dimoun ki *cater for takeaways and stuff like that*. Zot osi zot bezwen pe ekoute.

What does that mean for us? You know? Eski pou annan en group dimoun ki pou al manz ler olye midi? *And so on*. Akoz parey mon'n dir dan mon *Statement, it's those hours* ki zot devret la 9er-3er tou travayer i la. Me selman i annan dimoun i a dir ou i bann konversasyon ki bezwen ganny *agree*. Parey nou dir tou keksoz i *mutual*.

Nou *agree* antre kanmarad ki mannyer sa pou ganny fer. I depan ou louvraz i depan ou responsabilite. I depan ki ler nou annan en

meeting enportan. I mean this is a kind of flexibility ki mars avek flexible working hours. Mersi.

MR SPEAKER

Mersi Minis. Nou a kontinyen Onorab Andre.

HON CLIFFORD ANDRE

Mersi Mr Speaker. Mr Chair, mon ti a kontan demann Minis 2 kestryon. In dir avek CS, zot in dir pou dir zot pou kit *working hours between 8 to 4.* So, ki fer ki si mwan, mon bezwen desann dizon mon pe desann 7er edmi mon pou bezwen esper 8er pou mwan ganny sa lenformasyon, oubyen dokiman, oubyen sa *query* ki mon bezwen fer avek sa departman Minister konsernen.

So, mon mazine i *still* annan sa menm presyon lo mwan ki bezwen sa servis. So sa i enn. Dezyenm, ou konnen mwan Minis mwan mon reste mon pas Anse Aux Pins mon monte mon al La Pointe Larue mwan. So, mon fer fas avek sa trafik La Pointe Larue an montan Anse Aux Pins. An montan, an desandan tou mon fer fas avek sa.

So, mon pe gete si ou krwar e mwan mon *still* pe fer sa leksperyans la *from 7 to 9 which is 2 hours*, eski ou panse, aköz mwan mon vwar i pa ase sa ta dekalaz pou

permet sa konzesyon trafik diminyen oubyen *alleviate* pou kapab annan en *proper flow of traffic*, ki pe sorti anvil pou monte oubyen *vice versa* pou sorti Anse Aux Pins, Au Cap ensidswit an desandan anvil dan bomaten.

So, mon krwar sa ler i tropti gin. Letan mwan mon pe gete en *proposal* mon pe donner. Si kekfwa nou ti get dan posibilite annan, wi i annan enn 7er ki normal. So, sa ki desann 7er kekfwa i pa pou rankontre sa trafik. Me lot kekfwa i kapab komans 10er plito dan plas boner. Mon konnen *it is a pilot, but* sa leksperyans ki mwan mon pe fer lo sa kote mon vwar ki lo trafik i napa sa gran diferans oubyen diferans *at all. Thank you so much.*

MR SPEAKER

Minis, ou le reponn.

MINISTER PATRICIA FRANCAULT

Mersi Mr Speaker. Si ou permet mwan CS i ava pran premye par. Ms Morel i ava pran 2enm part. Mersi.

MR SPEAKER

Tre byen, wi PS.

CHIEF SECRETARY PSB SHELLA MOHIDEEN

Mersi Mr Speaker. Mersi Minis. Mersi Onorab pou ou

premye kestyon. Pou le moman parey mon'n eksplike nou pou kit *working hours* 8er-4er. *Why?* Nou la an se moman dan mwan Me, nou ankor pe regarde konbyen travayer ki pou pran sa opsyon 7er pou komanse.

Konbyen ki pou *maintain* zot 8er, lekel ki pou al 9er. So, i ankor annan travay ki pe ganny fer. E letan nou pou'n fini ganny tou sa lenformasyon *obviously* i pa tou travayer ki pou ganny sa ki i demande, akoz nou bezwen fer sir ki lofis i operasyonnel depi 7er ziska 5er. Akoz i pou bann erdtan ki travayer pe vini.

E i enportan ki nou osi anmas lenformasyon ki mannyer sa i ale avan ler nou fer sanzman dan *office hours*. So, lentansyon se ki nou kapab elarzi *working hours* parey mon'n eksplike, ki si ou ti a kontan vini 7er edmi akoz ou komans ou komans travay 8er pou li pa enteronp ou *working hours*, ou kapab fer sa.

Si en dimoun petet ki desann pli granmaten parey ou'n dir ki ti a kontan vini 7er edmi pou ganny *access* ek *office*, i kapab fer sa. Me selman sa i ankor lentansyon. Nou bezwen fer sa *pilot* avan pou nou regarde ki mannyer sa *staggering working hours* i deroule. E apre la nou a kapab

fer sa bann desizyon baze lo lenformasyon.

Nou pa oule zis sanze, apre letan ou'n sanze apre pou ou *go back* pou dir be non 7er-5er pa pe marse. Nou oule lenformasyon avan, apre letan nou ava annan lenformasyon nou ava kapab fer *informed decision on the opening hours of the office*. Sanmenm sa nou pa'n fer li tro long osi. Nou pe fer li pou apepre - *well* i annan 1 mwan preparasyon, avek 1 mwan enplimantasyon.

Nou a regarde lenformasyon ki nou'n anmase si nou bezwen elarzi sa *pilot period*. Me solman nou pou fer bann desizyon baze lo lenformasyon ki nou pe anmase dan sa *pilot period*. Mersi Mr Speaker.

MR SPEAKER

Thank you. Yes, Ms Morel, ou a kapab kontinyen.

CHIEF POLICY ANALYST SUSAN MOREL

Mersi Mr Speaker. Mersi Onorab, pou ou kestyon. Parey in ganny fer sorti, la i dan faz preparasyon. Se pou sa ki petet nou pa ankor vwar byen sa lenpak *staggering hours*. Me de ki bann travayer i komans swiv sa *staggering hours* ki zot in swazir, la nou pou dan en pli bon pozisyon pou vwar ki mannyer zot pe

reakte avek sa lentrodiksyon *staggering hours*.

Annefe dan diskisyon ki nou ti annan avek *SLTA* pou propozisyon lezot parti pou *extend working hours* pou komans 8er edmi pou donn ase letan paran ki bezwen *drop* zanf an kot lekol, epou zot ariv a ler dan landrwa travay. Me sa propozisyon *flexible working hours* i pa zis pou adres sa konponan trafik.

Me parey in ganny fer sorti pli boner i annan bann lezot lobzektif ki nou anvi adrese avek sa. Se pou sa ki nou'n vin avek sa 3 opsyon 7er-3er, 8er-4er, e 9er-5er. E se la pandan sa 3 mwan, ki travayer i swazir sa opsyon ki pli konvenab pou zot. Ki nou ava vwar ki bann lezot lazisteman ki nou bezwen fer o firamezir.

E le bi osi se pou ankouraz parey nou'n dir avan sa ki napa zanf an pete pou *drop off*, swazir petet desann en pe pli boner ou fini en pe pli tar. E sa 8er-4er paran ki bezwen *drop off* zanf an zot kapab pli konsider sa opsyon. *SLTA* de zot par zot in reasir nou ki zot pou swiv byen sa patern trafik.

E osi zot ti a voudre ki sa separasyon trafik i ganny fer ant trafik lekol e trafik sa ki bezwen al travay. E se sa ki zot pou pe *monitor*, e ki zot pou swiv pou fer zot analiz. E i enn

bann edikater ki nou pou pe analize pou vwar ki mannyer sa *flexible working hours* in fer lenpak lo la. Mersi.

MR SPEAKER

Mersi Ms Morel. Onorab Esparon.

HON REGINA ESPARON

Mersi Mr Chairman. Mr Chairman, mwan mon *welcome* sa lide annan *flexible working hours*. E mon panse poudir 2 keksoz ki nou pe rode ek sa *model*, nou pe rod lefikasite, *service delivery* avek prodiktivite. Mon kestyon i Minis, si ou annan ou en travayer ki vin travay 7er les pran parey *PUC* ki en parastatal.

Sa travayer i deside vin travay 7er, me selman lo kote *service delivery still* sa biro pe ouver 8er edmi, ou konpran mwan? Eski dan sa *flexible working hour* nou pe osi mazin bann *counter* ki ouver ki donn sa servis piblik, ki zot osi zot pou kapab annan sa fleksibilite ki zot pou ouver pli boner pou donn sa servis.

Parski si sa travayer i vin travay 7er, me ant 7er ek 8 edmi pa fer gran zafer la li. Ki li sa piblik ki pe vin devan lo *counter*, *still* sa *counter* pou ouver 8er edmi sa i pou montre en pti pe defayans. Lo sa kote Minis, petet ou ava

eksplik mwan silo sa osi pou annan *flexible working model*?

Parski ozordi nou konnen mon pran legzanp parey dantis. Dantis ozordi ou pe kapab al kot dantis ozordi 6er edmi bomaten, aköz i annan sa fleksibilite e sa servis i la konpran mwan? E dezyenmman Minis, i annan en dimoun ki'n met devan poudir ozordi dan pei i annan en kantite *expatriate*.

Letan ou pe get bann manman, bann manman ki annan zanfan konmsi pe demande si osi Minister pe konsider ki plito ki fer sa manman ki travay *shift*, li fer sa *shift* aswar kot sa zanfan i reste tousel dan lakour, si pa ti a bon osi ki nou konsider met bann *expatriate* travay sa *shift* aswar ki li sa manman ti a ganny plis letan pou pase avek son zanfan. Ou konnen madanm i annan *homework*, i annan pou gete ki zanfan i ariv dan lakour a ler. En pti pe dan sa lespli osi si nou pe osi mazin annan sa fleksibilite lo sa kote. Mersi.

MR SPEAKER

Mersi Onorab. Wi, *Chief Secretary*?

CHIEF SECRETARY PSB SHELLA MOHIDEEN

Ok. Mersi Mr Speaker. Mersi Onorab pou ou kestyon. Sa legzanp ki ou'n servi par

egzanp en travayer *PUC* si li i komans son travay 7er bomaten, me selman lofis i ouver 8er 30. *Well*, pou komanse i bezwen annan en negosyasyon ki sa travayer pou fer avek son *supervisor* ouswa son anplwayer.

I pa vo lapenn ki ou pou vin travay 7er edmi si lofis pou ouver 8er 30, aköz i pou annan en bout letan ki dan ou letan ki ou pa pou prodiktiv. E mwan mon poudir ki sa i pa sipoze en laranzman ki ganny aprouve *unless* sa landrwa travay pe reviz son *working hours*. So, toultan sa fleksibilite la i bezwen ale avek prodiktivite. Ki mannyer nou'n ekrir *policy* i annan en bon pe fleksibilite dan lenplimantasyon sa Polisi.

Aköz i difisil par egzanp pou Departman Lanplwa avek *Public Service Bureau* pou fer li restriktiv, aköz nou annan en kantite antite ki zot fason travay i diferan. Petet par egzanp la ki ou'n mansyonn dantis ki kapab komanse 6er edmi. Sa i posib petet pou en serten lorganizasyon. Kekfwa en lot lorganizasyon li i pa pou posib.

So, nou'n donn en *policy* ki annan fleksibilite ladan ki donn sa bann landrwa travay osi pou zot kapab organiz travay *around the* fleksibilite pou nou kapab vwar plis prodiktivite. E pandan sa 3

mwan, i bann keksoz ki nou pou *monitor*, pou nou kapab apre fer bann desizyon.

So, i posib si en landrwa travay li par egzanp *PUC* i vwar poudir tou son bann *front officers* ki servi piblik i a pli fezab pou zot komans 7er bomaten, ki li i oule sanz son *office hours*. Me selman nou, nou ti pe dir annou an premye teste sa *flexible working arrangement*. Akoz nou pa ti kontan ki *PUC* pe dir depi le 1 Zen i sanz son *opening hours* apre pou resanze pli tar.

I pli bon ki si ou *pilot*, ou anmas lenformasyon epi letan ou anmas lenformasyon la ou kapab fer en desizyon ki pli *informed*. E letan ou fer desizyon ki pli *informed*, i pou bann desizyon ki pou *last* en pti pe plis letan *rather than* bann *back and forth* ki apre osi i kapab konfiz bann *customer* ki pe sanz ou bann *operating hours* ase souvan.

So, nou ki nou oule fer dan Gouvènmman se *pilot* anmas lenformasyon. E letan nou fini anmas lenformasyon la prezan nou ava kapab deside ki bann lezot desizyon nou pou pran baze lo sa bann lenformasyon ki nou'n anmase. Mersi Mr Speaker.

MR SPEAKER

Minister, ou kapab kontinyen.

MINISTER FANCOURT

PATRICIA

Mersi Mr Speaker. Onorab, mon pa konnen si ou pe *refers to GOP workers* dan Gouvènmman oubyen prive oubyen tou lede. Tou lede, *ok alright*.

So, *GOP workers* letan zot ganny zot *GOP*. Nou koman Departman Lanplwa *most of the time* in dir ou ki kriter sa dimoun, ki *job specification* sa dimoun i annan. E li ki pou fer son kontra. So, nou, nou napa kontrol lo sa travayer ki pe vini, ki ler i pou travay *and so on*.

Me selman nou remarke poudir i annan bann *GOP workers* ki vini, espesyalman *to fill the gaps* ki petet nou Seselwa dizon i annan ki dir i pa oule fer *shift work*, petet zot vini zisteman pou pran bann *shift work* aswar. E sa petet dan zot laplikasyon zot montre poudir i need this person akoz aswar mon annan en difikilte ganny travayer *because* i en manman kekfwa i bezwen kot lakour *and so on, and so on*.

Me sa i *private sector* zot menm pou deside ki mannyer sa travayer pe ganny servi. So, annou osi realize poudir pa tou dimoun ki pa kontan *shift work*. I tou depan ki lagreman zot annan avek zot organization. Mwan mon konn dimoun par egzanp ki dir ou Minis, mon travay 3 *on e mon*

ganny 3 off. E mon byen kontan mon fer 2 *shift* lizour, e mon fer 2 *shift* aswar. *And then* i get oubyen 3 *shift* lizour, 3 *shift* aswar *and i get my days off*.

I annan ki fer 4 on *and then they get 4 off*. So, zot kontan letan zot ganny 4 zour par egzanp zot *off* konsekitiv *and so on*. E nou war nou bann demars kot Departman Lanplwa letan nou pas dan bann lotel, nou pe ankouraze poudir donn bann manman sirtou menm bann papa bann zour konsekitiv ansanm.

Not 1 zour isi apre en lot zour laba. E nou war bann lotel ki angaze pe dir *ok*, la nou donn 2 zour *off* konsekitiv ansanm. Koumsa sa fanmir i annan 2 zour pou repoze e 2 zour avek fanmir. So, i pou tou depan *what is the need of* sa organization ki'n rod sa *GOP worker*.

Me selman nou realize poudir i annan en *thinking* ki pe *go on*, poudir *we must bring the worker* kot petet nou pe war Seselwa i difisil pran sa louvraz pou divers reason petet *shift work is one of them*. *But the control will always remain* avek sa *establishment* letan i pe fer vini son dimoun. Mersi.

MR SPEAKER

Mersi Minis. Onorab William.

HON WAVEN WILLIAM

Mersi Mr Speaker. Bonn apre midi Minis avek ou delegasyon. Minis, premyerman mon ti a kontan swet zot bonn sans dan sa *challenge*. E an menm tan mon war li i en demars ase enteresan pou fitir devlopman pei.

E mon ti ava demann ou si letan zot fini avek sa *pilot* legzersis, si zot kapab partaz zot *findings* avek Lasanble. Akoz pou mwan i pou enteresan, akoz nou pe war poudir i annan bann lezot sanzman avek *the next* letap devlopman pei vizavi sa legzersis ki zot pe fer. E sa byensir i pou enkli Sekter Prive ladan. Mersi.

MR SPEAKER

Mersi. Minis, wi.

MINISTER PATRICIA FRANCOURT

Mersi Onorab. Onorab, nou, nou vreman eksite kot Departman Lanplwa. Nou pa war sa koman en *challenge*. *We are very excited*, mon krwar i enn bann keksoz pli byen ki'n arive dan sa pei, pou nou anmenn en kalite fleksibilite parey. Nou konnen poudir *whatever* nou *findings* i anmenn i annan en *good feel factor* about sa *pilot* dan Sesel letan nou ti anmenn sa

papye kot *Cabinet*, nou, nou ti santi nou eksite lo la.

Me selman letan *PSB Office CS* in fer sorti sa *circular*, nou'n war *the response* ki mannyer *is being very good*. So, *we are very excited*. E bann *challenge* an mezir i a vini, se sa ki pou donn nou, nou *findings*. So, *because* nou ti prezant sa papye avek *Cabinet* Departman Lanplwa.

Then Cabinet in demande ki letan nou ganny nou evalyasyon *we come back and share with them*. E *from then on*, nou ava war *findings*. E mwan mon pa pou war sa i en *issue* pou nou *come back and share the findings* pou montre poudir aköz mon krwar pei an antye i annan en drwa konpran. Konmsi eski in marse, i pa'n marse e sa konmsi nou bezwen fer byen. Donn komunikasyon pou dir en pilot in fini, sa pilot in fini *what is the findings*. E ki rekomandasyon ki'n *come up*.

E sa mon krwar poudir *definitely* i en keksoz ki *the whole of Seychelles must be able to understand* e konpran ki sa *findings* ek rekomandasyon. Mersi.

MR SPEAKER

Wi Onorab, ou kapab.

HON WAEN WILLIAM

Mersi Mr Chair. Minis, dan sak Departman Gouvernman lekel ki'n ganny *tasked* pou anmas e fourni lenformasyon kot departman konsernen. Mersi.

MR SPEAKER

Thank you. Panel, i annan en repons?

MINISTER PATRICIA FRANCOURT

Letan *exercise* in komanse, *definitely HR* i sa enn ki komans sa legzersis. Apre of *course the PS* aköz *accountability* sa i *rest on the PS* pou *go through*. Pou annan sa diskisyon parey mon dir konversasyon avek dimoun. I pa zis en *tick a box* sa form i ganny *submit*. E laba i annan konversasyon ki bezwen ganny fer.

Ki'n ganny fer ki bezwen ganny fer. E ou bezwen met ou *case forward* se sa ki nou ti konpran, vin met ou *case* aköz 7er-3er, aköz 8er-4er, aköz 9er-5er? *It's a conversation*. Mersi.

MR SPEAKER

Mersi Minis. Sa ti dernyen Manm ki ti annan kestyon ki ti lo mon lalis. Donk, napa okenn Manm ki pe lev lanmen. Minis, nou'n ariv a lafen. CS, mon pa konnen si ou ti a kontan annan en dernyen

remark avan nou terminen?
Oubyen Minister?

MINISTER **PATRICIA**
FRANCOURT

Mersi Mr Speaker. Mr Speaker, mon oule remersi tou Manm Onorab ki'n donn nou sa bann mo lankourazman. E osi pou zot rekonnet poudir enn bann desizyon ki Gouvènmman in pran, i enn bann pli bon desizyon *in terms* ki nou pe target nou dimoun, travayer, lafanmir an antye zanfan tou dimoun pou annan en *stake in that*.

E nou'n koz bokou lo prodiktivite, efikasite. Me selman mwan toultan parey toultan mon dir mon toultan anmenn sa konponan *wellbeing*. *Wellbeing* avek *self-care* pou travayer. Nou realize poudir dan en pei so letan dimoun i travay, sa bann erdtan tradisyonnèl i annan lenpak. Ou tann dimoun dir i fatige, ou tann dimoun dir *mental health it becomes an issue an so and so on*.

Selman mon krwar poudir *flexible working hours* letan nou pe get li dan son *holistic* fason parey nou dir i vin plis ki sa 3 keksoz ki nou'n *focus* lo la ozordi. Nou bezwen mazine petet i a redwir en pe bann presyon lo fanmir. Akòz si en fanmir pe ariv dan lakour pli boner, ou'n ariv 3er edmi dizon 4er olye 5er oubyen 6er.

Ou annan plis letan avek ou fanmir e ou annan plis letan pou ou lekor.

Mon mazine i pa ankor fernwar si ou'n ariv an lakour. Ou'n al marse en kou lo lans. Oule al fer en pti legzersis, i ankor boner. Ou pa bezwen kit zanfan tousel *as a family* zot kapab *spend* letan ansanm. Nou koz lo sa *work life balance* Mr Speaker, e ankor nou dir i en balans la. Kekfwa pou pa en dimoun ki lev granmaten, me si ou dormi sa *extra hour* bomaten i fer ou dibyen.

So, petet ler ou antre 9er ou pli *productive* ki letan ou ti'n antre 8er. Akòz pou bokou nou lerdtan dormi ennler dan granmaten i en *bonus*, non? So, mon mazine poudir pou bann dimoun ki *again* sa i ava en lavantaz. Mon war loportinite pou annan plis letan avek fanmir, *whether* i bomaten ou apre midi.

E mwan mon toultan koz lo sa bann *negative mental health* ki nou rankontre dan louvraz sirtou *stress*. Bokou dimoun i koz lo *stress* dan louvraz. Me letan ou konnen poudir be mon annan *ownership* sa bann erdtan ki mwan mon'n swazir. *Then*, ou *feel good about it, right?* Mon krwar i bezwen annan en *feel good factor*. E ou bezwen *embrace* li avek en latitid pozitiv.

So, pli nou pozitiv, pli nou kapab prodwir. Pli nou prodwir pli lakonpannyen oubyen Minister oubyen *establishment* i pli *happier*. Selman mon get li pli larz ki sa. Mon get ki i en loportinite osi pou nou get nou lasante. *You know*, nou'n koz lo *obesity campaign*. Prezidan *launched the campaign with Ministry of Health*.

Eski i ava ankouraz plis olye si nou'n ariv dan lakour 5er, olye zis asiz devan televizyon get *cartoon* ek nou zanfan and so on. Nou kapab al lo lans al marse, nou kapab al *jog*, nou kapab al get *basketball* and so on.

So, mon ti a kontan piblik Seselwa si zot pe ekoute, pran sa pli larz *think about it* dan ou *own* perspektiv pou ou konnen ki mannyer sa pou benefisye mwan. E ler ou fer sa *informed decision* ki sa bann erdtan ki ou pe swazir, ou bezwen annan en bon rezon deryer sa.

Alor, mon remersi Lasanble ki zot in byen konpran sa. Mon ti aroze lot kote latap ti la apre midi Mr Speaker, aköz zot ti kapab ganny zot ganny sa bann lenformasyon, anmenn zot osi zot bann kontribisyon pou zot bann dimoun dan zot distrik. Aköz *after all* nou pe koz *benefit* pou Seselwa an antye pa en bout apre en lot bout.

So, mon ti a kontan tou lede kote latap ti la ozordi, e ti a donn zot kontribisyon osi. Mersi Mr Speaker.

(APPLAUSE)

MR SPEAKER

Mersi Minis. E mersi bann zofisye. Mon apresye lantouzyazm ki zot annan pou sa lide ki zot pe met devan. E mon swet zot bon sikse dan fer li marse efektivman. Mon remersi bann Manm pou zot kestyon, fotespere nou'n nobou met en plis lenformasyon dan piblik. I ava zis a tan pou nou terminen, nou a pas dan Staz Lasanble pou nou kapab *adjourn*. Bon, mon swet Minis ek bann delegasyon bon depar. Lasanble i a pran poz. E nou a rebran 4er. Mersi.

(BREAK)

MR SPEAKER

Tre byen nou pe kontinyen lo nou *Order Paper*. E parey zot konnen, nou annan Mosyon. E premye Mosyon i dan non Onorab Kelly Samynadin. Donk, nou a komans lo la. Onorab ou a soumet ou Mosyon e i a ganny segonde apre ou a kapab adrese.

HON KELLY SAMYNADIN

Mersi Mr Speaker. Mr Speaker, Mosyon ki pe ganny soumet avek Lasanble i lir konm swivan;

‘Avek bi amelyor nivo disiplin dan bann Lekol Leta, sa Lasanble pe demann avek Gouvernman spesifikman Minister Ledikasyon pou revwar Kod Kondwit pou bann etidyan ki date depi 2010.’ Mersi.

MR SPEAKER

Mersi. Nou a ganny segonnman pou sa Mosyon, Onorab Anne Bistoquet.

HON ANNE BISTOQUET

Mersi Mr Speaker. Mosyon i ganny segonde e mon rezerv mon drwa pou fer mon lentervansyon en pe pli tar. Mersi.

MR SPEAKER

Mersi. Onorab Samynadin ou a kapab adrese lo Mosyon.

HON KELLY SAMYNADIN

Mersi Mr Speaker. Mr Speaker, tou mon bann koleg Onorab e tou dimoun a lekout bonn apre midi. Ozordi mon pe vin devan zot avek gran konviksyon e en sans devwar for anver nou bann zenn sitwayen, pou *move* en Mosyon ki koz lo leker nou Sistenm Ledikasyon, e sa se nou bann etidyan.

Mon pe apel Lasanble pou formelman ansanm avek mwan pou demann Gouvernman pli spesifikman Minister Ledikasyon pou fer en rev e revizyon lo *Code of Conduct* ki annan anviron 15an depi son konsepsyon. Mr Speaker, en Kod Kondwit i plis ki en liv regilasyon, i en gid, en refleksyon valer nou sosyete, nou bann priyorite edikasyonnel ek nou bann lakseptasyon pou nou bann fitir zenerasyon.

I pa zis definir konportman ki nou ekspekte de nou bann aprenan. Me i osi sa lanvironnman ki nou swete pou kree dan nou bann lekol. En lespas ki an sekirite, respektab, responsabilize e propis anver laprantisaz ek lepanouisman nou bann etidyan. Me annou demann nou lekor onnetman. Eski sa Kod Kondwit pou bann etidyan ki date depi i ankor konvenab e *fit* pou son *purpose* an 2025.

Depi 2010, lemonn in pas atraver plizyer sanzman. Natir ledikasyon in evolye, teknolozi in transform kominikasyon, enteraksyon sosyal e lafason ki bann etidyan i eksprim son lekor. Bann defi tel ki *cyber bullying*, bann size tel ki Lasante Mantal, lidantite bann zan ek enklisivite, sekirite nimerik, en si ki *peer pressure* atraver

medya sosyal ti swa minim ou non egzistan dan nou bann lekòl ki 15 an pase. Me ozordi, zot en realite kotidyen.

Ziska la sa dokiman ki'n ganny met an aplikasyon pou gid bann lekòl e etidyan pandan ki zot pe navig sa bann defi i reste touzour ensansib. Mon aprann ki annan serten travay ki'n komanse dan sa demars. Me mon santi ki nou koman bann dirizan dan kominote, nou annan en rol pou nou zwe.

E nou kontribisyon e rekomandasyon i ava ed Minister Ledikasyon pou anplifye zot travay. Aktyelman Kod Kondwit ki pe ganny servi dan lekòl, i koz lo plizyer laspe. Premyerman i koz lo drwa ek responsabilite bann etidyan ki tre byen. I osi koz lo plizyer laspe ki konsern bann etidyan. E sa i enkli *attendance*, *ponktyalite*, *truancy*, liniform eksetera.

Lanmod penneyen i en size ki osi ganny aborde. Nou tou nou konnen ki tre resaman in annan en sanzman dan lafason ki sa i ganny zere. E sa in ganny prononse par Minister Ledikasyon li menm. E sa byensir i merit ganny adrese dan sa revii sirtou kot bann garson i konsernen.

Sa kod Kondwit i osi koz lo bann fason inapropriye kot bann etidyan i demontre

lafeksyon dan lakour lekòl, langaz ki inapropriye, bann lobze nwizans, lilizasyon *mobile phones*, ki sa osi mon santi i reste en pwen diskisyon anvi ki *mobile phones* i kapab ganny servi koman en zouti laprantisaz, byensir avek lord e gidans bann edikater.

Mr speaker, bann lezot konponan ki enkli dan Kod Kondwit bann lekòl i konm swivan; lager, *bullying*, persekisyon, zwe lasans, vandalizm, lizaz ek posesyon sigaret, lalkòl e drog ilegal, bann materyo pornografik, aksyon seksyel forse ou non forse, zarm ek eksplozif ensi ki konportman dan bis. Sa i swivi par bann prosedir konplent ki bann etidyan i kapab fer si zot santi ki zot drwa pe ganny abize.

Mr Speaker, konponan pli enportan dan Kod Kondwit i kot i koz lo Polisi Minister Ledikasyon lo sa laspe konportman dan lekòl. E sa i baze lo en sistenm nivo ki permet bann etidyan ganny rekonnet pou zot sikse personnel, ek lakonplisman dan kominote lekòl.

E osi pou rekonnet bann konsekans pou konportman inapropriye. E aprann lenportans disiplin personnel. Sa sistenm nivo i komans lo grad 6 pou bann etidyan ki fer byen dan nenport aktivite lekòl, ki swa akademik, sportif

oubyen travay volonter. Bann etidyan i korpere e ed lezot etidyan e ansenyan. E azir dan en fason responsab an respektan drwa lezot etidyan dan lekol.

Nivo 5 i sa nivo kot etidyan i korpere e travay byen avek lezot, ede fer en zefor pou vremen amelyor son konportman. Pran son letid o serye e pran responsabilite pou son aksyon. Lo nivo 4, bann etidyan i persiste avek bann konportman parey ki mon fek mansyonnen.

Zot pa anmenn keksoz nesaser ki zot bezwen pou lesan, tel ki *stationary*, lenz *PE* eksetera. Enteronp lezot dan laklas, pa konplet travay laklas e travay lakour, pa met liniform korekteman e zot osi pe komet vol.

Mr Speaker, lo nivo 3 bann etidyan i repet konportman inapropriye a 2 repriz dan menm zour.

Osi montre bann konportman parey retar san rezon valab, enteronp laklas, lensolans, dezobeisans, argimante, malelve, polye lakour lekol ek laklas, kit lakour lekol san permisyon, ensi ki bann lezot ki mon'n deza mansyonnen oparavan. Lo nivo 2 bann etidyan i kontinyen komet bann menm lofans.

E zot osi demontre bann konportman agresiv ki swa

verbal ou fizik anver en lot etidyan oubyen *staff* dan lekol, dan bis lekol, dan bann ekskirsyon ouswa apre lekol dan bann landrwa piblik dan zot liniform.

Fodre note ki a sa staz, sispansyon i komans ganny aplike depandan lo gravite lofans ki'n ganny komet.

Finalman Mr Speaker, staz limero 1 i sa letap kot etidyan i demontre konportman ki totalman inakseptab, ki konpri konportman agresiv, posesyon oubyen lizaz zarm danzere, posesyon lalkol, prodwir sigaret, drog, materyo pornografik, fer bann propozisyon ouswa aksyon seksyel dan lekol, menase, persekit e entimid lezot, vandalizm, lakoup seve inapropriye, vole, zwe lasans ek *truancy*.

A sa staz, bann pinisyon i enkli sispansyon formel, pa plis ki 10 zour ek posibilite ekspilsyon letan ki tou alternativ in ganny eksplote.

Mr Speaker, Kod Kondwit i kontiny avek detay lo responsabilite paran ki enkli sipor pou zanfand al lekol, asire ki zanfand i al lekol e a ler, enkilke bann valer, korperasyon ensi ki mentenir en bon relasyon avek lekol.

I osi met lanfand lo responsabilite bann ansennyan ki enkli kreasyon

en lanvironnman laprantisaz de kalite avek bann leson enteresan e byen prepare, ki konsider bann diferan beze laprantisaz bann etidyan. Montre bon legzanp, etabli bann regilasyon e rutin laklas ki kler e byen defini. Ankouraz konportman apropiye, e mentenir disiplin dan nenport landrwa dan lekòl.

E ed etidyan devlop tou zot potansyel. Koman en ansyen edikater ki ti dan lekòl letan ki sa Kod Kondwit ti vin an enplimantasyon. Mon pou dir ki wi, a sa letan tou etidyan ti konnen ki nivo ki zot lo la. Me o firamezir ki letan in evolye, sa in gradyelman sanze. Sa sistenm pe nepli ganny enplimante, bann etidyan pa konnen lo ki nivo ki zot lo la. E par konsekan napa en alinyman dan lafason ki bann lofans i ganny pini. Ki fer mwan byensir kestyonn son relevans.

Mr Speaker, letan mon ti pe prepar sa Mosyon mon ti rantre an konsiltasyon avek serten etidyan ansennyan e osi paran. Laplipar bann etidyan ti dir mwan ki zot pa okouran ki nivo konportman ki zot lo la. Me zot konnen ki bann lofans ki kont regilasyon lekòl.

Zot osi okouran ki i annan *counsellors* ek bann *head of years* ki la pou ed zot

lo sa laspe disipliner. Laplipar paran ki mon'n koz avek pa ti an faver sispansyon, akòz zot pa santi zot konfortab pou kit zot zanfàn kot lakour an okenn sipervizyon. Me lo lot kote i annan ki'n eksprimen ki zot pa pe fer ase lo nesesite annan bon konportman kot lekòl pou benefis lansennyan ek laprantisaz.

Bann ansennyan ki mon'n konsilte i sorti dan 2 lekòl respektif dan mon rezyon. E zot in met mwan okouran ki lager, sikannen, mank respe pou lotorite, *truancy* avek *bullying* i bann ka pli alarman. Lo nivo primer bann mezir ki ganny pran i plito *conflict resolution*, lanfaz lo bann *social skills*, zanfàn i ganny garde anndan pandan letan rekreyasyon. E pou bann lofans parey lager sispann i ganny aplike.

E lo nivo segonder, bann mezir radyasyon ki ganny aplike i *parent conferencing*, konsiltasyon *counsellor* oubyen psikolog ensi ki sispansyon.

Mr Speaker, in annan en logmantasyon dan bann rapor dezangazman lo lapar bann etidyan. Logmantasyon dan bann lensidan konportmantal e menm dan konfli ant bann edikater avek paran lo kwa ki ganny konsidere koman zis oubyen aksyon disipliner apropiye.

Bokou dan sa bann ka in monte, non pa par malis me plito avek bann Polisi ki pa a zour, bann lekspektasyon ki vag e mankman en langaz kler e enkliziv ki rezonn avek larealite aktyel nou bann zenn. Mon anvi et kler Mr Speaker, sa Mosyon i pa en lakizasyon lo Minister Ledikasyon oubyen lo nou bann edikater devoue dan nou bann lekòl.

O kontrè i en lapel ki pe sipòt zot travay, an asiran ki zot annan en *framework* ki azour, konpreansiv e akseptab ki zot kapab depan lo la dan travay ki zot pe fer pou benefis nou bann etidyan. En Kod Kondwit modern i devret adres bann drwa ek responsablite tou etidyan avek balans.

I devret enkli bann prensip *restorative*, non pa zis bann aksyon pinitiv. I devret reflekte langaz enkliziv, afirm dinyite e promot partisipasyon bann etidyan dan bann desizyon. I devret osi fer provizyon lo klarite bann edikater, paran, ensi ki bann administrater pou ki bann ka konportmantal i ganny zere avek lazistis ek konsistans.

Mr Speaker, letan ki nou pe adres sa size Kod Kondwit, mon pou refer lo en mo ki mon fek mansyonnen plizyè fwa e ki bokou dimoun i souvandfwa kestyonn son relevans. E sa se sispansyon, ki osi ganny enkli

dan Kod Kondwit koman en metod pinitiv parey mon'n mansyonnen pli boner.

En revizyon i nesese akòz i esansyel pou asir ki sispansyon i ganny aplike avek lazistis. Kot bann diferan alternativ i ganny eksplòre, kot bann sistèm sipòr i an plas pou bann ki'n ganny afekte. E bann definisyon, prosedir ensi ki drwa bann etidyan i ganny soulinyen klèman.

Wi, sispansyon i reste touzour relevan koman en zouti disiplinè. Me son lizaz i devret zistifyab, proporsyonnen e form parti en pli gran stratezi sipòr konportmantal. Sispansyon i ede mentenir lòrd, protez etidyan avek *staff* lekòl. E osi sinyal konportman inakseptab.

Me par kont sispansyon ki aksesib e ganny mal zere i kapab afekte progre akademik en etidyan, annan repèrkisyon lo zot lasante mantal e zot konportman dan lefitir espesyalman si i pa ganny akonpanyen avek sipòr ki en plan reentegrasyon dan lekòl. Mr Speaker, i annan diferan form sispansyon e i kapab ganny kategorize dan diferan fason.

Premyèman, in *school suspension* i kot en etidyan i ganny retore dan laklas regilye me i reste lo *compound* lekòl. E

ganny sipervize dan en laklas separe, son *focus* prensipal se lo refleksyon travay akademik e parfwa bann *counselling* konportmantal. Sa form sispansyon i ganny konsidere koman mwen pertinan ki sispansyon an deor lekol.

Sa ki pli komen, se *out of school suspension* ki mon fek mansonnen. Etidyan i ganny *ban* lo *compound* lekol pou en peryod *fix*. E li i ganny servi pou bann vyolasyon serye tel ki vyolans, posesyon drog, oubyen bann lofans repetitif. Par konsekan si i pa ganny byen zere i kapab anmenn ver izolasyon ek bann retar akademik.

I osi annan *short term suspension* ki tipikman dir pou en maksimonm 10 zour. E li i frekaman ganny servi koman en *first warning*, oubyen koman en *cooling off period*.

Mr Speaker, *long term suspension* i enn ki *excide* pou plis ki 10 zour, ziska menm en trimes. I ganny rezerve pou bann lofans sever parey agresyon fizik oubyen bann menas serye.

E souvandfwa i merit en *hearing* formel, ensi ki en prosedir *review*. Dernyen metod i kot etidyan i ganny retire tanporerman pandan ki en lenvestigasyon oubyen prosedir disipliner pe ganny antreprann. E i osi ganny servi

letan en etidyan i poz koman en risk ou danzere pou lezot oubyen pou sekirite lekol.

Bann pli bon pratik sispansyon i merit swiv bann *guidelines* kler dan en Kod Kondwit, enkli bann dokimantasyon langazman paran ensi ki *student support*. I merit ganny akonpannyen par bann *meeting* reentegrasyon, kontra konportmantal ensi ki *counselling* ek *monitoring*.

Mr Speaker, malgre ki sispansyon i annan son merit i annan diferan lezot alternativ ki kapab ganny konsidere dan son plas.

Sa bann lapros i viz lo bann metod restorative, enkliziv e edikasyonnel pandan ki bann etidyan i reste angaze. Premyerman bann parti restorative i ankouraz bann etidyan pou konpran konsekans zot aksyon. I enkli bann dyalog striktire kot etidyan i prezant son leskiz, rektifye bann fot e repar bann lyen kominikasyon.

Dezyenmman, en plan entervansyon konportmantal i kapab ganny met anfors avek bann stratezi endividyalite pou bann etidyan avek bann *issues* konportman kontinyel. Sa plan i ava ganny devlope an kolaborasyon avek paran, *counsellors* ek ansennyan. E i ava enkli bann target kler, bann mezir sipor e konsekans.

Trwazyenmman, servis kominoter oubyen bann task ki *school base* i kapab ganny entrodwir. Bann etidyan i ganny bann *task* tel ki lorganizasyon laklas, *PE tutoring* oubyen bann travay volonter dan *compound* lekol. Par konsekan zot ava pe devlop zot sans responsabilite, e permet zot pey pou zot fot.

Mr Speaker, bann etidyan ki enplike dan bann ka disipliner i devret resevwar bann sesyon *counselling* ki deza pe ganny enplimante dan lekol. Me par lo la zot merit pe benefisye avek bann sesyon *anger management*, ensi ki rezolisyon konfli. Sa i kapab ganny fer par swa *counselors* oubyen bann profesyonnel konsernen.

Dernyen lapros ki kapab ganny konsidere se kontra disipliner. Sa i en agreman sinyen par etidyan, paran ek lekol ki souliny konportman ki ganny ekspekte avek etidyan ensi ki bann konsekans. I ankouraz *student ownership* ek langazman familyal. Mon rapel a en moman ti en linisyativ ki ti'n komans ganny enplimante, me in annan en mankman konsistans.

Pou konklir Mr Speaker, mon propoze ki Minister Ledikasyon i antreprann en prosedir revy nasyonal ki konsiltativ. E ki angaz bann *stakeholders* kle. E sa i

notaman etidyan zot menm ki zot lavwa i bezwen santral dan sa prosedir. Ansennyan avek zesyon lekol ki enplimant sa Kod Kondwit lo en baz kotidyen, paran ek bann *leaders* dan kominote ki enkli nou bann *MNAs*, bann *DAs* ki donn sipor bann zanfan an deor laklas.

E osi bann psikolog, travayer sosyal, bann spesyalis devlopman zanfan ki kapab asire ki sa Polisi i reflekte bann pli bon pratik kot proteksyon zanfan ek ledikasyon i konsernen. Sa revy i devret osi fer referans avek bann standar enternasyonal tou an restan anrasinen dan nou kiltir, Lalwa ek valer Seselwa.

Mr Speaker, en nasyon progresiv pa per sanzman. I akey li dan servis pou son pep. Dan demars pou prepar nou zanfan pou lavenir, nou bezwen asire ki bann *frameworks* ki gid zot pa reste bann referans lepase. Sa Mosyon i konsern proteksyon nou lazenes, ranforsi lotorite bann lekol osi byen ki mentenir nou bann valer.

Annou pa espere pou ki konfli oubyen kriz i fors nou lanmen.

Annou vin proaktiv, nou regard perse dan lavenir e ini dan nou komitman anver Sistenn Ledikasyon de kalite ki relevan e konpartiman.

Avek sa Mr Speaker, mon swet mon bann koleg Onorab en bon deliberasyon an sipor anver sa Mosyon. Mersi.

(APPLAUSE)

MR SPEAKER

Mersi. Mersi Onorab, mon a pas laparol Onorab Philip Arissol.

HON PHILIP ARISSOL

Mersi Mr Speaker. Bonn apre midi Mr Speaker, tou koleg Onorab e tou dimoun ki pe swiv nou. Mr Speaker, mersi pou laparol ozordi kot mon kapab aport mon sipor pou Mosyon Onorab Samynadin, ki pe met lanfaz lo lenportans pou kontinyen ankouraz nou zenn pou promot lespri ek bon disiplin dan nou pei.

Sa Mosyon i osi demann Gouvernman spesifikman Minister Ledikasyon pou revwar Kod Kondwit pou bann etidyan ki date depi 2010. Disiplin dan lekòl, i en eleman fondamantal ki sipòrt en lanvironnman ledikasyon efikas. En lekòl kot disiplin i ganny mentenir dan en fason apropiye, i ofer en lanvironnman kot etidyan i kapab aprann dan trankilite san distraksyon e avek en sans responsabilite anver zot lekor e zot lekip.

Sa Kod Kondwit i bezwen reflekte sa bann realite

modern. E asire ki i adres bann defi ki etidyan ek ansennyan i fer fas avek dan lekòl. Mr Speaker, nou zenn i lavenir nou nasyon se nou responsabilite kolektiv pou gid zot dan en direksyon pozitiv. Nouri zot avek bon valè e ed zot fer bann bon desizyon ki pou ed zot prospere dan lavi.

Ler nou met lanfaz lo disiplin e bon konpòrtman dan lekòl, nou pa pe selman prepar zot pou en lavenir briyan e pe osi ranfòrsi lespri respe, travay dir e responsabilite dan nou kominote e dan nou pei. Bon disiplin ek en kiltir moral e spirityel i form fondasyon en sosyete an armoni, kot respe, konpasyon e lonnekte i ganny valorize. Se atraver en Kod Kondwit ki kler e adapte ki nou kapab asire ki nou zenn i ganny bann bon gidans e sipor.

Revizyon sa Kod Kondwit pa devret selman fer bann sanzman kosmetik. Me i devret en refleksyon lo bann pratik modern, e bann nouvo metod ledikasyon. Antan ki *leader* e Manm Lasanble nou merit montre legzanp, ler nou sipòrt bann mezir ki ankouraz bon konpòrtman e pozitivite.

Nou pa pe selman enspir nou bann zenn e nou pe osi kre en kiltir kot disiplin ek labonte i ganny selebre. Ler nou fer sa, nou asire ki en nouvo zenerasyon i grandi dan

en lanvironnman kot zot ganny siporte pou devlop zot konesans ek kapasite personnel. An plis ki sa nou bezwen pran en konsiderasyon sanzman dan teknolozi e dan fason ki zenn i entegre dan sosyete modern.

Nou Kod Kondwit i bezwen reflekte sa bann nouvo realite e ofer gidans lo konportman dan lekòl. Atraver itilizasyon teknolozi e respe pou lezot. En Kod Kondwit ki modern e kapab osi ede, ed bann ansennyan e paran pou mentenir en bon ekilib ant disiplin e ledikasyon.

Mr Speaker, mon lans en lapel pou nou travay ansanm pou revwar sa Kod Kondwit dan en fason ki anmenn en lefe pozitiv dan bann Lekòl Leta. Sa pa devret selman en dokiman administrativ me en zouti ki siport devlopman nou bann etidyan e ed zot vin bann bon endividi ki responsab i kapab kontribye aktivman dan nou sosyete.

Nou pa kapab koz lo disiplin san ki nou koz lo sipor ki bann etidyan pe ganny difikilte i bezwen. Revizyon sa Kod Kondwit i bezwen enkli bann mezir ki sipor bann etidyan ki annan difikilte konportman tel ki led psikososyal ek bann programm reabilitasyon. Disiplin i pa devret en pinisyon, me en zouti ki ed etidyan grandi dan

en lanvironnman ki sipor zot devlopman personnel e akademik.

Mr Speaker, nou bezwen asire ki sa Kod Kondwit i osi promouvwar en kiltir respe ant etidyan e ansennyan. Ler disiplin i ganny aplike dan en fason ki tou dimoun i santi zot enplike nou garanti ki lekòl i vin sa landrwa kot tou i sant zot valorize e enspire. Ler en etidyan i ganny led pou konpran lenportans disiplin an koneksyon lavi toulezour zot aprann pli byen.

Zot realizasyon avek zot ansennyan ek koleg i amelyore. E zot vin bann sitwayen pli responsab. I osi enportan pou fer sir ki bann ansennyan e administrater lekòl i ganny sipor nesaser pou met an pratik sa Kod Kondwit efikas. Bann ansennyan i la pou ed e gid e form nou zanfàn.

Me nou bezwen fer sir ki zot osi zot ganny zouti apropiye pou mentenir disiplin dan en fason ekitab.

Revizyon sa kod i devret enkli bann mezir ki ed ansennyan pou fer zot travay dan en lanvironnman ki sipor zot. Annou pa bliye ki vre lafors en nasyon i dan lafors moral e karakter son pep.

Ler nou met disiplin ek bon konportman koman en priyorite dan ledikasyon nou pe asire ki nou nasyon i reste

rezistans devan bann defi dan en fason langazman pou promouvwar bann valer fondamantal. Mr Speaker, parey mon'n dir mon pou aport mon sipor pou Mosyon Onorab Samynadin. Mersi.

(APPLAUSE)

MR SPEAKER

Mersi Onorab. Prosen entervenans Onorab Michel Roucou.

HON MICHEL ROUCOU

Mersi Mr Speaker. Bonn apre midi tou bann dimoun ki pe ekout nou. Mr Speaker, Mosyon anmennen par Onorab Samynadin i lir koumsa, avek bi pou amelyor nivo disiplin dan bann Lekol Leta, sa Lasanble pe demann avek Gouvernman spesifikman Minister Ledikasyon pou revwar Kod Kondwit pou bann etidyan ki date depi 2010.

Mr Speaker, dan mon letan ler nou ti al lekòl anfe ti annan plizyè bann Kod Kondwit ki Minister ti met a dispozisyon bann lekòl. E la dan bann letan kot ou ti krwar poudir ou pe vin kas bann Lalwa, pa pe vin respektè lekòl li menm li son bann Polisi.

La ti annan diferan kalite bann disiplin, bann fason disiplinen ki bann *teachers* ti vin devan. Sispann ti enn li

menm li, e osi ti annan lezot kot ou kapab ganny pini dan laklas pou ekri pou ganny *detention*. E osi ekri lo tablo diferan fason lo bann fraz ki mannyer ou pou konport ou lekor dan laklas.

E avek letan Mr Speaker, nou war poudir bann fason bann zanfan dan bann lekòl keksoz pe sanze.

Spesifikman lo drog li menm li, nou war poudir pli ale mon pe tous dan mon lekòl, Lekòl Mont Fleuri ki en lekòl ki annan bokou bann zanfan ler mon pe get lo kote primer Mr Speaker i annan li apepre 900 etidyan ki *headteacher* in enform mwan. E osi lo kote segonder i annan li 630 etidyan ki an tou Lekòl Mont Fleuri an zeneral i annan li apepre 1530 etidyan Mr Speaker.

E *plus* lo la mazorite bann etidyan li menm li i sorti eparpiye dan diferan distrik. E la nou war poudir i annan lekòl La Rosière ki in vini in azout lo segonder li menm li. E Mont Fleuri li menm li i ankadre bann zanfan sorti Belvédère, dan distrik Plaisance, La Misère li menm li, St Louis en bout dan Curio Bel Air, Sans Soucis.

E la nou war parey nou konnen lekòl Mont Fleuri i enn bann lekòl kot i annan bokou bann zanfan ki sorti dan plizyè. E osi Mr Speaker i pa

zis dan larezyon kot nou war bann zanfan ki vin lekòl Mont Fleuri.

I annan bann zanfan ki sorti espesyalman dan... akòz nou lekòl i ganny gete koman en lekòl ki zis o bor lavil li menm li kot bokou paran parey ou konnen zot travay dan bann departman ki annan pou fer ki baze anvil li menm li. E zot war li kot en landrwa apropriye pou zot kapab met zot zanfan akòz i pli pre pou zot kapab si i annan okenn keksoz pou zot kapab ariv kot lekòl.

E parey mon ti pe dir Mr Speaker, e mon lekòl li menm li nou pa ganny eparnye avek bann keksoz sosyal drog li menm li. E bann latitid anti sosyal ki sa i ede kot i destabiliz en pti pe lekòl.

E mwan mon pou dakor avek sa Mosyon anmennen par Onorab Samynadin akòz mon war poudir i annan son lenportans pou moderniz en pti pe sa Kod Kondwit pou bann lekòl kot la i a kapab ed bann *teachers* li menm li pou zot kapab fer zot louvraz, desarz zot responsabilite dan en fason en pti pe pli byen.

Mr Speaker, Lasanble li menm li i pa pe demande atraver sa Mosyon pou nou anmenn pinisyon en pti pe pli sever pou bann zanfan. Me selman nou kapab vwar li ansanm avek Minister

Ledikasyon, Gouvernman li menm li ki mannyer nou pou kapab fer bann zanfan ki zot kapab pran sa fasilite ki'n ganny met a zot dispozisyon dan en fason en pti pe pli responsab li menm li.

E ozordi Mr Speaker, souvandfwa mon fer en pti vizit kot lekòl, kot *head teacher* ennler i met en pti pe bann defayans li menm li kot paran pa pe angaze dan bann lekòl. E paran pa pase pou zot kapab vwar zot kot pe *involve* dan lavi lekòl zot zanfan.

E sa pe ede kot bann *teachers* souvandfwa zot dekouraze akòz plizyer fwa ki ou war ou war paran i vin kot lekòl ler zot zanfan swa i pe ganny sispann, kot la prezan zot vini. Dan plas pou vina size avek *teachers*, zot plito pe vin lo en fason *defending* pou zot kapab soutir zot zanfan.

E sa i pa pe ede dan lavi lekòl nou zanfan akòz parey nou konnen Mr Speaker, ozordi dan laplipar bann lekòl nou annan bokou bann *teachers* etranze. E mazorite sa bann *teachers* Mr Speaker, pa zot tou ki ganny en konpran en pti pe nou langaz e osi petet nou kiltir. E ler tou sa bann keksoz i arive li menm li, e tousala i annan en lenpak lo sa lekòl.

Kot la ozordi nou war poudir bokou bann etidyan ki zot menm zot pe lekòl dan

laplipar sa bann letablisman Lekol Gouvernman kot zot pa ankouraze pou zot demen vin en *teachers*. Akoz zot war poudir i annan bokou bann keksoz ki annan pou fer avek mon totalite bann zanfan li menm li. E osi petet fason ki bann paran zot menm zot apros lekol.

E mwan mon krwar poudir dan sa nivo disiplin kot Gouvernman pou revwar atraver Minister Ledikasyon. Mon panse Mr Speaker, poudir paran e merit pli angaze parey zis en pwen ki mon kapab met devan. Ler Minister pe travay lo sa bann mazine nouvo fason, nouvo disiplin li menm li e nou bann nouvo Polisi pou ede kot la i ava kapab anmenn en pti pe plis sa responsabilite dan lekol, kot la paran osi i kapab ganny angaze.

Mwan mon krwar poudir Minister poudir nou devret angaz plis bann paran kot lo kote bann diskisyon li menm li. E ozordi Mr Speaker, ozordi ki nou war dan mon lekol mon'n war bann *teachers* zot in fer sa plizyer fwa kot bokou bann *teachers* aköz zot pa reste dan sa distrik kot petet sa lekol i baze. Zot pe al dan ver kominote pou zot konn en pti pe ki mannyer kote bann zanfan i sorti.

Lekel ki sorti dan serten kominote pou zot vwar en pti

pe sa lanvironnman zot menm pou zot kapab ganny en konpran si en zanfan i annan petet i annan serten problem konportman, i konnen kote sa zanfan li menm li i reste. Ozordi Mr Speaker, ki nou war? Dan mon distrik, dan bann lekol dan mon distrik li menm li pli gran problem ki zot annan se ki i annan sa *issue* drog parey mon'n dir.

Apre lo kote *uniform* li menm li kot bokou zanfan ler zot sorti kot zot, zot *uniform* i byen. Petet ler zot ariv dan semen swa zot met en zip en pti pe pli kourt ouswa zot tant pou anmas zot lenz en pti pe. Kot la ler zot ariv kot lekol, aköz souvandfwa ler mon vin kot lekol mon vwar bann *teachers* in stasyonnen byen granmaten pou fer sir premyerman zot get dan sak bann zanfan si napa bann keksoz ki pa sipoze antre avek lekol li menm li.

Get en pti pe lo kote zot *hair style*, zot zong li menm li ki mannyer zot vini pou fer sir poudir zot la, e zot pe swiv bann Lalwa ki lekol li menm li pe mete.

Mr Speaker, mwan mon panse poudir bann serten diskisyon ki lo nivo Minister li menm li ouswa lo nivo lekol i enportan pou bann paran vin asiste.

E souvandfwa, ki nou war toultan i menm paran

menm ki vin devan. E mazorite fwa bann zanfan ki petet pe azir zot dan en fason ki pa byen kot lekol zot, zot paran pa tro asiste bann serten rankont kot lekol pou kapab ed zot. Akoz mon panse poudir bann *teachers* ki la i vin dezyenm paran nou zanfan. E osi kot lekol i dezyenm lakour kot nou zanfan i pas bokou zot letan.

E ozordi mon panse Mr Speaker, dan sa nouvo fason ki Onorab Samynadin pe demann avek Minister Ledikasyon pou zot revwar Kod Kondwit kot bann lekol. Bann paran i merit vin pli responsab pou zot angaze dan bann lekol. Akoz ki arive Mr Speaker, ozordi apre ki sa zanfan in fini lekol souvandfwa ler ou pe al rod en plas travay pe demann ou en sertifika *be it* nenport ki louvraz.

Me si sa zanfan pe ganny li en move sertifika oubyen en sa ki sorti kot lekol, sa i pa pou ede demen ko ti kapab ganny li en landrwa travay. E paran si zot vin atan kot zot zanfan akoz mazorite fwa, nou war poudir zanfan konportman kot lekol avek kot lakour ouswa dan semen i de.

Mr Speaker, oparavan ler nou, nou ti sorti lekol si nou'n sot 6er nou ti ankor dan semen lapolis i zwenn nou,

lapolis ti aret nou ti demann nou kestyon.

Akoz ti annan en serten ler ki apre lekol ki ou bezwen antre kot lakour paran. E mazorite fwa mwan avek mon bann zanmi ki nou ti fer *sport* sa letan, ler nou sorti *water sport* nou pe monte lapolis tanzantan ti apros nou. E mon krwar tou dernyerman zot ti abitye, akoz tanzantan zot ti war nou zot ti konnen poudir nou sorti pratik nou *sport*.

Me selman sa ti ede li menm li, kot zanfan ti kapab pran sa responsabilite kot i annan en serten ler ki ou bezwen antre kot lakour. E osi Mr Speaker, ki nou war ozordi? Minister in bezwen rod an en serten lapros kot paran i bezwen pey bann serten sez, latab, laport okenn bann keksoz ki sa zanfan in andomaze.

Mwan mon krwar poudir sa i e fason pou ede ki sa zanfan li menm li i kapab pran responsabilite. Akoz nou ti war poudir ozordi dan bann lekol ti annan bokou vandalizm an term lo kote kas bann lekipman ki lekol i annan li menm li. E sa i en fason ankor kot i ti kapab ede.

Ozordi ki nou pe war, bokou sa bann vandalizm pe ganny arete, akoz sa paran in ganny kriye kot lekol i ganny demande pou li kapab pran responsabilite, swa pou repare

swa i bezwen pey sa ki sa zanfàn in andomaze. E ler nou pe get ozordi Mr Speaker, ozordi mon vreman apresye ki avek nouvo fason fer bann zanfàn ozordi zot kapab kit zot seve nenport ki *style* ki zot, zot anvi.

Me selman dan en fason kot ou pa kit li dan en fason kot i pa sorti byen. Ou bezwen kit li byen prezantab li menm li. E sa i pou ede kot lafason ki bann zenn i panse ozordi avek dan mon letan pou mwan ki keksoz in sanze. Ou war sa kalite sanzman ki sa in anmennen. E ozordi osi ki nou war bann fiy pe komans tenn seve. E ozordi poule moman lekol pa pe lese.

Eski sa osi i en diskisyon ki nou bezwen anmenn devan atraver Minister Ledikasyon pou gete si i en keksoz ki pou deside?

E Minister Speaker, souvandfwa letan ou pran en desizyon, ler ou pran en desizyon pete pou annan serten group dimoun ki pou dakor e i annan petet pa pou dakor.

La parey lo kote bann diskisyon ki nou, nou kapab anmenn devan. E mwan mon pe demande avek bann paran ouswa ansanm avek bann *teachers* vin devan met bann pwen devan lo kote bann diskisyon ki nou Lasanble ozordi nou pe komans

anmennen atraver sa diskisyon ki atraver sa Mosyon ki Onorab Samynadin pe anmennen Mr Speaker.

Kot sa i ava kapab ede ki demen okenn desizyon ki ganny pran ki lezot paran zot menm zot pa war zot dan en pozisyon aköz zot panse poudir zot pa dakor avek sa. Mwan mon krwar poudir Minister atraver Gouvernman i annan sa fasilite atraver lekol, kot paran zot kapab vin devan dan bann *meeting*, bann *meeting* konsiltasyon ki lekol i fer avek paran ki ganny fer.

Mwan dan mon lekol mon war souvandfwa dan Lekol Mont Fleuri, kot nou 2 *headteachers* ek zot bann *teachers* zot menm zot fer sa souvandfwa pou zot kapab met bann paran en pti pe lo fason ki zot pe war bann serten nivo ledikasyon dan lekol pe ale.

Mr Speaker, en lot pwen ki mon le tous lo la, se ozordi dan bann lekol li menm li nou bezwen get fasilite ki annan. Zis parey Lekol Mont Fleuri, nou annan sa problem kot souvandfwa i annan pa bokou petet 2 oubyen 3 bann etidyan ki sey rod en fason pou fer drog antre.

Nou pa pe dir ki nou bezwen war fason ki bann lekol i ganny *fenced*. Pou anpese ki bann fouter dezord zot stasyonnen an deor lekol ki

ler lekol li menm li bann *teachers* petet pe angaz zot dan bann lezot aktivite, sa bann keksoz ki pou detri lavi nou zanfàn zot, zot pe kapab ganny sa fason pou zot antre dan lekol.

Me ozordi Mr Speaker, lekol li menm li nou war poudir laplipar lekol in met camera. Ler ou pou al dan laplipar dan bann lekol, mwan mon vizit tou lede lekol mon war poudir i annan *camera* partou. Kot sa pou ede pou *secure* nou lekol li menm li.

Mr Speaker, sa Mosyon ki Onorab Samynadin in anmennen, mon pou donn mon sipor akòz mon santi poudir avek fason fer ki konmela in sanze bann zanfàn i get keksoz dan en lot fason, bann etidyan li menm li.

E mwan mon krwar in ariv en serten ler kot Minister Ledikasyon li menm li dan zot pe vwar sa nouvo disiplin dan bann lekol, se anmenn, angaz paran dan sa bann diskisyon kot sa demen i ava evite kot i ava annan kot i annan ti dir mon pa ti okouran mon pa ti konnen la zot pe enpoz lo mon zanfàn. I pe dir mwan sa, i pe dir mwan isi.

I annan bokou lezot keksoz lo kote larelizyon osi tou. Sa osi tou nou bezwen revwar akòz anvì ki konmela i annan bokou plizyer bann lezot larelizyon ki zot pe rod en

fason pou zot kapab ede pou ed sa lavi sosyal dan bann lekol Mr Speaker. Kot sa petet li menm li i kapab *improve* en pti pe.

E mwan mon panse poudir se ki sa Mosyon i pou ede, i pou ed bann lekol, akòz mon santi poudir la sa letan ki nou ladan la avek bokou keksoz ki pe arive li menm li dan pei Mr Speaker ki Onorab Samynadin in pas kot plizyer bann pwen ki kapab arive, zouti ki pe antre dan lekol lezot keksoz ankòr.

E pou evite ki bann keksoz li menm li ki pou afekte nou bann zenn kapab ganny akse dan nou bann lekol, i annan plizyer keksoz ankòr. Bokou travay pou ganny fer, me selman nou bezwen enkli fer sir poudir paran i angaze pa toultan, menm si group menm akòz tou zanfàn i vin la dan bann lekol.

E paran i bezwen angaze dan bann diskisyon rod fason pou nou kapab amelyor lakour lekol li menm li lo kote disiplin Mr Speaker.

Mon pou donn mon sipor sa Mosyon anmennen par Onorab Samynadin. Mon dir li kont lo mwan, akòz mon osi mon annan mon zanfàn ki pe lekol. E mon ti a voudre ki lekol i vin en fason kot i annan plis disiplin, e kot bann *teachers* zot menm zot, zot santi zot pli alez pou zot kapab

vin donn sa meyer ledikasyon nou zanfàn. Mersi Mr Speaker.

(APPLAUSE)

MR SPEAKER

Mersi. Mersi Onorab. Mon donn laparol Onorab Sultan.

HON VALDANA SULTAN

Mersi Mr Speaker. Bonn apre midi Mr Speaker; mon bann koleg Onorab e tou bann dimoun a lekout. Mr Speaker, sa Kod Kondwit pou bann zanfàn ki an operasyonnel depi 2010. Mon santi ki in deservi son bi pou gid konportman bann zanfàn, e menm promot bon disiplin.

Me mon pou osi agree ki petet parfwa i pa'n sitan fasil pou li ganny enplimante totalman - parey nou dir *à la lettre* pou diferan sirkonstans ou rezon, me in annan son sikse. Mr Speaker, avek tou bann diferan sanzman dan sosyete, lavansman dan teknolozi e menm modernizasyon dan ledikasyon li menm.

In petet anmenn serten defi ki parey mon'n dir oparavan, ki'n fer li pli difisil pou enplimant sa Kod of Kondwit. Alor, mon krwar ki i neserer ki nou pou annan en revizyon pou nou kapab pran kont tou bann nouvo sanzman ki'n annan dan lekòl.

Me dan tou sa nou bezwen Mr Speaker, rekonnet zefor devosyon, langazman bann ansennyan, bann *staff*, bann *non-teaching staff* kot lekòl ki er fas avek bann diferan sityasyon disiplin ki parfwa petet zot menm zot santi zot ganny *threaten* par sa bann konportman.

Mon osi mazin bann *school warden*, parfwa zot sa premye dimoun sa premye *staff* ki annan kontak avek zanfàn, ki zot pa pran en labitid poudir miss a dil avek ler i ariv kot lekòl. Me si zot vwar poudir i annan keksoz zot bezwen koz ek sa zanfàn lo la, petet son *uniform*. Aranz ou *uniform* avan ou antre dan lakour lekòl, zot fer li e nou bezwen rekonnet sa.

Letan ki nou rekonnet poudir bann nouvo lavansman dan teknolozi par egzanp *cyberbullying* in vin enn bann keksoz pli komen ant bann zanfàn. Alor, mon pe mazin ki i enportan ki ler nou fer en Kod Kondwit revize ki i enn bann keksoz ki ganny pran plas. E dan tou sa mon mazin i pou enportan ki i annan sa diskisyon partisipasyon bann zanfàn, e menm bann ansennyan akòz zot pep pe viv sa kot lekòl.

Zot annan zot partisipasyon ki zot kapab annan zot input dan sa nouvo Kod Kondwit. Akòz parfwa i pli

bon nou dil avek sa bann dimoun ki lo teren pou zot kapab donn nou bann nide ki zot fer fas avek. Mr Speaker, en Kod Kondwit revize i a fer ki nou pran bann lapros ki nou pou plito reabilit konportman bann zanfan olye ki i ganny gete koman bann pinisyon.

E i enportan bann zanfan ki zot pran kont zot responsabilite ki al avek sakenn zot drwa. Par egzanp zot annan en drwa ledikasyon, i enportan ki zot realize poudir mon annan en drwa a ledikasyon. Me mon responsabilite se ki mon asire ki mon la prezan, e mon boner dan laklas pou fer ki mon ganny sans viv mon drwa ki mon annan a ledikasyon lo maksimonm.

Mr Speaker Lasanble, mon pa krwar ni enn mon bann koleg nou pe rod pinisyon pli sever pou bann zanfan ler nou pe dir annou reviz sa Kod Kondwit. Nou pa ni menm pe blanm bann paran pou move konportman zot zanfan, aköz nou tou nou konnen ki zanfan parfwa ler i pa dan lizye son paran i annan en lot konportman aköz petet i les li ganny antrennen konportman pa akseptab ansanm avek lezot kanmarad.

Mon pa pou dir Mr Speaker, ki mon lekol dan mon distrik Port Glaud i parfe. Me mon felisit bann paran ek

bann travayer sa lekol ki donn zot langazman pou ed otan posib pou enstil bann bon konportman dan bann zanfan. En Kod Kondwit revize pou mwan i pa pou enn ki pou fer lasosyete tir ledwa lo febles dan disiplin bann zanfan.

Me plito enn ki pou anmenn bann fason ki pli efektiv, zis e relevan avek nou bann zelev ki nou annan ozordi, kot i a osi annan konsistans dan son lenplimantasyon.

Mr Speaker, mwan koman en ansenyan par profesyon, souvan mon ti dir ek bann zanfan poudir parfwa letan zot fer bann keksoz ki mal, ler nou pe sey dir zot poudir sa i dan *Code of Conduct*.

Mon ti toultan dir ek zanfan, sa Kod Kondwit la i pa en pinisyon pou ou sa. Sa Kod Kondwit sa bann regilasyon lekol ki nou pe fer ou swiv i bann pti Lalwa ki nou pe elve ou pou swiv. E ler ou'n kapab swiv sa bann pti Lalwa sa pou fer ou vin en sitwayen pli responsab. Aköz pli tar koman en adilt, ou pou kapab respekte bann gran Lalwa ou pei ensi ki lezot pei. Ki i fer ki prizon pa pou vin en keksoz ki pou'n pas en faz dan ou lavi, aköz ou pou'n senpleman kapab swiv bann Lalwa.

Alor Mr Speaker, mwan pou mwan, mon donn sipor sa

Mosyon. Koz pou mwan bann nouvo regilasyon, mon mazine nou pou anmennen dan sa Kod Kondwir revize, i pou anmenn plis langazman paran dan lenplimantasyon bon disiplin bann zanfan. I asir plis respe proteksyon e en lanvironnman laprantisaz enkliziv. Mersi Mr Speaker.

(APPLAUSE)

MR SPEAKER

Mersi Onorab. Mon a donn laparol Onorab Anne Bistoquet.

HON ANNE BISTOQUET

Mersi Mr Speaker. Bonn apre midi Mr Speaker, Manm koleg Onorab e tou dimoun a lekout. Mr Speaker, i fer mon loner pour segonn Mosyon anmennen par Onorab Samynadin.

E parey li in dir bokou lo la e mon krwar in set en platform byen detaye. E parey bann Manm Onorab ki'n koz avan mwan zot osi zot in fer bann bon kontribisyon. E mwan osi mon pour fer mon de kontribisyon lo sa Mosyon Mr Speaker.

Mr Speaker, konportman dan bann lekol, i en laspe enportan anver leksperyans laprantisaz bann etidyan ensi ki bann ansennyan. En lanvironnman pozitiv kot i annan respe i vreman

enportan pour laprantisaz efektiv.

Me parey nou tou nou konnen, dan en lekol nou annan bann etidyan avek diferan personnalite, mantalite, *background* sosyal.

E fason elve, ki fer ki pour bokou lannen in annan konsern, dan deteryorasyon e konportman bann etidyan. Tel ki *bullying*, vyolans e mank respe anver ansennyan e lezot etidyan e menm propriyete lekol. Se sa ki'n fer lentrodiksyon en Kod Kondwit dan bann lekol.

En Kod Kondwit parey nou konnen i en dokiman ki detay bann lekspektasyon, e standar konportman ki merit ganny swiv dan ka kot i pa pe ganny swiv i annan son konsekans ki vin avek.

Etandonnen ki sa i en bon fason fer, i annan bann revizyon ki bezwen ganny fer de tanzantan pour asire ki adres tou bann nouvo defi, dan fason konportman en etidyan ki lekol i eksperyanse.

Alor Mr Speaker, sa Lasanble i santi ki sa enn Kod Kondwit, aktyel pa azour avek defi konportman dan bann lekol. E se pour sa ki nou pe demann Gouvernman atraver Minister Ledikasyon pour revwar sa Kod Kondwit pour bann etidyan ki date depi 2010. Avek bi ki sa i ava ede pli adres problem

konportman dan lekol e promot plis sans responsabilite anver bann zanafan.

Mr Speaker, sa Mosyon i santre lo diferan rezon akòz ki sa revizyon i sitan enportan parey Onorab Samynadin in fer resorti.

Mr Speaker, lo paz 5 ek 6, i souliny 6 drwa ek responsabilite bann etidyan. Kestyon ki nou demande se eski tou etidyan i vreman konn zot drwa e responsabilite? Sa bann drwa e responsabilite labaz i konm swivan ;

Premyerman, drwa ere dan sa lekol respektif e ganny trete dan en fason zis avek konprenezon respe, ek polites.

Responsabilite sa drwa se pour tret lezot avek konpreansyon, tolerans ek respe, koz poliman e swiv bann konsey ki *staff* lekol i donnen avek respe.

Dezyenmman, drwa pour aprann tou sa ki zot kapab. Son responsabilite se pour vin lekol regilyerman, a ler, annan bann materyo travay e pare pour aprann bon konportman dan laklas e pa enteronp lezot e konplet travay laklas ensi ki travay lakour.

Trwazyenmman, drwa pour santi an sekirite e santi ki keksoz i ganny respekt. Sa i vin avek responsabilite pour respekt. Keksoz lezot, respekt. Propriyete lekol.

Annan en konportman rezonnab ki pa koz okenn danze dan laklas, e dan lakour lekol.

Katriyenmman, drwa pour annan en lekol prop e annord. Sa i swiv par responsabilite pour pran swen avek lanvironnman lekol, e gard li prop.

Senkyenmman, drwa pour partisip dan bann aktivite lekol. Responsabilite pour swiv e obei Kod Kondwit lekol. Partisip aktivman dan bann levennman lekol. Konport dan en fason apropiye dan lekol e dan lakominote pour ki sa zanafan i ava anmenn loner pour son lekol. Reprezant son lekol avek lafyerte toultan. E met son liniform korekteman avek lafyerte.

E sizyenmman Mr Speaker. Zanafan i annan en drwa zwir sikse e ganny rekonnet. Sa i vin avek en responsabilite pour *être* fyer son lakonplisman e rekonnet sikse ek lakonplisman lezot.

Mr Speaker, parey nou'n vwar sak drwa i annan son responsabilite. Me pour tro bokou letan, zanafan in ganny edike lo zot drwa san ganny enformen lo zot responsabilite.

Wi, i enportan pour zanafan konpran e egzers zot drwa. Me i osi enportan pour zot rekonnet lenportans zot responsabilite. Sa i a fer ki sa

zanfan i a kapab rann kont zot aksyon.

Mr Speaker, i enportan pour note, ki lo paz 29 sa Kod i annan en deklarasyon par etidyan ek en lot par paran ki bezwen ganny sinyen par sa etidyan e sa paran.

Sinyatir sa paran e sa etidyan i vedir ki tou le de parti in lir e in konpran konteni sa Kod Kondwit. Me eski zanafan pe vreman pratik bann lareg ki egziste dan sa Kod Kondwit?

Eski sa Kod Kondwit i azour avek bann devlopman modern? Eski zanafan ek paran pe vreman pran zot responsabilite, pour asire ki sa zanafan i pratik sa ki byen. Sirtou dan lakour lekòl anver son bann kanmarad ensi ki letan i dan liniform lekòl ?

Eski tou lekòl e Minister pe vreman par aksyon nesaser ek bann mal fe? Sa i bann refleksyon ki nou tou nou bezwen fer koman en sosyete e koman en nasyon.

Nou bezwen revwar bann defayans, ki egziste an se moman. Ki pe kontribye anver bann defayans ki egziste e ki meyer fason nou kapab amelyore pour ki afen lekòl i vin sa landrwa kot etidyan i vreman al fer zot laprantisaz akademik ek pratik. Respe zot kanmarad, respe zot ansennyan. E osi respe propriyete lekòl.

Disiplin i merit vin labaz sa nouvo Kod Kondwit. Disiplin i reprezant lantrennman, lobeisans kontrol ek rezilta.

Mr Speaker, mon profite pour salye tou bann ansenyan, ki pe kontinyen fer zot mye, pour ogmant nivo laprantisaz nou bann zanafan malgre bokou defi.

Mon osi profite pour salye bann zanafan ki pe touzour respekte lezot e annan bonn savwar viv anver enn a lot. Mon salye bann paran ki pe touzour disiplin zot zanafan, e gid zot ver sa bon semen pour ki demen zot ava vin bann adilt egzampler e respektab.

Me par kont Mr Speaker, mon kondann latitid bann zanafan ki touzour pe pratik bann move konportman. Mon demande pour ki Polisi lekòl i vin pli sever anver zot. Se pour sa Mr Speaker ki mon fer bann propozisyon swivan:-

Premyerman pour Minister konsilte tou bann partner, pour asire, ki tou bann defi i ganny adrese dan sa nouvo Kod Kondwit.

Dezyenmman, ranforsi konsekans pour bann zanafan ki kontinyelman pe mal konport zot. Bann ki touzour pe pratik *bullying*, vyolans, e mank respe anver lezot.

Trwazyenmman, adres sa laspe problem mantal dan sa nouvo Kod Kondwit.

Katriyenmman, enkli bann stratezi, ki pour promot bon konportman pozitiv. Sa i kapab enkli plis *incentive* pour bann bon konportman. E loportinite pour bann ki demontre bon *leadership*.

E senkyenmman, anvi ki teknolozi i en form laprantisaz modern, dan bokou lekòl. Nou osi vwar ki serten zanfan, pa neseserman servi li dan en fason ki toultan pozitiv.

Alor mon osi demande ki revizyon i met lanfaz pour adres bann nouvo *challenges*, tel ki *cyber bullying*, e tou lezot form negativ ki ganny koze par servi zouti teknolozi.

Mr Speaker parey nou konnen e parey mon'n fer resorti. I pa zanmen fasil pour en lekòl ek en sosyete dil avek diferan zanfan sorti dan diferan *background* sosyal.

E se pour sa ki nou demann Minister pour annan bokou konsiltasyon lo sa revizyon ki nou pe propoze, avek lespwar ki nou ava vwar en reform total, dan mentenir e ledikasyon lo fason konportman nou bann etidyan.

E afen ki sakenn, sirtou paran a pran zot responsabilite, pour asire ki valer respe e disiplin. I enn ki

ganny ranforsi dan nou sosyete.

Avek sa Mr Speaker mon pour donn tou mon sipor Mosyon anmennen par Onorab Samynadin. Mersi.

MR SPEAKER

Mersi Onorab. E Onorab Bistoquet ti dernyen enterven an ki mon annan lo mon lalis. Alor nou pour kapab termin deba la. Me i a reste pour loter Mosyon donn son repons.

Sorry ou ti'n lev lanmen? Ou anvi adrese? *Ok*. Onorab John Hoareau sel Manm ki'n lev lanmen pour adrese. Onorab Labrosse. Se tou, en ? Donk, mon ferm mon lalis la e nou pour anvoy kontinyasyon sa deba pour demen *matin*.

Akoz mon annan en lentere pour mwan termin 5er. En lobligasyon. Donk demen bomaten nou a termin ek Onorab Hoareau ek Onorab Labrosse. E apre repons loter Mosyon. Donk, wi.

Me selman avan nou separe pour ozordi mon le rebran, bann size ki'n leve dan lazournen pour anmenn en pe konklizyon lo la.

Premye lo propozisyon ki mon ti fer pour ki nou pran en *Statement* lo size *Electoral Commission*. E ki kapab adres rezistrasyon voter.

Mon'n demann Madanm Clerk pour fer kontak nesaser,

pour nou kapab ganny *Electoral Commission* pour kapab vini demen.

Mon'n sirkil sa propozisyon, pour bann Manm *Assembly Business Committee* e mon'n ganny serten repons ki'n donn sipor sa propozisyon. E mon pa'n ganny okenn obzeksyon. Alor mon pour demann Madanm Clerk pour prosede, avek *Revizyon Order Paper* pour nou kapab met en *Statement* lo *Order Paper*.

I a vin apre Mosyon ki nou bezwen pran. Akoz bann *Statement* koumsa i bezwen tonm apre lezot biznes koman *any other business* si nou kapab servi sa term. So sa i pour sa propozisyon.

Lo size labsans Manm Lopozisyon *US* dan Lasanble apre midi. Mon dezole e mon regrete, ki sa in arive. Mon le dir letan mon ti adres sa size '*walk out*', dernyen fwa, mon ti dir mon rekonnet ki Manm i annan sa privez pour zot sorti an protestasyon.

Me selman mon ti osi dir poudir sa a devret egzazere e i devre rezonnab. Mon pe konsider, menm si mon pa aksepte ki i annan okenn rezon pour Lopozisyon *walk out* lo sa ki'n arive bomaten.

Mon pe aksepte zot *walk out* pour bomaten sesyon ki nou ti ladan koman en

protestasyon e mon pour les li la.

Me selman mon krwar labsans apre midi i pa akseptab. E mon pe aplik sanksyon ki mon kapab aplike anba Lalwa lo labsans non otorize par Manm dan Lasanble. E sa sanksyon i vedir rediksyon lapey R1000 pour labsans en *sitting*.

(APPLAUSE)

MR SPEAKER

Mon le dir ki mon eksepte ki sa i osi kouver pwen labsans lo travay Komite ki'n ganny raporte. E mon pa pour al plis lo la.

Donk la i la sa de konklizyon ki mon le fer. Mon remersye Manm pour zot partisipasyon. Nou pour *adjourn* la e nou pour repran deba demen *matin* 9er. *Adjourn*.

(ADJOURNMENT)

